

# पहिला समूएल

## एल्काना अउ ओकर परिवार सीलो में आराधना करत ह

1 एल्काना नाउँ क एक मनई रहा। उ एप्रैम क पहाड़ी पहाँटा क रामातैसोपीम क बसइया रहा। एल्काना जुफ परिवार स रहा। एल्काना यरोहाम क पूत रहा। यरोहाम एलीहू क पूत रहा। एलीहू तोहू क पूत रहा। अउर तोहू सूप क पूत रहा जउन एप्रैम क परिवार कबीला स रहा।

2एल्काना क दुइ मेहरारू रहँ। एक क नाउँ हन्ना रहा अउ दूसरी क नाउँ पनिन्ना रहा। पनिन्ना लड़कोर रहिन, मुला हन्ना क कउनो अउलाद नाहीं रही।

3एल्काना हर बरिस आपन सहर रामातैसोपीम क तजि देत रहा अउ सीलो नगर जात रहा। एल्काना सर्वसक्तीमान यहोवा क आराधना सीलो में करत रहा अउ हुवाँ यहोवा क बलि भेंट\* चढ़ावत रहा। सीलो उ जगह रही जहाँ होपनी अउ पीनहास यहोवा क याजक क तरह सेवा करत रहेन। होपनी अउ पीनहास एली क पूत रहेन। 4जब कबहुँ एल्काना आपन बलि भेंट चढ़ावत रहा, उ गोस क एक हीसा आपन मेहरारू पनिन्ना क देत रहा। एल्काना गोस क भाग पनिन्ना क लरिकन क भी देत रहा। 5एल्काना गोस क हीसा क बराबर हन्ना क भी हमेसा दइ देत रहा। एल्काना इ तब भी करत रहा जब यहोवा हन्ना क कउनो अउलाद नाहीं दिहे रहेन। एल्काना इ एँह बरे करत रहा कि हन्ना ओकर इ मेहरारू रही जेसे उ सच्चा पियेम करत रहा।

## पनिन्ना हन्ना क परेसान करत रही

6पनिन्ना हन्ना क हमेसा चिढ़ाइके खिसियावत रही अउ ओका परेसान करत रही। पनिन्ना इ एँह बरे करत रही काहेकि हन्ना कउनो बच्चा क कोख स पइदा नाहीं कइ सकत रही। 7हर बरिस जब ओकर परिवार सीलो में यहोवा क घरे में जात पनिन्ना हन्ना क परेसान करत अउर उ रोवत अउर कछू भी नाहीं खावत। 8ओकर भतार, एल्काना, उ से कहेस, “हन्ना, तू काहे रोवति अहा? तू काहे नाहीं खाइया? तू दुःखी काहे अहा? का मई तोहार बरे दस बेटवन स बेहतर नाहीं अहइ?”

## हन्ना क बिनती

9खाए अउ पिए क पाछे हन्ना चुपचाप उठी अउ यहोवा स पराथना करइ गइ। यहोवा क पवितर आराधनालय क दुआरे क निअरे कुर्सी प याजक एलि बइठा रहा। 10हन्ना बहोत दुखी रही। उ फूट-फूट कर रोवत रही। उ यहोवा स बिनती करेस। 11उ परमेस्सर स खास प्रतिग्या किहेस। उ

**यहोवा क बलि भेंट** इ खास जनावर होत रहा अउ मारा जात रहा अउ वेदी प अक्सर चढ़ावत जात रहा।

कहेस, “सर्वसक्तीमान यहोवा, लखा मई केतना जिआदा दुखी हउँ। मोका याद राखा। मोका बिसरा नाहीं। जदि आप मोका एक पूत देब्या तउ मई पूरी जिन्नगी भइ ओका आपका अर्पण कइ देब। उ नाज़ीर होइ जाब। उ दाखरस या कउनो नसीला दाखरस न पिइ। अउ कउनो ओकर बार नाहीं काटी।”

12जब तलक हन्ना यहोवा क समन्वा आराधना करत रही, एली ओकर मुँह निहारत रहेस। 13हन्ना हिरदय स बिनती करत रही। ओकर ओठ हीलत रहेन, मुला कउनो अवाज नाहीं निकरत रही। एली समझेस कि हन्ना दाखरसे स मदमस्त बा। 14एली हन्ना स कहेस, “तोहरे लगे पिअइ क बहोत जियादा रहा। अब समइ आ गवा कि दाखरस पिअइ छोड़ देइ चाही।”

15हन्ना जवाब दिहेस, “मई सराब या जौ क दाखरस नाहीं पिअँ ह। मई बहोत जिआदा मसीबत म अहउँ। मई यहोवा क आपन सब समस्या क बतावत रहेउँ ह। 16जिन सोचा कि मई बुरी अउरत हउँ। मई एँतनी देर ताई एँह बरे पराथना करत रहेउँ ह कि मोका ढेर परेसानी अहइ अउ मई जिआदा दुखी अहउँ।”

17एली जवाब दिहेस, “सान्ति स जा। इस्त्राएल क परमेस्सर तोहका उ देई जउन तू मांग्या ह।”

18हन्ना कहेस, “मोका आसा अहइ कि आप मोसे खुस अहइँ।” तब्बइ हन्ना गइ अउ तनिक खाएस। उ अब तनिकउ दुखी नाहीं रही।

19दूसर दिन भिन्सारे एल्काना क परिवार उठा। उ सबइ परमेस्सर क आराधना किहेन अउर उ पचे आपन घर रामा क लउटि आएन।

## समूएल क जन्म

एल्काना आपन मेहरारू क लगे सोएस। यहोवा हन्ना क याद राखेस। 20तब उस समइ निम्नलिखित साल में हन्ना गोइ स भारी भइ अउ ओसे एक बेटवा भवा। हन्ना ओकर नाउँ समूएल राखेस। उ कहेस, “एकर नाउँ समूएल अहइ काहेकि मई एक यहोवा स माँगा ह।”

21उ बरिस एल्काना बलि भेंट देइ अउ परमेस्सर क समन्वा कीन्ह गइ प्रण क पूरा करइ सीलो गवा। उ आपन परिवारे क आपन संग लइ गवा ह। 22मुला हन्ना नाहीं गइ। उ एल्काना स कहेस, “जब लरिका कछू ठोस चीज खाइ लागी तबहिँ मई एँका सीलो लइ जाब। मई ओका यहोवा क देब। उ एक नाज़ीर बनी। उ सीलो में रही।”

23हन्ना क भतार एल्काना ओसे कहेस, “उहइ कर जउन तू उत्तिम समझत ह। तू तब ताई घर में रहि सकत ह जब

तलक लरिका कछू ठोस खइया क खाइ के जोगगा बाढ़ नहीं जात। जउन तू कहया ह यहोवा उहइ करई।" एँह बरे आपन बचवा क पालब पोसब बरे तब ताई घरे प रहि गइ जब ताई उ ठोस खइया क खाइ बरे बाढ़ नहीं जात।

### हन्ना समूह क सीलो में एली क लगे लइ जात ह

24जब लरिका ठोस खइया खाइ बरे बाढ़ गवा तब हन्ना सीलो में यहोवा क आराधनालय लइ गइ। हन्ना आपन संग तीन बरिस क एक बछवा, बीस पौण्ड आटा अउ एक मसक दाखरस भी लइ गइ।

25उ पचे यहोवा क समन्वा गएन। एल्काना यहोवा क बलि क रुप में, जइसा उ अक्सर करत रहा, बर्धा क मारेस। तबहिं हन्ना बचवा क एली क लगे लइ गइ। 26हन्ना एली स कहेस, "महोदय, छिमा करई। मई उहइ मेहरारु हउँ जउन परमेस्सर क पराथना करत आप क बगल में खड़ी रही। मई बचन दिए रहेउँ कि मई फुरइ कहत हउँ। 27मई इ बचवा बरे पराथना किहे रहेउँ। यहोवा मोका इ बचवा दिहेस ह। 28अउर अब मई इ बचवा क यहोवा क दइ देत हउँ। इ पूरी जिन्नगी यहोवा क रही।" तबहिं हन्ना बचवा क उहई छोड़ेस अउ यहोवा क आराधना किहेस।

### हन्ना धनवादे देत ह

2 हन्ना कहेस, "यहोवा में, मोर हिरदइ खुस अहइ। मई आपन परमेस्सर में जिआदा सक्ती\* पावत हउँ। मई आपन दुस्मनन क हराइ दिहउँ ह मई आपन जीत स खूब खुस हउँ।\* मई आपन दुस्मनन प हसेउँ ह।

2"कउनो अइसा नहीं अहइ जउन यहोवा क नाई पवितर अहइ। तोहार अलावा कउनो परमेस्सर नहीं। हम लोगन क परमेस्सर क नाई कउनो चट्टान नहीं अहइ।

3बन्द कइ द्या डींग मारब, घमण्ड भरी बात जिन करा। काहेकी यहोवा परमेस्सर अहइ सब कछु जानत ह। परमेस्सर मनइयन क रह देखौवत ह अउ ओनकइ निआव करत ह।

4सक्तीसाली जोधा क धनुस टूटत हीं, अउ दुर्बल सक्तीसाली बनत हीं।

5जउन लोगन क पास पाछे टेमें में खाइ बरे ढेर क खइया रहेन अब ओका रोटी प्राप्त करइ बरे काम करइ क होइ। मुला जउन लोग बीत गवा टेमें में भूखा रहेन, अब ओका देर तलक भूखा नहीं रहइ क होइ। मेहरारु जउन बच्चा क पइदा नहीं कइ सकत रहेन, अब सात गदेलन की में अहई। मुला जेकर पास ढेर गदेलन रहेन उ दुःखी अहइ काहेकि उ पचे अब मरि गएन।

6यहोवा लोगन क मउत देत ह, अउ उ ओन सब क जिआवत ह। यहोवा लोगन क नरके में पठवत ह, अउर उ फुन स ओन सब क ऊपर उठावत ह।

**सक्ती** यहोवा क उपासना में मोर सींग उठा बाटइ।" सींग क अरथ सक्ती अहइ।

**मई आपन ... खुस हउँ** साब्दिक अरथ दुस्मनन "मोर मुँहना दुस्मनन प खुला बाटइ।"

7यहोवा मनइयन क दीन बनवत ह, अउ उहइ मनइयन क धनी बनवत ह। यहोवा मनइयन क विनम्र बनवत ह, अउ उ मनइयन क बड़कवा बनवत ह।

8यहोवा गरीबन क धूरि स उठावत ह। यहोवा गरीबन क दुखे स उबारत ह। यहोवा गरीबन क राजा क संग बइठावत ह। उ गरीबन क खास मनई बनवत ह अउ उ ओनका मान्य मेहमान बनवत ह। यहोवा समूचइ दुनिया क रचेस ह। उ सारे जग क खंभा प टेकाएस ह।

9यहोवा आपन पवितर लोगन क रच्छा करत ह। उ ओनका ठोकर खाई स बचावत ह। मुला पापी मनइयन क नास कइ दीन्ह जाई। उ पचे घनघोर अँधियारे में भरइहीं। ओकर सक्ती ओकर विजय प्राप्त करइ में मददगार नहीं होइ।

10यहोवा आपन दुस्मनन क नास करत ह। सर्वोच्च परमेस्सर अकास में लोगन क खिलाफ गरजब। यहोवा जमीन क छोर ताई निआव करिहीं। उ आपन राजा क सक्ती देइहीं। उ आपन राजा क बरिआर करी।"

11एल्काना अउ ओकर परिवार आपन घरे रमा क गएन। लरिका सीलो में रहि गवा अउ याजक एली क मातहत होइके यहोवा क सेवा करत रहा।

### एली क पापी बेटवा

12एली क दुइ बेटवन बुरा मनई रहेन। उ पचे यहोवा क परवाह नहीं करत रहेन। 13उ पचे एकर परवाह नहीं करत रहेन कि याजकन स मनइयन बरे कइसे ब्योहार क आसा कीन्ह जात ह। याजकन क मनइयन बरे इ करइ क चाही। जब कबहुँ कउनो मनई बलि भेंट लइ आवत ह तउ याजकन क एक बासन में मौस क खउलत पानी में बुलकावइ चाही। याजक क सेवक बरे आपन हाथे में खास काँटा लइके आवइ चाही। काँटा में तीन नोक होइ चाही। 14याजक क सेवक क काँटा क बासन या कतली में नावइ चाही। काँटा जउन कछू बासन क बाहरे लइ आवइ उ मौस याजकन क होइ। इ अहइ जउन याजकन क जरिए उ इस्त्राएलियन बरे कीन्ह जाइ चाही जउन सीलो में बलि भेंट करइ आवई।

15मुला एली क बेटवन इ नहीं किहेन। चर्बी क वेदी प जराई जाइ स पहिले भी ओनकइ बेटवन उ लोगन क लगे आइ जे बलि चढ़ात ह अउ ओनका कहेस, "याजक क कछू मौस भूँजइ बरे द्या। याजक तोहसे बुलकावा भवा मौस न लेइहीं।"

16बलि क देवइया इ कइ सकत ह, "चर्बी पहिले बारा। तब तू जउन चाहा लइ सकत ह।" अगर अइसा होत तउ याजक क नउकर जवाब देत, "नहीं मोका अबहीं गोस द्या, अगर तू मोका इ नहीं देत ह तउ मई एँका तोहसे लइ जाब।"

17इ तरह एली क बेटवन इ देखावत रहेन कि उ पचे यहोवा क भेंटे में दीन्ह बलि क वास्ते मान नहीं देत रहेन। इ यहोवा क खिलाफ बहोत बुरा पाप रहा।

18मुला समूह यहोवा क सेवकई करत रहा। समूह सन क बना खास एपोद पहिरत रहा। 19हर बरिस समूह क

महतारी एक ठु नान्ह चोगा समूएल बरे बनवत रही। उ हर बरिस आपन भतार क संग बलि भेंट करइ बरे सीलो जात रही तउ उ नान्ह क चोगा समूएल बरे लइ जात रही।

20एली एल्काना अउ ओकर मेहरारू क आसीबाद देत रहा। एली कहेस, “यहोवा, तोहका हन्ना क जरिए जिआद लरिका देई। इ लरिकन उ लरिका क ठउर लेइहीं जेकरे सन्ती हन्ना पराथना किहेस ह अउ यहोवा क दिहेस ह।”

तब एल्काना अउ हन्ना घरवा लउटेन, अउर 21यहोवा हन्ना प दया किहेस। ओकर तीन पूत अउ दुइ बिटिया भइन। अउर लरिका समूएल यहोवा क लगे बाढ़ गवा।

### एली आपन पापी बेटवन क बस में नाहीं कइ सका

22एली बहोत बूढ़ा होइ गवा। उ बार बार ओन कुकर्म क बारे में सुनत रहा जउन ओकर पूत सीलो में सबहिं इस्त्राएलियन क संग करत रहेन। एली इ भी सुनेस कि जउन मेहरारू मिलापवाला तम्बू क दुआर प सेवकाई करत रहीं ओनके संग ओकर बेटवन सोवत रहेन।

23एली आपन बेटवन स कहेस, “तू पचे जउन कछू बुरा करम किहे अहा ओकरे बारे में मनइयन हिआँ मोका बताएन ह। तू पचे इ बुरा करम काहे करत ह? 24मोर बेटवन, इ बुरा करम क जिन करा। इ सबइ अच्छा नाहीं अहइ, यहोवा क लोग तोहरे बारे में अफवाह फैला रहत ह। 25अगर कउनो मनई कउनो दूसर मनई क खिलाफ पाप करत ह तउ यहोवा ओकर मदद करत ह। अगर कउनो मनई यहोवा क खिलाफ पाप करत ह तउ उ मनई क मदद कउन कइ सकत ह?”

मुला एली क बेटवन एली क बात सुनइ स इनकार कइ दिहन। एँह बरे यहोवा एली क बेटवन क मार डवइ क ठान लिहेस।

26लरिका समूएल बाढ़त रहा। उ परमेस्सर अउ मनइयन क खुस किहेस।

### एली क परिवार क बारे में खउफनाक भविस्सबाणी

27परमेस्सर क एक मनई एली क लगे आवा अउ कहेस, “यहोवा इ कहत ह, ‘तोहार पुरखन फिरौन क परिवार क गुलाम रहेन। मुला उ टेम में मई तोहरे पुरखन क समन्वा परगट भवा रहेउँ। 28मई तोहरे परिवार क इस्त्राएल क सबहिं परिवार समूहन में स चुनेउँ ह। मई तोहरे परिवार समूह क आपन याजकन बनवइ बरे चुनेउँ ह। मई ओनका आपन वेदी प बलि चढ़ावइ बरे चुनेउँ ह। मई ओनका धूप सुलगावइ अउ एपोद पहिरइ बरे चुनेउँ ह। मई तोहरे परिवार क भेंट क गोस दीन्ह ह जउन इस्त्राएल क मनई मोका चढ़ावत हीं। 29एँह बरे तू पचे ओन बलिदानन अउ अन्नबलि क मान काहे नाहीं करत्या? तू पचे आपन बेटवन क मोसे जिआद पिये करत ह। तू पचे गोस क बढ़िया हींसा खाइके मोटा होइ गवा ह जेका लोग मोका भेंट चढ़ात हीं।’

30“इस्त्राएल क परमेस्सर यहोवा इ बचन दिहे रहेन कि तोहरे बाप क परिवार सदा ओनकइ सेवकाई करिहीं। मुला अब यहोवा इ कहत हीं, “वइसा कबहुँ न होइ। मई ओन मनइयन क मान करब जउन मोर मान करिहीं। मुला ओनकइ

बुरा होइ जउन मोर मान करइ स इन्कार करत हीं। 31उ टेमें आवत अहइ जब मई तोहरे सन्तानन क नास करब। तोहरे बंस में कउनो बुढ़वा होइ बरे न बची। 32इस्त्राएल बरे नीक चीज होइहीं, मुला तू घरे में खराब घटना घटत देखब्या। कउनो मनई बुढ़वा होइ बरे न बची। 33सिरिफ एक मनई क आपन वेदी प याजक क नाई सेवा बरे बचाउब। उ बहोत जिआद बुढ़ाई तलक जिई। उ तब तक रही जब ताई ओकरे आँखिन क अउर ओकर सक्ती जात रही। तोहरे बचा खुचा सन्तानन तरवारे क घाट उतार दीन्ह जईहीं। 34मई तोहका एक चीन्हा देब जेहसे इ मालूम होइ कि बात फुर होइहीं। तोहार दुइनउँ पूत होफिन अउ फिनहस एक ही दिना मरिहीं। 35मई आपन बरे एक बिस्सासी याजक चुनब। उ याजक मोर बात मानी अउर जउन मई चाहब उ करी। मई इ याजक बरे परिवार क सक्तीवाला बनउब। उ हमेसा मोरे चुना भवा राजा क समन्वा सेवा करी। 36तब सबहिं मनइयन जउन तोहरे परिवारे में जिअत रइहीं, अइहीं अउ इ याजक क अगवा निहरिहीं। इ सब मनई तनिक धन स रोटी क टूका बरे भीख मँगिहीं। उ पचे कइहीं, “मेहरबानी कइके याजक क काम हमका दइ दया जेसे हम खइया क पाइ सकी।””

### परमेस्सर समूएल क बोलावत ह

3 लरिका समूएल एली क अधीन होइके यहोवा क सेवा करत रहा। ओन दिनन में यहोवा अक्सर लोगन स सीधा बात नाहीं करत रहा। अउर बहोत कम लोगन क दर्सन होत रहा।

2एली क आँख एँतनी कमजोर रही कि उ आँधर जइसा रहा। एक रात उ बिछौना प ओलरा रहा। 3समूएल यहोवा क पवित्त आराधनालय में बिस्तर प पउढा रहा। उ पवित्त आराधनालय में परमेस्सर क पवित्त सन्दूख रही। यहोवा क दिया अबहुँ जरत रहा। 4यहोवा समूएल क बोलाएस। समूएल जवाब दिहेस, “मई हिआँ हाजिर हउँ।” 5समूएल सोचा कि ओका एली बोलावत ह। एँह बरे समूएल दौड़त भवा एली क लगे गवा। समूएल एली स कहेस, “मई हिआँ हउँ। आप मोका बोलाएन ह।”

मुला एली कहेस, “मई तोहका नाहीं बोलाएउँ, आपन बिछौना प जा।”

समूएल बिछौना प गवा। 6यहोवा फुन बोलाएस, “समूएल।” समूएल फुन दौड़के एली क लगे गवा अउ कहेस, “मई हिआँ हउँ। आप मोका बोलाएन ह।”

एली कहेस, “मई तोहका नाहीं बोलाएउँ, आपन बिछौना प जा।”

7समूएल अबहिं तलक यहोवा क नाहीं जानत रहा। यहोवा अबहिं तलक ओसे सोझ बात नाहीं किहे रहा।\*

8यहोवा समूएल क तिसरी दाई बोलाएस। समूएल फिन उठा अउ एली क लगे गवा, “मई आवा हउँ, आप मोका बोलाएन ह।”

तबहिं एली समझेस कि यहोवा लरिका क बोलावत अहइ। 9एली समूएल स कहेस, “बिछौना प जा। अगर उ

**यहोवा ... रहा** यहोवा क संदेसा ओका नाहीं करियाइ गवा रहा।

तोहका फुन बोलावत ह तउ कहा, 'यहोवा मोर संग बात करा काहेकि मई आप सेवक हउँ अउ सुनत हउँ।'

तउ समूह बिछौना प चला गवा। 10 यहोवा आवा अउ हुवाँ खड़ा होइ गवा। उ पहिले क नाई बोलाएस। उ कहेस, "समूह, समूह!"

समूह कहेस, "कहा, मई आपक सेवक हउँ अउ सुनत हउँ।"

11 यहोवा समूह स कहेस, "मई इस्राएल में कछू करइ ही वाला हउँ जेकर बरे जब कबहुँ कउनो मनई सुनिहीं, इ ओकर कानन क चकित कइ देइहीं। 12 मई सब कछू करब। मई कहेउँ उ मई एली अउ ओकरे परिवार क खिलाफ करब। मई सुरु स आखिर तलक सब कछू करब। 13 मई एली स कहेउँ ह कि मई ओकरे परिवार बरे सदा सजा देब। मई इ ऐह बरे करब कि एली जानत ह कि ओकर बेटवन परमेस्सर क खिलाफ बुरा कहेन ह अउ किहेन ह। अउ एली ओन प बस में करइ बरे कामयाब नाहीं भवा। 14 इहइ कारण अहइ कि मई एली क परिवार बरे किरिया खायो हउँ कि बलिदान अउ अन्नबलि भेंट ओनकइ पापन क प्रायश्चित कबहुँ नाहीं कइ सकत हीं।

15 समूह जब तलक भिन्सार नाहीं भवा बिछौना प पउड़ा रहा। उ बड़े तड़के उठा अउ उ यहोवा क आराधनालय क किवाड़ा खोलेस। समूह आपन दरसन क बात एली स बतावइ में डेरन।"

16 मुला समूह स एली कहेस, "मोर बेटवा, समूह।"

समूह जवाब दिहेस, "हाँ, महोदय।"

17 एली पूछेस, "यहोवा तोहसे का कहेन? ओका मोसे जिन छिपावा। परमेस्सर तोहका सजा देइहीं, अगर तू परमेस्सर जउन संदेसा तोहका दिहेन ह, ओहमों स कछू भी छिपउव्या।

18 ऐह बरे परमेस्सर एली स उ हर एक बात बताएस। समूह एली स भी कछू नाहीं छिपाएस।

एली कहेस, "उ यहोवा अहइ। ओका वइसा ही करइ दया जइसा ओका नीक लागत ह।"

19 यहोवा समूह क संग रहा। समूह बाढ़त गवा। यहोवा समूह क कउनो संदेस क असफल नाहीं होइ दिहस। 20 तब समूह इस्राएल, दन स लइके वीरसेबा ताई समझ गवा कि समूह यहोवा क सच्चा धर्मदूत अहइ। 21 सीलो में यहोवा समूह क समन्वा परगट भएस। यहोवा सीलो में समूह क अगवा अपने आप क यहोवा क बचन\* क तरह परगट किहेस।

**4** समूह क बारे में खबर समूहइ इस्राएल में सँचर गइ। एली बहोत बुढ़ाइ गवा रहा। ओकर पूत यहोवा क समन्वा कुकरम करत रहेन।\*

**यहोवा क बचन** कबहुँ कबहुँ यहोवा क वचन क अरथ परमेस्सर क संदेस भी होत ह। मुला कबहुँ कबहुँ ओकर अरथ इ भी होत ह कि इ परमेस्सर क एक बिसेस प्रकार या रूप होत ह जेका उ उ समइ काम में लात ह जब उ आपन नबियन क संग बात करत ह।

**एलि बहोत ... रहेन** इ कथन पुराने ग्रीक अनुवाद में बा, मुला हिब्रू में नाहीं।

## पलिस्तियन इस्राएलियन क हराइ दिहेन

उ समइया इस्राएलियन पलिस्ती क खिलाफ जुद्ध बरे तइयार भएन। इस्राएलियन आपन डेरा एबेनेजर में डएन। पलिस्तियन आपन डेरा अपेक में डएन। 2 पलिस्ती इस्राएल प हमला बोलइ बरे तइयार भएन। जुद्ध सुरु होइ गवा।

पलिस्तियन इस्राएलियन क ओकर लगभग चार हजार मनइयन क जुद्ध क मइदान में मारि के ओका जुद्ध में हराएन। 3 इस्राएलियन क बाकी सिपाही आपन डेरा में लौटि आएन। इस्राएल क बुजुर्गन पूछेन, "यहोवा पलिस्तियन स हमका काहे हराइ दिहेन ह? आवा हम पचे सीलो स यहोवा क करार क सन्दूख क लइ आई। इ तरह परमेस्सर हम पचन क संग जुद्ध में जइहीं। उ पचे हमरे दुस्मनन स हमार रच्छा करिहीं।"

4 ऐह बरे लोग दूतन स करूब सरगदूतन क सिंहासन पइ विराजमान सैनिकन क यहोवा क करार क सन्दूख लिवाइ बरे सीलो पठएन। एली क दुइनउँ बेटवन होपनी अउ पीनहास सन्दूख क लइ आएन।

5 जबहिँ यहोवा क करार क सन्दूख डेरा क भीतर आवा तउ सारे इस्राएली ऐतने जोर स गरजेन कि उ अवाज स धरती काँप उठी। 6 पलिस्तियन इस्राएलियन क गरजब सुनेन। उ पचे पूछेन, "हिब्रू मनइयन क डेरा में अइसा गरजब काहे अहइ?"

तब पलिस्तियन जानेन कि इस्राएल क डेरा में यहोवा क करार क सन्दूख आवा अहइ। 7 पलिस्ती डेराइ गएन। पलिस्तियन कहेन, "परमेस्सर ओनकइ डेरा में आइ ग अहइँ। हम सबइ विपत्ती में अही। अइसा पहिले कबहुँ नाहीं भवा। 8 हमका फिकिर अहइ कि इ बरिआर देवतन स हमका कउन बचाइ सकत ह? इ सबइ उहइ देवता अहइ जउन मिस्त्रियन क उ सबइ बेरामियन अउर महामारियन दिहे रहा। 9 पलिस्तिनियो, हिम्मत करा। बहादुरन क तरह लड़ा। पुराने जमाने में हिब्रू लोग हमार दास रहेन। ऐह बरे बहादुरन क नाई लड़ा नाहीं तउ तू पचे ओनकइ गुलाम होइ जाव्या।"

10 पलिस्ती बहोत बहादुरी स लड़ेन अउ उ पचे इस्राएलियनक हराइ दिहेन। हर एक इस्राएली जोधा आपन डेरा में पराइ गवा। इस्राएल बरे खउफनाक हार रही। तीस हजार इस्राएली फौजी मारा गएन। 11 पलिस्तियन ओनसे परमेस्सर क पवितर सन्दूख छीन लिहेस। अउर उ पचे एली क दुइनउँ बेटवन होपनी अउ पीनहास क मार डएन।

12 उ दिना बिन्यामीन परिवार क एक मनई भी जुद्ध स परान रहा। उ आपन दुःख क परगट करइ बरे आपन ओढ़ना क फाड़ि डएस अउ आपन मुँडवा प धूरि दुःख परगट करइ बरे धइ लिहेस। 13 जब इ मनई सीलो पहुँचा तउ एली आपन कुर्सिया प नगर क दुआरे बइठा रहा। उ परमेस्सर क पवितर सन्दूख बरे परेसान रहा, ऐह बरे उ जोहत भवा बइठा रहा। तबहिँ बिन्यामीन क एकउटे परिवार क एक मनई सीलो आवा अउ उ दुःखे क हाल बताएस। सहर क सब मनई जोर स रोवइ लागेन। 14-15 एली अल्लाननब्बे बरिस क बूढ़ा अउ आँधर रहा। उ इ नाहीं लखि सका कि का होत बा? मुला एली रोवइ क अवाज सुनेस तउ एली पूछेस, "इ जोर क सोर काहे होत अहइ?"

उ बिन्यामीन परिवारे क मनई एली क लगे दौड़िके गवा अउ जउन कछू भवा रहा ओका बताएस। 16बिन्यामीन परिवार क मनई कहेस कि “मई आज जुद्ध स पराइ आएउँ ह।”

एली पूछेस, “बेटवा, का भवा?”

17बिन्यामीन परिवार क मनई जवाब दिहेस, “इस्त्राएलियन पलिस्तिथन क समन्वा पराइ गएन। इस्त्राएली फउज क ढेर सिपाही मारा गवा अहई। तोहार दुइनउँ पूत मारि डावा ग अहई। अउर पिलिस्ती परमेस्सर क पवितर सन्दूख छीन लिहेन ह।”

18एली दुआरे क नगिचे आपन कुर्सिया स पाछे गिर परेस अउ ओकर गटइ टूटि गएन जब उ परमेस्सर क पवितर सन्दूख क बारे जानेस। एली बुढ़वा अउ मोट मनइ रहा अउ उ हालि मरि गवा। एली चालीस बरिस तलक इस्त्राएल क नेता रहा।

### महिमा खतम भइ

19एली क पतोहू क फिनहस क मेहरारु, उ दिना कोख भरी रही। बच्चा पइदा होइ क उ निचकान रही। जब उ इ खबर सुनेस कि परमेस्सर क पवितर सन्दूख छीन लइ ग अहइ। उ इहउ सुनेस कि ओकरे ससुर एली क मउत होइ ग अहइ अउ ओकर भतार फिनहस मारि डावा ग अहइ। जइसे ही उ इ खबर सुनेस ओकर कोख पिराय लाग। अउर उ बच्चा बेटवा क जन्मब सुरु किहेस। 20उ मरइवाली रही। नउकरानी कहेस, “दुःखी जिन होवा, तोहका एक तु बेटवा जन्मी।”

मुला एली क पतोहू न तउ जवाब दिहेस अउर न ओह प धियान दिहेस।

21उ आपन बचवा क नाउँ इकबाद राखेस काहेकी “इस्त्राएल क महिमा मटियामेट होइ गइ। परमेस्सर क पवितर सन्दूख चला गवा अउ ओकर ससुर अउ मनसेधू मरि गवा रहेन। 22उ कहेस, “इस्त्राएल क महिमा मिट गइ।” काहेकि पलिस्ती परमेस्सर क पवितर सन्दूख लइ गएन।

### परमेस्सर क पवितर सन्दूख पलिस्ती क सतावत ह

5 पलिस्ती परमेस्सर क पवितर सन्दूख लिहे क पाछे, एबनेजेर स ओका उ पचे असदोद लइ गएन। 2पलिस्ती परमेस्सर क पवितर सन्दूख क दागोन क मन्दिर मँ लइ गएन। उ पचे परमेस्सर क पवितर सन्दूख क दागोन क बगल मँ धरेन। 3दुसरे दिन भिन्सारे असदोद क मनइयन उठेन अउ लखेन कि दागोन मुँह क बल ओलरा बा।

दागोन यहोवा क सन्दूख क समन्वा गिरइ पड़ा। असदोद क मनइयन दागोन क मूरति क फुन हुवई खड़ा कइ दिहेन। 4मुला जब दुसरे दिन भिन्सारे असदोद क मनई उठेन तउ उ पचे दागोन क फुन जमीन प ओलरा पाएन। दागोन फुन यहोवा क पवितर सन्दूखे क समन्वा गिरइ पड़ा। दागोन क हाथ अउ गोड़ टूट गवा रहेन अउ चौखट प पड़ा रहेन। सिरिफ दागोन क देह एक खण्ड मँ रहा। 5इहइ कारण बा कि आजु तलक दागोन क याजक या असदोद मँ दागोन क

मन्दिर मँ घुसइवाला दूसर मनई इयोदी प चलइ स मना कइ देत ह।

6यहोवा असदोद क मनइयन अउ ओनकइ पड़ोसियन क जिन्गी दूभर कइ दिहेन। यहोवा ओनका मुसीबत मँ डाइ दिहेन। उ ओन सबन्क गिलटी दिहेस। यहोवा ओनके लगे मूस पठएस। मूस ओनकइ सबहिं जहाजे अउ भुइयाँ प दौड़त रहेन। सहर मँ सब मनइयन डेराइ गएन। 7असदोद क मनइयन लखेन कि का होत अहइ। उ पचे कहेन, “इस्त्राएल क परमेस्सर क सन्दूख हिआँ नाहीं रहि सकत। परमेस्सर हमका अउ हमरे देवता दागोन क सजा देत बा।”

8असदोद क मनइयन पलिस्ती सासकन क बोलाएन। असदोद क मनइयन राजा लोगन स पूछेन, “हम पचे पवितर सन्दूख क का करी?”

राजा लोगन जवाब दिहेन, “इस्त्राएल क परमेस्सर क पवितर सन्दूख क गथ लइ जा।” एँह बरे पलिस्तिथन परमेस्सर क पवितर सन्दूख क हटाइ दिहेन।

9मुला जब पलिस्ती परमेस्सर क पवितर सन्दूख क गथ क पठइ दिहेन तब यहोवा उ सहर क सजा दिहेस। मनइयन बहोत डेराइ गएन। अउर परमेस्सर सहर क लोगन छोट स बड़ा सबइ क फड़ा-फुंसी क मसीबत मँ मुबतला कइ दिहेस। 10एँह बरे पलिस्ती परमेस्सर क पवितर सन्दूख क एकोन पठइ दिहेन। मुला जब परमेस्सर क पवितर सन्दूख एकोन आवा, एकोन क मनइयन सिकाइत किहेन। उ पचे कहेन, “तू पचे इस्त्राएल क परमेस्सर क पवितर सन्दूख हमरे सहर एकोन मँ काहे लइ आवत ह? का तू पचे हमरे मनइयन क मारा चाहत ह?”

11एकोन क मनइयन सबहिं पलिस्ती राजा लोगन्क एक संग बोलाएस। एकोन क मनइयन राजा लोगन्स कहेन, “इस्त्राएल क परमेस्सर सन्दूख क, ओकरे पहिले कि उ हमका अउ हमरे मनइयन क मारि डावइ, एकरे पहिले क ठउर प पठइ द्या।”

एकोन क मनइयन बहोत डेराइ ग रहेन। परमेस्सर उ ठउर प ओनकइ जिन्गी क बहोत दुःखमय बनइ दिहेस। 12बहोत स मनई तउ मर बिलाइ गएन। अउर जउन लोग नाहीं मरेन ओनका गिलटी निकरि आइ। एकोन क मनइयन जोर स रोइके अकास दहलाएन।

### परमेस्सर क पवितर सन्दूख घर लौटि आइ

6 पलिस्ती पवितर सन्दूख क आपन देस मँ सात महीना तलक धरेन। 2पलिस्तिथन आपन याजक अउ जादूगान्क बोलाएन। पलिस्तिथन कहेन, “हम यहोवा क सन्दूखे क का करी? बतावा कि हम कइसे सन्दूखे क वापिस एकरे घरे पठइ।”

याजकन अउ जादूगरन जवाब दिहेन, “अगर तू पचे इस्त्राएल क परमेस्सर क पवितर सन्दूखे क पठवत ह तउ एकोँ बिना दोखबलि चढ़ाए जिन पठवा। तोहका इस्त्राएल क परमेस्सर क दोख बलि चढ़ावइ चाही, ताकि तू पचे चंगा होब। तोहका इ एँह बरे करइ चाही कि जेहसे परमेस्सर तू सबन्क सजा देब बंद कइ देइ।”

4पलिस्ती पूछेन, “हम पचन्क कउन स भेंट, आपन क छिमा करइ क इस्त्राएल क परमेस्सर क पठवइ चाही?”

याजक अउ जादूगारन कहेन, “हिआँ पाँच पलिस्ती प्रमुख अहईँ। हर एक सहर क एक प्रमुख बा। तू सब मनइयन अउ तोहरे प्रमुखन क एक समस्या अहइ। एँह बरे तोहका पाँच सोना क अइसा नमूना जउन पाँच गिल्टियन क तरह होईँ देखावइ बरे बनवइ चाही। अउर पाँच नमूना मूसे क तरह देखावइ बरे बनवइ चाही। 5इ तरह गिल्टी अउर मूसे क नमूना बनावा जउन देस क मटियामेट करत अहईँ। इस्त्राएल क परमेस्सर क इ सोना क नमूना अदा करइ क रूप में दइ द्या। तब इ होइ सकत ह कि इस्त्राएल क परमेस्सर तोहका, तोहरे देवतन क अउर तोहरे देस क सजा देब रोक देईँ। 6फिरौन अउ मिस्री मनइयन क तरह जिद्दी न बना। परमेस्सर मिस्री मनइयन क सजा दिहेस। इहइ कारण रहा कि मिस्री मनइयन इस्त्राएलियन क मिस्र तजि देइ दिहेन।

7“तोहका एक नई बंद गाड़ी बनवइ चाही अउर दुइ गाइ जउन बछवा जन्मे होईँ लइ आवइ चाही। इ गइयन अइसी होइ चाही जउन खेते में न जोती गइ होईँ। गइयन क बन्द गाड़ी में जोत द्या अउ बछवन क घरे लौटाइ द्या। बछवन क गउसाला में राखा। ओनकइ आपन महतारी क पाछे न जाइ द्या।

8यहोवा क पवितर सन्दूखे क बंद गाड़ी में धरा। तोहका सोना क नमूनन क पेटी में सन्दूख क बगल में राखइ चाही। सोना क नमूनन परमेस्सर बरे तोहार दोखबलि अहइ। बंद गाड़ी क सोझइ रस्ता प पठवा। 9बंद गाड़ी क लखत रहा। जदि बंद गाड़ी बेतसेमेस कइँती इस्त्राएल क भुइयाँ में जात ह तउ इ संकेत अहइ कि ओकर परमेस्सर हम पचन्क इ बड़का रोग दिहे अहईँ। मुला जदि इ गइयन बेतसेमेस क नाहीं जातिन तउ हम पचे समझब कि इस्त्राएल क परमेस्सर हमका सजा नाहीं दिहे अहइ। हम समझ जाब कि हमार बेरामी खुद होइ गइ।” 10पलिस्तियन उहइ किहेन जउन याजक अउ जादूगारन कहेन। पलिस्तियन वइसी दुइ गइया लिहेन जउन हाली ही बछवा दिहे रहिन। पलिस्तियन गइयन क बंद गाड़ी स जोड़ दिहन। पलिस्तियन बछवन क घरे प गउसाला में राखेन। 11तब पलिस्तियन यहोवा क पवितर सन्दूख क उ पेटी क साथ जे में सोना क मूसा अउर फौड़ा क नमूना रहा बंद गाड़ी में धरेन। 12गइयन सोझइ बेतसेमेस क गइन। गइयन लगातार चोकड़त भइ सड़क पइ ही चलत रहिन। गइयन दाहिन बाएँ नाहीं मुड़िन। पलिस्ती राजा गइयन क पाछे बेतसेमेस क सहर क पहुँटा तलक गएन।

13बेतसेमेस क मनई घाटी में आपन गोहूँ क फसिल काटत रहेन। उ पचे निगाह उठाएन अउ पवितर सन्दूख क लखेन। उ पचे सन्दूखे क लखिके बहोत खुस भएन। उ सबइ ओका लेइ बरे दौड़ेन। 14बन्द गाड़ी उहइ खेत में आइ जउन बेतसेमेस क यहोसू क रहा। बन्द गाड़ी खेते में एक बहोत बड़की चट्टान क समन्वा रुक गइ। बेतसेमेस क मनइयन बन्द गाइयन क काट दिहन। तब उ पचे गाड़ी क मारि डएन। उ पचे यहोवा बरे गइयन क बलि दिहन।

15लेवी बंसी परिवार क मनइयन यहोवा क पवितर सन्दूखे क उतारेन। उ पचे उ पेटी क भी उतारेन जेहमा सोना क

नमूना धरा रहेन। लेवीबंसियन परिवार क मनइयन यहोवा क सन्दूख अउ पेटी क बड़की चट्टान प धरेन। उहइ दिना, बेतसेमेस क लोगन यहोवा बरे बलि चढ़ाएन।

16पाँचउ पलिस्ती राजा लोगन बेतसेमेस क मनइयन क इ सब करत लखेन। तबहिँ उ पचे पाँचउ पलिस्ती राजा लोग उहइ दिना एक्रोन लौटि गएन।

17इ तरह पलिस्तियन सोना क मिल्टियन क नमूना क दोखबलि क रूप में यहोवा क दिहेस। उ पचे हर एक तु पलिस्ती सहर बरे गिल्टी क एक सोना क नमूना पठएन। इ सबइ पलिस्ती सहर असदोद, अज्जा, असकालोन, गत अउ एक्रोन रहेन। 18अउर पलिस्तियन सोना क मूसा क नमूना पठएन। सोना क मूसन क उहइ गनती रही, जउन पाँचउ पलिस्ती राजा लोगन्क सहर क रही। इ सहरन क चारिहुँ कइँती चहरदेवार रही। अउ हर सहर क चारिहुँ कइँती गाँव रहेन। बेतसेमेस क मनइयन यहोवा क पवितर सन्दूख क चट्टान प धरेन। उ चट्टान आजु भी बेतसेमेस क जोसुआ क खेत में अहइ। 19मुला जउन टेमें बेतसेमेस क मनइयन यहोवा क पवितर सन्दूख क लखेन, उ समइया हुआँ कउनो याजकन नाहीं रहा। एँह बरे परमेस्सर बेतसेमेस क सत्तर मनइयन क मार डएन। बेतसेमेस क मनइयन रोवइ लागेन काहेकि यहोवा एँतनी कठोर सजा दिहेन। 20एँह बरे बेतसेमेस क मनइयन कहेन, “याजक कहाँ अहइ जउन इ पवितर सन्दूख क देखरेख कइ सकइ? हिआँ स सन्दूख कहाँ जाइ?”

21किर्यत्यारीम में एक याजक रहा। बेतसेमेस क मनइयन किर्यत्यारीम क मनइयन क लगे दूत पठएन। दूतन कहेन, “पलिस्तियन यहोवा क पवितर सन्दूख लौटाइ दिहन। आवा अउ एँका आपन सहर में लइ आवा।”

7 किर्यत्यारीम क मनइयन आएन अउ यहोवा क पवितर सन्दूख क लइ गएन। उ पचे यहोवा क सन्दूख क पहाड़ी प अबीनादब क घर लइ गएन। उ पचे अबीनादब क बटवा एलीआज़ार क यहोवा क सन्दूखे क रच्छा करइ बरे नियुक्त किहेन। 2सन्दूख किर्यत्यारीम में बहोत समइ तलक धरा रहा। उ हुवाँ बीस बरिस तलक रहा।

### यहोवा इस्त्राएलियन क रच्छा करत ह

इस्त्राएल क मनइयन यहोवा क कइँती लउटना सुरू किहेन। 3समूह इस्त्राएल क मनइयन स कहेस, “अगर तू फुरे यहोवा क नगिचे सच्चा मन स लौटत बाट्या तउ तोहका बिदेसी देवता लोगन्क बहाइ देइ चाही। तोहका अस्तोरेत क मूरत लोकाइ देइ चाही। अउ तोहका पूरी तरह यहोवा क अपने क न्यौछावर कइ देइ चाही। तोहका सिरिफ यहोवा क ही सेवा करइ चाही। तबहिँ यहोवा तोहका पलिस्तियन स बचइहीं।”

4एँह बरे इस्त्राएलियन आपन बाल अउ अस्तोरेत क मूरत क लोकाइ दिहेन। इस्त्राएलियन सिरिफ यहोवा क सेवकाई करइ लागेन।

5समूह कहेस, “सबहिँ इस्त्राएलियन मिस्या में बटुर जाईँ। मईँ तोहरे बरे यहोवा स पराथना करब।”

6इस्त्राएलियन मिस्या में बटुर गएन। उ सबइ जल लइ आएन अउ यहोवा क समन्वा जल चढ़ाएन। इ तरह उ पचे

उपवास क समइ सुरु किहेन। उ पचे उ दिन खइया क नाहीं खाएन, अउ आपन पापन्क कबूलेन। उ पचे कहेन, “हम पचे यहोवा क खिलाफ पाप किहे अही।” इ तरह समूएल मिस्या में इस्त्राएल क जज क तरह काम किहेस।

7पलिस्तिन इ सुनेन कि इस्त्राएलियन मिस्या में बटुर ग अहई। पलिस्ती राजा इस्त्राएलियन क खिलाफ हमला करइ गएन। इस्त्राएलियन सुनेन कि पलिस्ती आवत अहई, अउर उ पचे डेरइ गएन। 8इस्त्राएलियन समूएल स कहेन, “हमार परमेस्सर यहोवा क पराथना हमरे बरे करब बन्द जिन करा। यहोवा स माँगा कि उ पलिस्तिन स हमार रच्छा करइ।”

9समूएल एक तु मेमना लिहस। उ यहोवा बरे होमबलि क रुप में मेमना क बारेस। समूएल यहोवा स इस्त्राएल बरे पराथना किहेस अउर यहोवा ओका क जवाब दिहेस। 10जब समूएल बलि क बारत रहा, पलिस्ती इस्त्राएल स लइइ आएन। मुला यहोवा पलिस्तिन क नगिचे खूब जोर क गर्जब कराएस। ऐहसे पलिस्ती घबराइ गएन। अउ उ पचे गरजइ स ससाइ गएन। ओनकइ मुखिया ओनका बस में नाहीं कइ सकेन। इ तरह पलिस्तिन क इस्त्राएली जुद्ध में हराइ दिहेन। 11इस्त्राएल क मनइयन मिस्या स बाहेर भागेन अउ पलिस्तिन क पाछा किहेन। उ पचे लगातार बेत कर तलक ओनकइ पाछा किहेन। उ सबइ रस्ता भइ पलिस्ती सिपाही क मार डापन।

### इस्त्राएल में सान्ति आइ गइ

12एकरे पाछे, समूएल एक खास पाथर खइ किहेस। उ ऐह बरे किहेस कि मनइयन याद राखई कि परमेस्सर का किहेस। समूएल पाथर क मिस्या अउ सेन क बीच रखेस। समूएल पाथर क नाउँ “मदद क पाथर” धरेस। समूएल कहेस, “यहोवा लगातार पूरी रह भइ हमार मदद किहेस।”

13पलिस्ती हार गएन। उ पचे इस्त्राएल देस में फुन नाहीं घुसेन। समूएल क बाकी जिन्नगी में यहोवा पलिस्तिन क खिलाफ रहेन। 14पलिस्तिन एक्रोन स गथ तलक क पहुँटा क सहर क लइ लिहे रहेन। मुला इस्त्राएली ओनका जीतके फुन लइ लिहेन। अउर इस्त्राएली इ सहरन क चारिहुँ कइँती क भुईया क भी फुन लइ लिहेन।

इस्त्राएल अउ अमोरियन क बीच भी सान्ति रही।

15समूएल आपन पूरी जिन्नगी भइ इस्त्राएल क निआव करत रहेस। 16समूएल एक ठउर स दूसर ठउर ताई इस्त्राएल क मनइयन क निआव करत गवा। हर बरिस उ देस क चारिहुँ कइँती जात्रा किहेस। उ बेथेल, गिलिगाल अउ मिस्या क गवा। ऐह बरे उ इ सबहिँ ठउरन में इस्त्राएली मनइयन निआव अउ ओन पइ राज किहेस। 17मुला समूएल क घर रामा में रहा। ऐह बरे समूएल हमेसा रामा क लौट जात रहा। समूएल उहइ सहर स इस्त्राएल क निआव अउ राज किहेस। अउ समूएल रामा में यहोवा बरे एक वेदी बनाएन।

### इस्त्राएल एक राजा क माँग करत ह

8 जब समूएल बुढाइ गवा तउ उ आपन पूत न क इस्त्राएल क जज बनाएस। 2समूएल क पहिलौटी क बेटवा योएल नाउ क रहा। ओकर दूसर पूत अबिय्याह नाउँ

क रहा। योएल अउ अबिय्याह बेर्सेबा में जज रहेन। 3मुला समूएल क पूत वइसे ही नाहीं रहत रहेन जइसे उ रहत रहा। योएल अउ अबिय्याह घूस लेत रहेन। उपचे चुप्पे स घूस लेतेन अउ अदालत में आपन निर्णय बदल देत रहेन। उ पचे अदालत में मनइयन क उगत रहेन। 4ऐह बरे इस्त्राएल क सबहिँ बुजुर्गन मिलिके बटुर गएन। उ पचे समूएल स भेंटइ रामा गएन। 5बुजुर्गन लोग समूएल स कहेन, “तू बुढाइ गया, अउ तोहार पूत ठीक स नाहीं रहतेन। उ पचे तोहरे तरह नाहीं अहई। अब तू दूसर रास्ट्र क तरह हम सबन प राज करइ बरे एक राजा द्या।”

6इ तरह बुजुर्गन अपने क राह देखावइ बरे एक राजा मांगेन। समूएल सोचेस कि इ बिचार बुरा अहइ। ऐह बरे समूएल यहोवा क पराथना किहेस। 7यहोवा समूएल स कहेस, “उहइ करा जउन लोग तोहसे करइ क कहत हीं। उ पचे तोहका अस्वीकार नाहीं करत हीं। उ पचे मोका आपन राजा बनावन बरे अस्वीकार करत हीं। 8उ पचे उहइ करत अहई जउन हमेसा करत रहेन। मई ओन सबन्क मिस्र स बाहेर लइ आएउँ। मुला उ पचे मोका तजि दिहेन, अउर दूसर देवतन क पूजेन। उ पचे तोहरे संग भी वइसा करत अहई। 9ऐह बरे मनइयन क सुना अउर जउन उ पचे कहई करा। मुला ओनका चिताउनी द्या। ओनका बतावा कि राजा ओनकइ संग का करी। ओनकइ बतावा कि एक राजा मनइयन प कइसे राज करत ह।”

10उ पचे एक राजा बरे माँग किहेन। ऐह बरे समूएल मनइयन स उ सबइ बात किहेन जउन यहोवा कहे रहेन। 11समूएल कहेस, “अगर तू आपन पइ राज करइ वाला राजा राखत बाट्या तउ उ इ करी। उ तोहरे बेटवन क लइ लेइ। उ तोहरे बेटवन क सेवा बरे मजबूर करी। उ ओन पचन्क सिपाही बनवइ बरे मजबूर करी, ओन पचन्क ओकरे रथे स लइइ क पड़ी अउर उ पचे ओकरी फउज क घोइसवार होइहीं। तोहार पूत राजा क रथे क आगे धावइवाला रच्छक बनिहीं।

12“राजा तोहरे पूतन्क फौजी बनइ बरे मजबूर करी। ओहमाँ स कछू एक हजार मनई क ऊपर अफसर होइहीं। अउर दूसर, पचास मनई क ऊपर अफसर होइहीं।

“राजा तोहरे पूतन में स कछू क आपन खेत जोतइ क अउर फसिल काटइ क मजबूर करी। उ ओनका आपन रथे क सामान बनवइ बरे मजबूर करी।

13“एक राजा तोहरी बिटियन क लइ लेइ। उ तोहरी बिटियन में स कछू क आपन बरे महकउआ चीज बनवइ क मजबूर करी। अउर उ तोहरी बिटियन में स कछू क पकावइ अउ रोटी सेकइ क मजबूर करी। 14राजा तोहार सब स बढिया खेत, अंगूर क बाग अउर जैतून क बाग लइ लेई। उ ओन चीजन्क तोहसे लइ लेई अउर आपन अफसरन्क दइ देई। 15उ तोहार अन्न अउ अंगूर क दसवाँ हींसा लइ लेइ। उ इन चीजन्क आपन नउकरन अउ अफसरन्क दइ देइ।

16“इ राजा तोहरे मनसेधू नउकरन अउ नउकरनियन क लइ लेइ। उ तोहार सबन त बढिया गोरु अउ गधा क लइ लेइ। उ ओनकइ आपन कामे बरे बइपरी। 17उ तोहरे भेड़ी अउ बोकरी क दसवाँ हींसा लेई।

“अउर तू खुद इ राजा क दास होब्या। 18जब उ टेमें आई तब तू राजा क चुनइ क कारण रोउब्या। मुला उ टेमें यहोवा तू पचन्क जवाब न देइहीं।”

19मुला लोगन समूह क अनसुनि किहेन। उ पचे कहने, “नाहीं! हम पचे आपन ऊपर राज करइ बरे एक तु राजा चाहित ही। 20तब हम पचे दूसर रास्ट्रन क जइसा होइ जाब। हमार राजा हम पचन्क रास्ता देखीई। उ हम पचन्क संग जाइ अउर हमरे जुद्धन क लड़ी।”

21समूह जब मनइयन क सब कछू कहा भवा सुनेस तबहिं उ यहोवा क समन्वा ओनकइ कहब क दोहराएस। 22यहोवा उत्तर दिहेस, “ओनकइ बात सुना। ओनका एक राजा द्या।”

तबहिं समूह इस्त्राएल क मनइयन स कहेस, “ठीक बा! तोहार एक नवा राजा होइ। अबहिं आप सब लोग घरे जाईं।”

### साऊल आपन बाप क गदहन क हेरत ह

9 बिन्यामीन परिवार समूह स किस एक सक्तीसाली योद्धा रहा। किस अबीएल क पूत रहा। अबीएल ससोर क पूत रहा। सरोर बकारत क पूत रहा। बकारत बिन्यामीन क एक मनई अफिया क पूत रहा। 2कीस क पूत साऊल नाउँ क रहा। साऊल एक सुन्नर जवान रहा। हुवाँ साऊल स बढिके जिआब सुन्नर कउनो न रहा। ठाड़ होए प साऊल क मूँइ इस्त्राएल क कउनो भी मनई स ऊँच रहत रहा।

3एक दिना कीस क गदहन हेराइ गएन। एँह बरे कीस आपन पूत साऊल स कहेस, “नउकरन में स एक क संग लइ ल्या अउर गदहन क हेर इ जा।” 4साऊल गदहन क हेरब सुरु किहेस। साऊल एप्रैम क पहाड़ियन में होइके घूमा। तबहिं साऊल सालीम क चारिहुँ कइँती पहुँटा में घूमा। मुला साऊल अउ ओकर नउकर, किस क गदहन क नाहीं पाइ सकेन। एँह बरे साऊल अउ नउकर सालिम क चारिहुँ कइँती पहुँटा में गएन। मुला गदहा हुवाँ नाहीं मिलेन। एँह बरे साऊल बिन्यामीन क पहुँटा में होइके जात्रा किहेस। मुला उ अउ ओकर नउकर गदहन क तबहुँ नाहीं पाइ सकेन।

5आखिर में साऊल अउ ओकर नउकर जुफ नाउँ क सहर में आएन। साऊल आपन नउकर स कहेस, “चला, हम पचे लौटी। मोर बाप गदहा क बारे में सोचब बंद देइहीं अउर हम पचन क बारे में फिकिर करिहीं।”

6मुला नउकर जवाब दिहेस, “इ सहर में परमेस्सर क एक तु मनई अहइ। मनई ओकर मान करत हीं। उ जउन कहत ह सच होत ह। एँह बरे हम सबइ इ सहर में चली। अइसा लागत ह कि परमेस्सर क उ मनई हमका बताई कि एँकरे पाछे हम पचे कहीं जाइ।”

7साऊल आपन नउकर स कहेस, “हम पचे सहर में जाइ सकित ह। मुला हम पचे उ मनई का इ सकित ह? हम पचन क झोरी क भोजन खतम होइ ग बाटइ। हम पचन क लगे कउनो भी भेंट परमेस्सर क मनई क देइ बरे नाहीं अहइ। हमरे लगे ओका देइ क का अहइ?”

8नउकर फिन जवाब दिहेस, “सुना, मोरे लगे तनिक धन अहइ। हम परमेस्सर क मनई क इहइ देइ। तबहिं उ बताई कि हम पचे कहीं जाइ।”

9-11साऊल आपन नउकर स कहेस, “नीक सुझाव अहा, हम पचे चली।” उ पचे सहर में हुवाँ गएन जहाँ परमेस्सर क मनई रहा।

साऊल अउ ओकर नउकर पहड़िया प चढ़त भए सहर क जात रहेन। राहे में उ पचे कछू जवान अउरतन स भेंटेन। जवान अउरत बाहेर स पानी लेइ जात रहिन। साऊल अउ ओकर नउकर जवान अउरतन स पूछेन, “का दर्सी हीओँ अहइ?” (पुराने जमाना में इस्त्राएल क बसइया नबियन क “दर्सी” कहत रहेन। एँह बरे उ पचे परमेस्सर स कछू मागँइ चाहत रहेन तउ पचे कहत रहेन, “हम पचे दर्सी क लगे चली।”)

12जवान अउरतन जवाब दिहेन, “हाँ, दर्सी हीओँ अहइँ।” उ सोइइ इ सड़क प आगे अहइँ। उ आज ही नगर में आवा अहइँ। कछू मनइयन हुवाँ एकट्ठइ बटुरा अहइ। उ पचे आराधना ठउर प मेलबलि चढ़ावइ बरे जाइ। 13आप लोग सहर में जाईं अउ ओनसे भेंटाइ लेइहीं। जदि आप सब जल्दी जाइहीं तउ आप ओनसे आराधना ठउर प भोजन प जाइ स पहिले मिलि लेइहीं। दर्सी बलि-भेंट क आसीबाद देत हीं। एँह बरे मनइयन जब तलक खाइया क खाब सुरु नाहीं करिहीं जब ताई उ हुवाँ न पहाँच जाईं। एँह बरे आप सबइ हाली करईं तउ आप लोग दर्सी क भेंटि सकत हीं।”

14साऊल अउ नउकर ऊपर पहड़िया प सहर कइँती बढब सुरु किहेन। जइसे ही उ पचे सहर में घुसेन उ पचे समूह क आपन कइँती आवत देखेन। समूह सहर क बाहेर पूजा क ठउर प जाइ बरे अबहिं आवत रहा।

15एक दिन पहिले यहोवा समूह स कहेस, 16“काल्ह मई इहइ टेमें तोहरे लगे एक मनई क पठउब। वह बिन्यामीन क गोत क होइ। तू सबन क ओकर अभिसेक कर देइ चाही। तब उ हमार मनइयन इस्त्राएलियन क नवा नेता होइ। इ मनई हमरे मनइयन क पलिस्तिन स बचाइ। मई आपन मनइयन क दुःख क देखेउँ ह। मई आपन मनइयन क रोउब सुनेउ ह।”

17समूह साऊल क लखेस अउ यहोवा ओसे कहेस, “इहइ उ मनई अहइ जेकरे बारे में मई तोहसे कहेउँ रहे। इ मोरे मनइयन क बस में राखी।”

18साऊल दुआर क लगे समूह क निअरे आवा। साऊल समूह स पूछेस, “मेहरबानी कइके बतावा दर्सी क घर कहीं अहइ?”

19समूह जवाब दिहेस, “मई ही दर्सी अहँउ। मोरे अगवा आराधना क ठउर प पहुँचा। तू अउ तोहार नउकर आज हमरे संग खइया क खइहीं। मई भियान भिन्सारे तोहका घरे जाइ देब। मई तोहरे सबहिं सवालन क जवाब देब। 20अउर ओन गदहन क फिकिर जिन करा जेका तू तीन दिना पहिले खोइ दिहा ह। उ सब मिल गवा बाटेन। अब, तोहका समूचा इस्त्राएल चाहत अहइ। उ सबइ तोहका अउ तोहरे बाप क परिवारे क सब मनइयन क चाहत हीं।”

21साऊल जवाब दिहेस, “मुला मई बिन्यामीन परिवार समूह क निअम्बर अहउँ। इ इस्त्राएल में सबन क छोटका समूह अहइ। मोर परिवार मोर पूरा परिवार समूह में सब त

छोटा अहइ। आप काहे कहत बाटेन कि इस्राएल मोका चाहत ह?"

22तब समूएल साऊल अउ ओकरे नउकर क भोजन क जगहिया में लइ गवा। लगभग तीस न्यूताहरी एक संग भोजन बरे अउर बलि-भेंट लेइ बरे बोलावा ग रहेन। समूएल साऊल अउ ओकरे नउकर क मेज प सबन ते जिआदा खास जगह दिहेस। 23समूएल रसोइया स कहेस, "उ गोस लइ आवा जउन मई तोहका दिहेउँ ह। इ उहइ हीसा अहइ जेका मई तोहसे जोगइ क रक्खइ बरे केहउँ रहे।"

24रसोइया रान लिहेस अउ साऊल क समन्वा मेज प धरेस। समूएल कहेस, "इहइ उ गोस बा जेका मई तोहरे बरे जोगइ क रखेउँ रहे। ओका खा काहेकि इ इ खास टेमें बरे जोगावा रहा।" इ तरह उ दिना साऊल समूएल क संग खइया क खाएस।

25जबहिं उ पचे खइया क खाइ लिहेन, उ पचे पूजा क ठउर स उतरेन अउ सहर क लौटेन। समूएल छते प साऊल बरे बिछौना दसाएस। अउर साऊल सोइ गवा।

26भियन भिन्सारे समूएल साऊल क छते प जोर स पुकारेस। समूएल कहेस, "उठा। मई तोहका तोहरे रहे प पठउबा।" साऊल उठा, अउर तब समूएल क संग घर क बाहेर गवा।

27साऊल अउ ओकर नउकर संग संग सहर क सिरे क उतराई प टहरत रहेन। समूएल साऊल स कहेस, "आपन नउकर स हम पचन स अगवा जाइ क कहा। मोरे लगे तोहरे बरे परमेस्सर क एक संदेसा अहइ।" तउ नउकर ओन पचन स तनिक अगवा चला गवा।

### समूएल साऊल क अभिसेक करत ह

10 समूएल खास तेल क एक ठु मेटिया लिहेस। समूएल तेल क सौर क मूडे प नाएस। समूएल साऊल क चुम्मा लिहेस अउर कहेस, "यहोवा तोहार अभिसेक क चुनाव आपन मनइयन क मुखिया बनवइ बरे कहेस ह। तू यहोवा क मनइयन क बस में करब्या। तू ओन पचन्क ओन दुस्मनन स बचउब्या जउन ओनका चारिहूँ कइँती स घेरे बाटेन। यहोवा तोहार अभिसेक चुनाव आपन मनइयन क ऊपर प्रधान होइ बरे किहे अहइ। हियाँ एक चीन्हा अहइ जउन परमान देइ कि इ फुर बाटइ। 2जब तू मोसे अलगाइ जाब्या तउ तू रकेल क मकबरा क निअरे दुइ मनइयन स बिन्यामीन क इलाका में जल्जा में मिलब्या। उ दुइनउँ मनई तोहसे कहिहीं, 'जउन गदहन क तू हेरत बाट्या ओनका कउनो मनई पाइ लिहेस ह। तोहार बाप गदहन क बारे में फिकिर करब तजि दिहेस ह। अब ओका तोहार फिकिर बा। उ कहत अहइ, 'मई आपन पूत क बारे में का करउँ।'"

3समूएल कहेस, "जब तू तब्बइ तलक चलत रहब्या जब तलक तबोर में साह बलूत बृच्छ ताई नाहीं पहोंच जात्या। हुवाँ तोहसे तीन मनई मिलिहीं। उ तीनउँ मनई बेतेल में परमेस्सर क आराधना बरे जात्रा प होइहीं। एक ठु मनई बोकरी क तीन बच्चन क ढोवत होइ। दूसर मनई तीन डबल रोटी लइ जात होइ। अउ तीसरा मनई एक गगरी दाखरस

लइ जात होइ। 4इ तीनउँ मनई कहिहीं, आपक सुआगत अहइ। उ पचे तोहका दुइ रोटी देइहीं। तू ओनसे उ दुइ डबल रोटी क लइ लिहा। 5तब तू गिबियथ-एलोहिम जाब्या। उ ठउर प पलिस्तियन क एक ठु किला अहइ। जबहिं तू उ सहर में पहोंचब्या तउ कइउ नबियन निकरिहीं। इ नबियन आपन ठउर स पूजा बरे अइहीं। उ सबइ भविस्सबाणी करिहीं। उ सबइ सितार, तम्बूरा, बाँसुरी अउ बीणा बजावत रइहीं। 6तब तुरंतही यहोवा क आतिमा तेजी स तोह पइ उतरी। तू बदल जाब्या। तू एक अलगाइ मनई होइ जाब्या। तू इ नबी क संग भविस्सबाणी करइ लगब्या। 7इ बातन क होइ जाए क पाछे तू जउन चहब्या करब्या। परमेस्सर तोहरे संग होइहीं।

8"मोसे पहिले गिलगाल जा। मई तोहरे लगे उ ठउरे प आउबा। तब मई होमबलि अउ मेलबलि चढ़ाउबा। मुला तोहका सात दिना तलक प्रतीच्छा करइ क होइ। तबहिं मई आउब अउ बताउब कि तोहका अगवा का करइ क अहइ।"

### साऊल क नबी जइसा होब

9जइसे ही साऊल समूएल क विदाह देइ घूमा परमेस्सर साऊल क मन पूरी तरह बदल दिहस। इ सबहिं होनी उहइ दिन भइन। 10साऊल अउ ओकर नउकर गिबियथ-एलाहिम गएन। उ ठउर प साऊल नबियन क एक धार्मिक सभा स भेटेस। परमेस्सर क आतिमा साऊल प तेजी स उतरी अउ साऊल नबियन क संग भविस्सबाणी करइ लागेस। 11जउन मनइयन साऊल क पहिले स जानत रहेन उ पचे नबियन क संग ओका भविस्सबाणी करत लखेन। उ पचे आपुस में पूछइ-पछोरइ लागेन, "किस क पूत क का होइ ग अहइ? का साऊल नबियन में स एक अहइ।"

12एक मनई जउन गिबियथ-एलोहिम में रहत रहा कहेस, "हाँ, अउर अइसा लगत ह कि इ ओनकइ मुखिया अहइ।"\* इहइ कारण अहइ कि इ परसिद्ध कहतून बन गइ, "का साऊल नबियन में स कउनो एक अहइ।"

### साऊल घरे लौटत ह

13अखिर उ नबी क तरह भविस्सबाणी बंद किहेस अउर एक आराधना क ठउर प घर क नगिचे चला गवा 14साऊल क काका ओसे अउ ओकरे पिता क नउकर स पूछेस, "तू पचे कहाँ गवा रह्या?"

उ जवाब दिहेस, "हम पचे गदहन क लखइ गवा रहे अउ ओनकइ हेरइ चला ही जात रहे, उ सब कहूँ नाहीं मिल पाएन। एँह बरे हम पचे समूएल क लगे गएन।"

15इ सुनिके साऊल क काका कहेस, "कृपा कइके तू पचे मोका बतावा कि समूएल तू दुइनउँ स का कहेस?"

16साऊल जवाब दिहेस, "समूएल हमका बताएस, कि गदहन पहिले मिलि गवा रहेन।" साऊल काका क राजा होइ क बारे में कछू बात नाहीं बताएस।

हाँ ... मुखिया अहइ इ सब्द क अरथ अहइ "पिता।" अक्सर इ उहइ मनई होत रहा, जउन धरमदूतन क सिच्छा देत रहा अउर ओनकइ रह देखावत रहा। ओका "पिता" कहत रहेन।

**समूह साऊल क राजा होइ क बारे में डुगी पीटिस**

17समूह इस्त्राएल क सबहिं मनइयन स मिस्पा में यहोवा स मिलइ बरे एक संग बटुरइ बरे कहेस। 18समूह इस्त्राएल क मनइयन स कहेस, “इस्त्राएल क परमेस्सर यहोवा कहत हीं, ‘मई इस्त्राएल क मिस्त्र स बाहरे निकारेउँ ह। मई तोहका मिस्त्र क गुलामी स अउ दूसर राज्ज क गुलामी स बचाएउँ ह जउन तोह पइ चोट करइ चाहत रहेन।’ 19मुला आज तू आपन परमेस्सर क तुच्छ जान लिहा ह। तोहार परमेस्सर तोहका सब कस्टन अउ सब समस्या स बचावत ह। मुला तू कह्या, ‘नाहीं हम आपन ऊपर राज्ज करइ बरे एक तु राजा चाहित ह।’ अब आवा अउ यहोवा क समन्वा आपन परिवार अउ आपन गोत क संग खड़ा हवा।”

20समूह इस्त्राएल क सबहिं परिवार क गोते क निअरे लइ गवा। तब समूह नवा राजा चुनब सुरु कियेस। पहिले बिन्यामीन क परिवार गोत चुना गवा। 21समूह बिन्यामीन क परिवार-गोत क हर एक परिवार क एक एक कइके निकसइ क कहेस, मंत्री क परिवार चुना गवा। तब समूह मंत्री क परिवार क हर एक मनई क एक एक कइके ओकरे अगवा स निकसइ क कहेस। इ तरह कीस क पूत साऊल चुना गवा।

मुला जब मनइयन साऊल क खोज कियेन, तउ उ पचे ओका नाहीं पाइ सकेन। 22तब उ पचे यहोवा स पूछेन, “का साऊल अबहिं तलक हियाँ आइ गवा अहइ?”

यहोवा कहेस, “साऊल सामग्री क बीच में छुपा बा।”

23मनइयन दौडेन अउर साऊल क सामग्री क बीच में स लइ आएन। साऊल मनइयन क बीच खड़ा भवा। साऊल बस एतना लम्बा रहा कि सब मनइयन सिरिफ ओकरे काँध तलक रहेन।

24समूह सब मनइयन स कहेस, “उ मनई क लखा जेका यहोवा चुने अहइ। मनइयन में स कउनो साऊल क नाई नाहीं बा।”

तब मनइयन नारा लगाएन, “राजा क लम्बी उमर होइ।”

25समूह राज्ज क नेमें क मनइयन क समझाएस। उ इ नेमन क एक किताबे में लिखेस। उ किताबे क यहोवा क समन्वा रखेस। तब समूह मनइयन क घर जाइ बरे कहेस।

26साऊल भी आपन घरे गिबा में चला गवा। परमेस्सर बहादुर मनइयन का हिरदय क छुएस अउ बहादुर मनई साऊल क पाछा करइ लागेन। 27मुला कछू परीसानी पइदा करइवाला मनइयन कहेन, “इ मनई हम मनइयन क रच्छा कइसे कइ सकत ह?” उ पचे साऊल क बुराई अउ ओका उपहार देइ स मना कइ दिहेन। मुला साऊल कछू नाहीं कहेस।

**अम्मोनियन क राजा नाहास**

अम्मोनियन क राजा नाहास, गिलाद अउ याबेस क परिवार समूह क कस्ट देत रहा। नाहास ओनके परिवार क हर एक मनई क दाहिन आँखी निकरवाइ डिए रहा। नाहास कउनो क ओनकइ मदद नाहीं करइ देत रहा। अम्मोनियन क राजा नाहास यरदन नदी क पूरब में बसइयन क हर एक इस्त्राएली मनइयन क दाहिन आँखी निकरवाइ लिए रहा। मुला

सात हजार इस्त्राएली अम्मोनियन क हियाँ स पराइ गएन अउर याबेस गिलाद में आइ गएन।

**11** अउर अम्मोनी नाहास अउ ओकर फउज याबेस गिलाद क घेर लिहस। याबेस क सबहिं मनइयन नाहास स कहेस, “अगर तू हमरे संग मेल करब्या, तउ हम पचे तोहार सेवकन बन जाब।”

2मुला अम्मोनी नाहास स जवाब दिहेस, “मई तू पचन क संग तब मेल करब जब मई हर कउनो मनई क दाहिन आँखी निकारि लेब। एँहसे सबहिं इस्त्राएलियन लजाइ जइहीं।”

याबेस क बुजुर्गन नाहास स कहेन, “हम पचे सात दिना क टेमें लेब। हम समूह इस्त्राएल में दूत पठउब। जदि कउनो मदद बरे न आई तउ हम पचे तोहरे लगे आउब अउर आपन क अर्पण कइ देब।”

**साऊल याबेस गिलाद क रच्छा करत ह**

4तउ उ सबइ दूतन गिबा में आएन जहाँ साऊल रहत रहा। उ पचे मनइयन क खबर दिहेन। लोग जोर स रोवत रहेन। 5साऊल आपन गइयन क संग खेते गवा रहा। साऊल खेते स लौटा अउर उ मनइयन क रोउब सुनेस। साऊल पूछेस, “मनइयन क कस्ट अहइ? उ पचे काहे रोवत अहइ?”

तब मनइयन याबेस क दूतन जउन कहे रहेन साऊल क बताएन। 6साऊल ओनकइ बातन क सुनेस। तबइ परमेस्सर क आतिमा साऊल प बड़ी जल्दी स उतरी। साऊल जिआदा कोहाइ गवा। 7साऊल गाय क जोड़ी लिहेस अउ ओनकइ बोटी बोटी कइ डिएस। तब उ गइयन क बोटी क ओन दूतन क दिहस। उ दूतन क हुकुम दिहेस कि उ पचे इस्त्राएल क समूह देस में लइ जाई। उ ओनसे इस्त्राएल क मनइयन क इ संदेसा देइ बरे कहेस, “आवा, साऊल अउ समूह क अनुसरण करा। जदि कउनो मनई नाहीं आवत अउर ओकर मदद नाहीं करत तउ ओकरी गाय क संग इहइ होई।”

लोगन में यहोवा क डर छाइ गवा। उ पचे एक तु इकाई क तरह एक संग बटुर गएन। 8साऊल सबहिं मनइयन क बजक स एक संग बटोरेस। हुवाँ इस्त्राएल क तीन लाख मनसेधू अउ यहूदा स तीस हजार मनसेधू रहेन।

9साऊल अउ ओकर फउज याबेस क दूतन स कहेन, “गिलाद में याबेस क मनइयन स कहा कि भियान दुपहरे तलक तू पचन क रच्छा होइ जाइ।”

दूतन साऊल क संदेसा याबेस क मनइयन क दिहेन। याबेस क मनई बहोत खुस भएन। 10तबहिं याबेस क मनइयन अम्मोनी नाहास स कहेन, “हम पचे भियान तोहरे लगे आउब। तब तू हम सबन क संग जउन चाहा कइ सकत ह।”

11दूसर दिन भिन्सारे साऊल आपन फउज क तीन हींसा में बाँटेस। जइसे ही सूरज निकरत साऊल अउ ओकर फउज अम्मोनी डेरा में हमला कियेन। साऊल उ टेम में हमला कियेस, जब उ पचे भिन्सारे रच्छक क बदलत रहेन। साऊल अउ ओकर फउज दुपहर स पहिले ओनका हराइ दिहेन। अम्मोनी फउज अलग अलग दिसा में पराइ

गएन यहाँ तलक कि दुइ सिपाही भी एक संग नहीं जम सकेन।

12तब मनइयन समूएल स कहेन, “उ पचे कहाँ बाटेन जउन कहत हीं कि हम साऊल क राजा क रूप में हुकुम करइ देब नहीं चाहित? उ मनइयन क लइ आवा हम ओनका मारि डउब।”

13मुला साऊल कहेस, “नहीं आज कउनो क जीन मारा। आज यहोवा इस्त्राएल क रच्छा किहेस ह।”

14तब साऊल मनइयन स कहेस, “आवा हम पचे गिलगाल चली। हम पचे साऊल क राजा क तोर पर फुन अनुमोदन करब।”

15तउ सबहिं मनइयन गिलगाल चला गएन। हुवाँ यहोवा क समन्वा मनइयन साऊल क राजा बनाएन। उ पचे यहोवा क मेलबलि चढ़ाएन। अउर सबइ इस्त्राएलियन खुसी मनाएन।

### समूएल इस्त्राएलियन स बात करत ह

12 समूएल सब इस्त्राएलियन स कहेस: “मई उ सब कछू दिहेउँ ह जउन तू पचे मोसे चाहत ह। मई तू पचन क ऊपर एक राजा रखेउँ ह। 2अब तोहका राह देखावइ बरे एक राजा अहइ। मई बुढ़ाइ गवा हउँ अउ मोर बार सफेद होइ ग अहइँ, मुला मोरे बेटवा तोहरे संग अहइ। जब मई एक नन्ह लरिका रहेउँ तब स मई तोहार अगुआ रहेउँ। 3मई हियाँ अहउँ। जदि मई बुरा करम किए अहउँ तोहका ओकरे बारे में यहोवा स अउ ओनकइ चुना भवा राजा स कहइ चाही। का मई कबहुँ कउनो क गइया या गदहा चुरायो हउँ? का मई कउनो क कबहुँ धोखा दिहेउँ ह या नस्कान पटुँचयो हउँ? का मई कउनो का बुरा करइ बरे कबहुँ कउनो स धन या एक जोड़ी पनही लिहेउँ ह? जदि मई एहमाँ स कउनो बुरा काम किहेउँ ह तउ मई एँका नीक करब।”

4इस्त्राएलियन जवाब दिहेन, “नहीं, तू हम पचन क कबहुँ बुरा नहीं किहा। तू न हम पचनक ठग्या, न ही तू हम लोगन्स कबहुँ कछू लिह्या।” 5समूएल इस्त्राएलियन स कहेस, “जउन तू कह्या यहोवा ओकर गवाह अहइ। यहोवा क चुना भवा राजा भी आज गवाह अहइ। उ दुइनउँ गवाह अहइँ कि तू मोहे में कउनो दोख नहीं पाया।” अउर लोगन कहेन, “उ एक गवाह अहइ।”

6तब समूएल मनइयन स कहेस, “यहोवा लखेस ह कि का भवा ह। यहोवा उहइ अहइ जउन मूसा अउ हारुन क चुनेस ह। उ तोहरे पुरखन क मिस्त्र स बाहेर लइ आवा। 7अब चुपचाप हुवाँ खड़ा रहा जब मई तोहका नीक काम बताउब जउन यहोवा तोहरे पुरखन अउ तोहरे बरे किहेस ह।

8“याकूब मिस्त्र गवा। पाछे, मिस्त्र क लोग ओकरे औलाद क जिन्नगी कस्ट स भरि दिहेन। एँह बरे उ सबइ मदद बरे यहोवा क समन्वा रोएन। यहोवा मूसा अउ हारुन क पठएस। मूसा अउ हारुन तोहरे पुरखन क मिस्त्र स बाहेर लइ आपन अउर इ ठउर में बसइ बरे ओनका राह देखाएन।

9“मुला तोहार पुरखन, आपन यहोवा आपन परमेस्सर क बिसरि गएन। एँह बरे परमेस्सर ओनका सिसरा क गुलाम होइ दिहस। सिसरा, हजोर फउज क सेनापति रहा। तब

यहोवा ओनका पलिस्तियन अउ मोआब क राजा क गुलाम बनाएस। उ पचे सबइ तोहरे पुरखन क खिलाफ लड़ेन। 10मुला तोहार पुरखन मदद बरे यहोवा क समन्वा गिड़गिड़नेन। उ पचे कहेन, ‘हम पचे पाप किहे अही। हम सबइ यहोवा क तजा ह अउर झूठ देवता लोग-बाल अउ अस्तोरेत क सेवा कीन्ह ह। मुला अब आप हमका हमरे बैरी स बचावा, अउ हम आप क सेवा करब।’

11“एँह बरे यहोवा यरूबाल (गिदोन), बदान, बरक, यिप्तह अउ समूएल क हुवाँ पठएस। यहोवा तोहरे चारिहुँ कइँती क दुस्मनन स तोहार रच्छा किहेस। अउर तू बचा रह्या। 12मुला तब तू अम्मोनियन क राजा नाहास क आपन खिलाफ लइइ बरे आवत देख्या। तू कह्या, ‘नहीं! हमका आपन ऊपर राज्ज करइ बरे एक तु राजा चाही!’ तू पचे इहउ कह्या, हालाँकि तोहार परमेस्सर यहोवा राजा पहिले स ही रहेन। 13अब तोहार चुना भवा राजा हियाँ अहइ। यहोवा इ राजा क तोहरे ऊपर बइठाए अहइ। 14तू सबनक परमेस्सर स डेराइ अउ मान करइ चाही। तू पचनक ओकरे खिलाफ नहीं जाइ क चाही। तू पचन अउ राज करइ वाला राजा क आपन परमेस्सर यहोवा क हुकुम मानइ चाही। अगर तू पचे इ करत रहब्या तउ परमेस्सर तोहार रच्छा करिहीं। 15मुला अगर तू परमात्मा क आग्या क नहीं मन्त्या अउ ओकरे हुकुम क खिलाफ लइत बाद्या, तउ उ तोहरे खिलाफ होइ जाइ। यहोवा तोहका अउ तोहरे राजा क नास कइ देइहीं।

16“अब चुपचाप खड़ा रहा अउ उ बड़का काम क लखा जेका यहोवा तोहरी आँखी क समन्वा करिहीं। 17इ गोहूँ क फसिल काटइ क टेमें अहइ।\* मई यहोवा स पराथना करब। मई ओसे बिजुरी क कइकब अउ बर्खा क भीख माँगब। तब तू बुझब्या कि तू पचे ओ समइ प यहोवा क खिलाफ बुरा किहे रहा जब तू पचे एक राजा क माँग किहे रह्या।

18“तब समूएल यहोवा स पराथना किहेस। उ दिना यहोवा बिजुरी क कइकब अउ बर्खा पठएस। एँहसे यहोवा अउ समूएल स बहोत डेराइ गएन। 19सब मनइयन समूएल स कहेन, “आपन परमेस्सर यहोवा स तू पचे आपन सेवक, हम लोगन बरे पराथना करा। हम पचनक मरइ जिन द्या! हम पचे बहोत पाप किहे अही। अउर अब एक राजा बरे माँग कइके ओन पापनक अउर बढ़ाइ दिहा ह।”

20समूएल जवाब दिहस, “डेरा जिन। इ फुरइ अहइ। तू पचे उ सबइ कुकरम किहे ह। मुला यहोवा क पाछा करब बन्द जिन करा। आपन सच्चा हिरदय स यहोवा क सेवा करा। 21देवमूरत तउ मूरत अहइँ, उ सबइ तोहार मदद न करिहीं। एँह बरे ओनकइ पूजा जिन करा। देव मूरत न तउ तोहार मदद कइ सकत हीं, न ही रच्छा कइ सकत हीं। उ सबइ कछू भी नहीं अहइँ।

22“मुला यहोवा आपन मनइयन क तजिहीं नहीं। यहोवा तोहका आपन मनई बनाइके खुस भवा रहा। एँह बरे आपन नीक कामे क रच्छा बरे उ तोहका तजिहीं नहीं। 23जदि मई तोहरे बरे पराथना करब बंद कइ देत हउँ तउ इ यहोवा बरे

इ गोहूँ ... टेमें अहइ बरिस सूखा मौसम रहा अउ उ बिरिया बर्खा नहीं होत रही।

पाप होइ। मई तोहका सही रास्ता अच्छी जिन्नगी जिअइ बरे बताउब। 24मुला तोहका भी यहोवा क मान करइ चाही। तोहका पूरे हिरदय स यहोवा क सेवा सचर्चाइ स करइ चाही। ओन चमत्कारी कार्य क याद राखा जउन उ तोहरे बरे किहेस ह। 25अगर तू जिद्दी अहा अउ बुरा करत बाद्या तउ परमेस्सर तोहका अउ तोहरे राजा क अइसा फूँक देइ जइसे झाड़ू कूड़ा क बटोर देत ह।”

### साऊल पहली गलती करत ह

**13** अब ताई साऊल एक बरिस तलक राज कइ चुका रहा। अउर फुन जब साऊल इस्राएल प दुइ बरिस राज कइ चुका, 2उ इस्राएल स तीन हजार मनई चुनेस। ओहमों दुइ हजार उ पचे रहेन जउन बेतेल क पहाड़ी पहुँटा क मिकमास में ओकरे संग ठहरा रहेन। अउर एक हजार उ मनई रहेन जउन बिन्यामीन क अंदर गिबा में योनातान क संग ठहरा रहेन। साऊल फउज क दूसर सिपाहियन क ओनकइ आपन घर पठइ दिहस।

3योनातान गिब में जाइके पलिस्तियन क ओनकइ सिबिर पइ हमला किहस। पलिस्तियन एकरे बारे में सुनेन। उ पचे कहेन, “हिब्रू लोग बगावत किहे अहइ।”

साऊल कहेस, “हिब्रू मनइयन क जउन कछू भवा अहइ ओका सुनावा।” एँह बरे साऊल लोगन्स कहेस कि उ पचे समूचइ इस्राएल देस में तुरही बजावई। सबइ इस्राएलियन इ खबर सुनेन। उ पचे कहेन, “साऊल पलिस्ती फउज प्रमुख क मारि डाएस। अब पलिस्तियन फुरे इस्राएलियन स घिना करत हीं।”

इस्राएली लोगन्क साऊल स भेंटइ बरे गिलगाल में बोलावा गवा। 5पलिस्ती इस्राएल स लड़इ बरे बटुर गएन। पलिस्तियन क लगे तीन हजार रथ अउ छःहजार घुड़सवार ओकरे फउज में रहेन। हुवों ऐतना जिआदा पलिस्ती फउजी रहेन जेतना समुदर क किनारे बालू क कन। पलिस्तियन मिकमास में सिबिर डाएन। मिकमास बेतावेन क पूरब में बाटइ।

6इस्राएलियन लखेन कि उ पचे विपत्ति में अहइँ। उ पचे आपन क जालि में अरझा पाएन। उ पचे गुफा अउ चट्टान क खोदरे में छुप जाइ बरे परानेन। उ सबइ चट्टान, कुआँ अउ भुइयों क गड़हा में छुप गएन। 7कछू हिब्रू यरदन नदी पार कइके गाद अउ गिलाद प्रदेश में पराइ गएन। साऊल गिलगाल में रहा। ओकरी फउज क सबइ फउजी सिपाहियन डर स थरथरात रहेन।

8समूह कहेस कि उ साऊल स गिलगाल में मिली। साऊल हुवों सात दिनों तलक ओकर प्रतीच्छा किहस। मुला समूह तब भी गिलगाल नहीं पहुँचा। सिपाहियन साऊल क तजि देइ लागेन। 9एँह बरे साऊल कहेस, “मोरे बरे होमबलि अउ मेलबलि लइ आवा।” तब साऊल होमबलि चढ़ाएस। 10जइसन साऊल बलि-भेंट चढ़ाउब खतम किहेस, समूह आइ गवा। साऊल ओसे भेंटइ गवा।

11समूह पूछेस, “इ तू का कइ दिहे अहा?”

साऊल जवाब दिहस, “मई सिपाहिन क आपन क तजत लखा अउर तू तब तलक हियों नहीं रहया, अउर पलिस्ती

मिकमास में ऐकट्ठा होत रहेन।” 12मई आपन मने में सोचेउँ, ‘पलिस्ती हियों गिलगाल में आइके मोह प हमला करिहीं। अउर मई अबहुँ तलक यहोवा स मदद करइ बरे बिनती नहीं किहेउँ ह। एँह बरे मई आपन क दबाइ दिहेउँ अउ होमबलि चढ़ाएउँ।”

13समूह कहेस, “तू मूरख क काम किहे ह। तू आपन परमेस्सर यहोवा क हुकुम क नहीं मान्या। जदि तू परमेस्सर क हुकुम क माने होत्या तउ परमेस्सर तोहरे परिवार क सदा इस्राएल प राज करइ देत। 14मुला अब तोहार पहुँटा लगातार नाही रही। यहोवा अइसे मनई क खोज में रहेन जउन ओकरे हुकुम क मानइ चाहत होइ। उ उ मनई क पाइ लिहेस ह अउर उ ओका आपन मनइयन क नवा प्रमुख चुनिहीं। तू सबइ यहोवा क हुकुम क मान्या नहीं। एँह बरे यहोवा नवा प्रमुख चुनिहीं।”

15तब समूह उठा अउर उ गिलगाल क तजि दिहेस।”

### मिकमास क जुद्ध

साऊल अउ ओकर बची भइ फउज गिलगाल क तजि दिहेस। उ पचे बिन्यामीन में गिबा क गएन। साऊल उ मनइयन क गनेस जउन ओकरे संग रहेन। हुवों करीब छः सौ मनसेधू रहेन। 16साऊल, ओकर पूत योनातान अउ फउजी बिन्यामीन में गिबा क गएन।

पलिस्तियन मिकमास में डेरा डाएन। 17पलिस्तियन उ पहुँटा में रहइवालन इस्राएलियन क सजा देइ क ठान लिहेन। एँह बरे ओनकइ सबन्ते बरिआर फउज हमला करइ खातिर आपन ठउर तजि दिहेस। पलिस्ती फउज तीन हींसा में बँट गइ रहिन। एक टुकड़ी उत्तर में ओप्रा क जाइवाली सड़क स समूह क पहुँटा में गइ। 18दूसर टुकड़ी दक्खिन पूरब बेथोरोन क जाइवाली सड़के प गइ। अउ तीसर टुकड़ी पूरब में चौहद्दी तलक जाइवाली सड़क स गइ। इ सड़क सबोईम क घाटी में रेगिस्तान कइँती खुलत रही।

19इस्राएली मनइयन में स कउनो लोहा क सामान नहीं बनाइ सकत रहा। ओन दिन इस्राएल में लोहार नहीं रहेन। पलिस्ती इस्राएलियन क लोहा क सामान बनवइ नहीं सिखात रहेन काहेकि पलिस्ती डेरात रहेन कि इस्राएलियन कहुँ लोहा क तरवार अउ भाला न बनावइ लग जाई। 20सिरिफ पलिस्ती लोहा क औजार प धार चढ़ाइ सकत रहेन। एँह बरे जदि इस्राएली आपन हरे क फार कुदार अउ कुल्हाड़ी या दरती प धार चढ़ावइ चाहतेन तउ ओनका पलिस्तियन क लगे जाइ क पड़त रहा 21पलिस्ती लुहार एक तिहाइ औसे चाँदी क हरे क फार अउ कुदाल पइ धार चढ़ावइ बरे लेत रहेन। अउर एक छटा औस चाँदी क फरुआ, कुल्हाड़ी अउ बैल क साँटी क लोहा क सिरे प धार चढ़ावइ बरे लेत रहेन। 22एँह बरे जुद्ध क दिन इस्राएलियन फउजी में स कउनो क लगे लोहा क तरवार या भाला नहीं रहा। सिरिफ साऊल अउ ओकर पूत योनातान क लगे लोहा क औजार रहेन।

23पलिस्ती सिपाहियन क एक ठु टुकड़ी मिकमास क दर्ा क रच्छा करत रही।

### योनातान पलिस्तियन प हमला करत रहेन

**14** उ दिना, साऊल क पूत उ नउजवान स बात किहेस जउन ओकरे औजारन क लइके चलत रहा। योनातान कहेस, “हम पचे घाटी क दुसरी कईती पलिस्तियन क डेरा प चली।” मुला योनातान आपन बाप क नाहीं बताएस।

2साऊल एक अनार क पेड़ क नीचे पहाड़ी क सिरे प मिग्रोन मँ बइठा रहा। इ एक ठउर प खरिहान क नगिचे रहा। साऊल क संग उ समइ 600 जोधा रहेन। 3एक मनई क नाउँ अहिय्याह रहा। एली सीलो मँ यहोवा क याजक रहा। अब अहिय्या याजक रहा। अहिय्या अब एपोद याजक रहा। अहिय्या ईकाबोद क भाई अहीतूब क पूत रहा।

ईकाबोद पीनहास क पूत रहा। पीनहास एली क पूत रहा। 4दर्रा क दुइनउँ कईती एक तु बड़की चट्टान रही। योनातान पलिस्ती डेरा मँ उ दर्रा स जाइ क तजबीजेस। बड़की चट्टान क एक कईती बोजज रहा अउर उ बड़की चट्टान क दूसर कईती सेने रहा। 5एक बड़की चट्टान उत्तर क मिकमास क देखत भइ ठाड़ रही। दूसर बड़की चट्टान दक्खिन कईती गीबा क अउर लखत स ठाड़ रही।

6योनातान आपन उ जवान मददगार स कहेस जउन ओकरे औजार क ढोड़ के चलत रहा, “आवा, हम ओन बिदेसियन क डेरा मँ चली। इ होइ सकत ह यहोवा हम मनइयन क बइपरइ इ मनइयन क हरावइ मँ करइँ। यहोवा क कछू भी नाहीं रोक सकत ऐहसे कउनो फर्क नाहीं पड़त कि हमरे लगे ढेरि फउजी अहइँ कि तनिक फउजी।”

7योनातान क अउजार ढोवइया जवान ओसे कहेस, “जेका तू सब स नीक समझा, करा। मईँ हर कईती स तोहरे संग हउँ।”

8योनातान कहेस, “हम सबइ क चलि द्या! हम पचे घाटी पार करब अउर ओन पलिस्ती रच्छक तलक जाबइ। तबहीं हम सबइ ओनका आपन क लखइ देब। 9जदि उ पचे हम स कहत हीं, ‘तू हुवँइ रुकि जा जब तलक हम तोहरे लगे आवत अही।’ तउ हम पचे हुवँइ ठहरब जहाँ हम होब। हम ओनके नगिचे न जाब। 10मुला अगर पलिस्ती लोग इ कहत हीं, ‘हमरे लगे आवा’ तउ हम ओनकइ लगे ताई चढ़ जाब। काहे? काहेकि इ परमेस्सर कईती स इ एक इसारा होइ। ओकर अरथ इ होइ कि यहोवा हम पचन क ओनका हरावइ देइ।”

11ऐह बरे योनातान अउ ओकर सहायक आपन क पलिस्तियन स लखइ देइ दिहस। पलिस्ती रच्छक कहेन, “लखा, हिब्रू ओन बिलिन स निकरिके आवत बाटेन जेहमँ उ सबइ लुकान रहेन।”

12किला क पलिस्ती योनातान अउ ओकरे सहायक बरे चिचिआइँ “हमरे लगे आवा। हम तोहका अबहीं पाठ पढ़ावत अही।” योनातान आपन सहायक स कहेस, “पहाड़ी क ऊपर तलक मोका पछिआवा। यहोवा इस्राएल बरे पलिस्तियन क दइ दिहे बाटइ।”

13-14ऐह बरे योनातान आपन हाथ अउ गोड़ क पहाड़ी प चढ़इ बरे बइपरस। ओकर सहायक सोझ ओकरे पाछे चढ़ा। योनातान अउ ओकर सहायक पलिस्तियन क हराएन। पहिले

हमला मँ उ पचे लगभग आधा एकड़ पहँटा मँ पलिस्तियन क मारेन। योनातान उ मनइयन स लड़ा जउन समन्वा स हमला बोलत रहेन। अउ योनातान क सहायक ओनकइ पाछे आवा अउ ओन मनइयन क मारत चला गवा जउन अबहीं सिरिफ चोटाइ होइ ग रहेन।

15सबहिं पलिस्ती सिपाही जंग क मैदान मँ सिपाही अउ किला क सिपाही ससाइ गएन। हिउँ तलक कि सबन त बरिआर जोधा भी डेराइ गएन। धरती काँपइ लाग अउ पलिस्ती सिपाही भयानक तरीका स डेराइ गएन।

16साऊल क रच्छक बिन्यामीन देस मँ गिबिया क पलिस्ती सिपाहियन क अलग अलग दिसा मँ भागत परत लखेन। 17साऊल आपन संग क सेना स कहेस, “सिपाहियन क गनती करा। मईँ इ जानइ चाहत हउँ कि डेरा क कउन छोड़ि दिहस।” उ पचे सिपाहियन क गनेन। योनातान अउ ओकर सहायक चला ग रहेन।

18साऊल अहिय्या स कहेस, “परमेस्सर क पवित्तर सन्दूख लइ आवा।” उ टेमें परमेस्सर क पवित्तर सन्दूख इस्राएलियन क संग रही। 19साऊल याजक अहिय्या स बतियात रहा। साऊल परमेस्सर क परामर्स क जोहत रहा। मुला फिलिस्तीनी छावनी मँ सोर अउ धमाचउकड़ी लगातार बढ़त जात रही। साऊल धीरा खोइ चुका रहा। आखिर मँ साऊल याजक अहिय्या स कहेस, “बहोत होइ गवा। आपन हाथ नीचे हईँवा अउ पराथना करब बन्द करा।”

20साऊल आपन फउज क बटोरेस अउर लड़ाई मँ चला गवा। पलिस्ती सिपाही बहोत उलझन मँ रहेन। उ सबइ आपन तरवारे स आपुस मँ ही एक दूसर स जुद्ध करत रहेन। 21हुवँ हिब्रू भी रहेन जउन ऐकरे पहिले पलिस्तियन क सेवा मँ रहेन अउर जउन पलिस्ती डरा मँ रुका रहेन। मुला अब उ हिब्रू लोग साऊल अउ योनातान क संग क इस्राएलियन क साथ दिहेन। 22उ इस्राएलियन जउन एप्रेम क पहाड़ी देस मँ लुकान रहेन, पलिस्ती सिपाहियन क पराइ क बात सुनेन। तउ इ इस्राएलियन भी जुद्ध मँ साथ दिहेन अउ पलिस्तियन क पाछा करब सुरु किहेन।

23इ तरह यहोवा उहइ दिन इस्राएलियन क बचाव किहेन। जुद्ध बेतावेन क बाहेर फैलि गवा। सारी फउज साऊल क संग रही, ओनकइ लगे लगभग दस हजार मनइयन रहेन। एप्रेम क पहाड़ी पहँटा क हर सहर मँ जुद्ध फइलत गवा।\*

### साऊल दूसर गलती करत ह

24उ दिना साऊल एक भारी गलती किहेस।\* इस्राएलियन भुखान अउ थका मौँवा रहेन। इ ऐह बरे भवा कि साऊल मनइयन क प्रण करइ क मजबूर किहेस। साऊल कहेस, “अगर कउनो मनई सँझ होइ स पहिले खइया क खात ह या मोरे जरिया दुम्मन क हरावइ क पहिले खाइया क खात ह तउ उ मनई क सजा दीन्ह जाइ।” ऐह बरे कउनो भी इस्राएली सिपाही भोजन नाहीं किहेन।

**एप्रेम ... फइलत गवा** इ वाक्य पुरान ग्रीक अनुवाद मँ बाटइ, मुला हिब्रू मँ नाहीं बा।

**उ दिना ... किहेस** इ वाक्य पुरान ग्रीक अनुवाद मँ बाटइ, मुला हिब्रू मँ नाहीं बा।

25-26 जुद्ध क कारण मनई जंगल में चला गएन। उ पचे हुआँ भुईया प पड़ा भवा मधु क छत्ता लखेन। इस्त्राएली लोग उहइ ठउरे प आएन जहाँ मधु क छत्ता रहा। मनइयन भुखान रहेन, मुला उ पचे तनिक भी मधु नहीं पिएन। उ पचे उ प्रण तोड़इ स डेरान रहेन। 27 मुला योनातान उ प्रण क बारे में नहीं जानत रहा। योनातान इ नहीं सुने रहा कि ओकर बाप उ प्रण करइ क मनइयन क बेबस किहे रहा। योनातान क हाथे में एक टहरइ क छड़ी रही। उ मधु क छत्ता में ओकरे सिरा क घुसेड़ेस। उ तनिक मधु निकारेस अउ खाएस। अउर उ आपन क चंगा किहेस।

28 सिपाहियन में स एक ठु योनातान स कहेस, “तोहार बाप एक खास प्रण करइ बरे सिपाहियन क मजबूर किहेस ह। तोहार बाप कहेस ह कि जउन कउनो आज खाइ, सजा पाइ। इहइ कारण रहा कि मनई कछू खाएन नहीं। इहइ कारण अहइ कि मनई कमजोर अहइ।”

29 योनातान कहेस, “मोर बाप धरती बरे परोसानी पइदा किहे अहइ। लखा इ तनिक मधु चाटे स मई केतना चंगा महसूस करत हउँ। 30 बहोत नीक होत कि मनइयन उ खइया क खातेन जउन उ पचे आजु दुस्मन स लिहे अहइँ। हम बहोत जिआदा पलिस्ती मनइयन क मारि सकित रहे।”

31 उ दिना इस्त्राएलियन पलिस्ती मनइयन क हराएन। उ पचे ओनसे मिक्मास स अय्यालोन तलक क पूरा रस्ता प लड़ेन। काहेकी मनइयन बहोत भुखान अउ थका मौँवा रहेन। 32 उ पचे पलिस्ती स भेड़ी, गाइ अउ बछवा लिहे रहेन, काहेकि अब इस्त्राएल क मनइयन ऐतना भुखान रहेन कि उ सबइ पसु क भुईया प मारि ड्राएन अउ ओनका गोस रकत क साथ खाइ लिहेन।

33 एक मनई साऊल स कहेस, “लखा! लोग यहोवा क खिलाफ पाप करत अहइँ। उ पचे अइसा गोस खात अहइँ जेहमों खून बा!”

तब साऊल कहेस, “तू पचे पाप किहे अहा। हिआँ एक ठु बड़का पाथर टहराइ क लिआवा।”

34 तब साऊल कहेस, “मनइयन क लगे जा अउर कहा कि हर मनई आपन साँड़ अउ भेड़ी मोरे लगे हिआँ लिआवइ। तबहिँ मनइयन क आपन साँड़ अउ भेड़ी हिआँ मारइ चाही। यहोवा क खिलाफ पाप जिन करा। उ गोस क जिन खा जेहमों रकत बा।”

उ राति में हर मनई आपन गोरु क लइ आवा अउ ओनका हुवाँ मारेस, 35 फिन साऊल एक ठु वेदी बनएस। साऊल यहोवा बरे खुद इ वेदी बनउब सुरु किहेस।

36 साऊल कहेस, “हम पचे आजु रात क पलिस्तियन क पाछा करब। हम सबइ हर चीज क लइ लेब। हम ओन सब क मारि डाउब।”

फउज जवाब दिहेस, “वइसा ही करा जइसा ठीक समुझत ह।”

मुला याजक कहेस, “हमका परमेस्सर स पूछइ द्या।”

37 एह बरे साऊल परमेस्सर स पूछेस, “का मोका पलिस्तियन क पाछा करइ चाही? का आप लोग हम पचन क पलिस्तियन क हरावइ देइहीं?” मुला परमेस्सर साऊल क उ दिन जवाब नहीं दिहेस।

38 एह बरे साऊल कहेस, “मोरे लगे सबहिँ प्रमुखन क लइ आवा। हम सबइ मालूम करी कि आज कउन पाप किहेस ह। 39 मई इस्त्राएल क रच्छा करइवाला यहोवा क किरिया खाइके इ प्रण करत हउँ। यदि मोर आपन पूत योनातान भी पाप किहेस ह तउ उ जरुर मरी।” फउज में कउनो भी कछू नहीं कहेस।

40 तब साऊल सबहिँ इस्त्राएलियन स कहेस, “आप लोग इ कइँती खड़ा हवा। मई अउर मोर पूत योनातान दूसर कइँती खड़ा होइहीं।”

सिपाहियन जवाब दिहेन, “महाराज, आप जइसा चाहईं।”

41 तब साऊल पराथना किहेस, “इस्त्राएल क परमेस्सर यहोवा मई आपका सेवक हउँ आजु आप मोका जवाब काहे नहीं देत अहइँ? अगर मई या मोर पूत योनातान पाप किहेस ह तउ इस्त्राएल क परमेस्सर यहोवा आप उरीम देईं। अउर यदि आप क मनई इस्त्राएलियन पाप किहेन ह तउ तुम्मिम देईं।”

साऊल अउ योनातान चुनि लीन्ह गएन अउ मनइयन अजाद होइ गएन। 42 साऊल कहेस, “ओनका फिन स लोकाइ द्या कि कउन पाप करइवाला अहइ मई या मोर पूत योनातान।” योनातान चुनि लीन्ह गवा।

43 साऊल योनातान स कहेस, “मोका बतावा कि तू का किहे अहा?”

योनातान साऊल स कहेस, “मई आपन कुबरी क नोंक स सिरिफ तनिक मधु चाटे रहे। का मोका उ करइ क कारण मरइ चाही?”

44 साऊल कहेस, “जदि मई आपन प्रण पूर नहीं करत हउँ तउ परमेस्सर मोरे बरे बहोत खराब करइ। योनातान क मरइ चाही।”

45 मुला सिपाहियन साऊल स कहेन, “योनातान आज इस्त्राएल क बड़की जीत ताई पहोंचाएस। का योनातान क मरइ ही चाही? कबहुँ नहीं। हम पचे परमेस्सर क किरिया खाइके बचन देइत ह कि योनातान क एक ठु बार भी बाँका नहीं होइ। परमेस्सर आज पलिस्तियन क खिलाफ लड़इ में योनातान क मदद किहेस ह।” इ तरह मनइयन योनातान क बचाएस। ओका फाँसी क सजा नहीं दिन्ह गइ।

46 साऊल पलिस्तियन क पाछा नहीं किहेस। पलिस्ती आपन ठउर क लौटि गएन।

### साऊल क इस्त्राएल क दुस्मन स जुद्ध

47 साऊल इस्त्राएल प पूरा कब्जा कइ लिहेस अउ देखाइ दिहस कि उ राजा अहइ। साऊल इस्त्राएल क चारिहुँ कइँती रहइवालन दुस्मन स लड़ा। साऊल अम्मोनी राजा मोआबी, सोबा क राजा एदोम, अउ पलिस्तियन स लड़ा। जहाँ कहुँ साऊल गवा, उ इस्त्राएल क दुस्मनन क हराइ दिहस। 48 साऊल बहोतइ बहादुर रहा। साऊल अमालेकियन क हराई अउर इस्त्राएलियन क ओकरे ओन दुस्मनन स बचाएस जउन इस्त्राएल क मनइयन स ओकर धन-दौलत छोड़ि चाहत रहेन।

49 साऊल क पूत रहेन योनातान, यिसवी अउ मलकीस। साऊल क बड़की बितिया क नाउँ मेरब रहा। साऊल क ननकी बितिया क नाउँ मीकल रहा। 50 साऊल क मेहरारु क नाउँ अहीनोअम रहा। अहीनोअम अहीमास क बितिया रही।

साऊल क फउज क सेनापति क नाउँ अब्नेर रहा, जउन नेर क पूत रहा। नेर साऊल क काका रहा। 51साऊल क बाप कीस अउ अब्नेर क बाप नेर, अबीएल क पूत रहेन।

52साऊल आपन जिन्नगी भइ बीर बना रहा अउ पलिस्तिन क खिलाफ बहादुरी स लड़ा। साऊल जब भी कबहुँ कउनो मनई क अइसा बहादुर लखत जउन ताकतवर होत तउ उ ओका लइ लेत अउर ओका उ फौजियन क टुकड़ी में धरत जउन ओकरे निअरे रहतेन अउर ओकर रच्छा करत रहेन।

### साऊल क अमालेकियन क नास करब

**15** एक दिन समूएल साऊल स कहेस, “यहोवा मोका आपन इस्त्राएली लोगन प राजा क रूप में तोहार अभिसेक करइ पठाए रहा। अब यहोवा क संदेस सुना। 2सर्वसक्तीमान यहोवा कहत ह: ‘जब इस्त्राएलियन मिस्त्र स बाहरे आएन तबहिं अमालेकियन ओनका कनान पहुँचइ स रोक देइ क जतन किहेन। मई लखेउँ कि अमालेकियन ओनका का किहेन। 3अब आवा अउ अमालेकियन स जुद्ध करा। तोहका अमालेकियन अउ ओनकी सबहिं चीजन क नास कइ देइ चाही। कछू भी जिन्दा न रहइ द्या, तोहका सबहिं मनसेधू अउ मेहररुअन क मार डवइ चाही। तोहका सबहिं गदेलन अउ बचवन क मारि डवइ चाही। तोहका ओनकइ सबहिं गइयन अउ भेड़िन अउर ऊँट अउ गदहन क मारि डवइ चाही।”

4साऊल तलाईम में फउज बटोरेस अउर ओहका गनती किहेस। ओहमाँ दुइ लाख पैदर सिपाही अउ दस हजार दूसर फउजी मनई रहेन। एहमाँ यहूदा क मनई भी मिला रहेन। 5तब साऊल अमालेक सहर क गवा अउर उ पचे घाटी में ओनका प्रतीच्छा किहस। 6साऊल केनियन मनइयन स कहेस, “चला जा अउ अमालेकियन क तजि द्या। तब मई तू पचन क अमालेकियन क संग नास नाहीं करब। तू पचे इस्त्राएल बरे दया देखाए रह्या जब उ पचे मिस्त्र स आवा रहेन।” एँह बरे केनीत मनइयन अमालेकियन क तजि दिहेन। 7साऊल अमालेकियन क हराएस। उ ओनसे हविला स मिस्त्र क सीमा सुर तलक लगातार जुद्ध किहेस। 8साऊल अगाग क जिन्दा धइ लिहस। अगाग अमालेकियन क राजा रहा। अगाग क फउज क सबहिं मनइयन क साऊल मारि डवएस। 9मुला साऊल अउ इस्त्राएल क सिपाहियन अगाग क जिन्दा रहइ दिहेन। उ पचे सब ते बढ़िया भेड़ी, मोटवार तगड़ी गाइ अउ मेमना क भी धइ लिहेन। उ पचे धरइ क जोगग सबहिं चीजन क धइ लिहेन। अउर उ पचे ओन सबहिं चीजन क नास कइ दिहेन जउन कउनो काम क न रहिन।

### समूएल साऊल क ओकरे पाप क बारे में बताउब

10समूएल यहोवा क संदेसा पाएस। 11यहोवा कहेस, “साऊल मोर पाछा करब तजि दिहेस ह। एँह बरे मोका ऐँकर दुःख बा कि मई ओका राजा बनएउँ ह। उ ओन काम-काज क नाहीं करत बाटइ जेका करइ क हुकुम मई ओका देत हउँ।” समूएल कोहाइ गवा अउ फिन उ राति भइ यहोवा क पराथना किहेस।

12समूएल दूसर दिना बड़े तड़के उठा अउ साऊल स भेंटइ गवा। मुला मनइयन बताएन, “साऊल यहूदा में कर्मल नाउँ सहर क गवा बा। साऊल हुवाँ आपन मान-सम्मान में एक पाथर क स्मारक बनावइ ग रहा। तब साऊल कइउ ठउरन क जात्रा किहेस अउ आखिर में गिलगाल क चला गवा।”

एँह बरे समूएल हुवाँ गवा जहाँ साऊल रहा। साउल अमालेकियन स लीन्ह भइ चिजियन क पहिला हीसा भेंटे में चढ़ाए रहा।\* साऊल ओनका होमबलि यहोवा क भेंट चढ़ावत रहा। 13समूएल साऊल क लगे पहुँचा। साऊल कहेस, “सुआगत, यहोवा तोहका आसीर्वाद देइ, मई यहोवा क हुकुम क मानेउँ ह।”

14मुला समूएल कहेस, “तउ मई इ सब कउने आवाजन क सुनत हउँ? मई तउ भेड़ी अउ गोरु क आवाजे क काहे सुनत हउँ?”

15साऊल जवाब दिहेस, “फउजी ओनका अमालेकियन स लिहेन ह। फउजी सबन ते उत्तिम भेड़ी अउ गोरु क तोहरे परमेस्सर यहोवा क बलि क तरह बारइ बरे बचाइ लिहेन ह। मुला हम पचे दूसर सबहिं चिजियन क नसाइ दिहेउँ ह।”

16समूएल साऊल स कहेस, “रुकि जा! मोका तोहसे हुवँइ कहइ द्या जेका पिछली राति में यहोवा मोसे कहे रहा।”

साऊल जवाब दिहेस, “मोका बतावा।”

17समूएल कहेस, “बीता भवा टेमें में तू इ बिचारे रह्या कि तू खास मनई न बाट्या। मुला तबहुँ तू इस्त्राएल क परिवार समूह क मुखिया बन गया। यहोवा तोहका इस्त्राएल क राजा चुनेस ह। 18यहोवा तोहका एक खास सेवा काम बरे पठाएस ह। यहोवा कहेस, ‘जा अउर ओन सबहिं खराब अमालेकियन क नास कइ द्या। ओनसे तब तलक लड़त रहा जब तलक उ सबन क नास न होइ जाइ।’ 19मुला तू पचे यहोवा क नाहीं सुन्या। तू पचे ओन चिजियन क धरइ चाहत बाट्या। एँह बरे तू उहइ किह्या जेका यहोवा खराब कहे रहा।”

20साऊल कहेस, “मुला मई तउ यहोवा क हुकुम क पालन किहेउँ ह। मई हुवाँ गएँ जहाँ यहोवा मोका पठाएस। मई सबहिं अमालेकियन क नास किहेउँ ह। मई सिरिफ एक मनई क लइ आएँ ह। ओनकइ राजा अगाग। 21फउजी जवान सबन त उत्तिम भेड़ी अउ गोरु क गिलगाल में तोहरे परमेस्सर यहोवा क बलि देइ बरे चुने रहेन।”

22मुला समूएल जवाब दिहेस, “यहोवा क इ दुइनउँ में स कउन जिआदा खुस करत होमबलि अउ बलिदान या कि मनइयन क जरिए आग्या क मानब? इ जिआदा नीक अहइ कि परमेस्सर क बात सुनि लीन्ह जाइ बजाय ऐँकरे कि भेड़ा क चर्बी चढ़ाइ जाइ। 23आग्या क मानइ स इन्कार करब जादूगरी करइ क पाप जइसा अहइ। जिद्दी होब अउर मनमानी करब-मूरत क पूजब जइसा पाप अहइ। तू पचे यहोवा क हुकुम मानइ स इन्कार किहा ह। इहइ कारण

साऊल ... चढ़ाए रहा इ पुरान ग्रीक अनुवाद में बाटइ। इ हिब्रू मानक पाठ में नाहीं बा।

यहोवा अब तोहका राजा क रूप में अंगीकार करइ स इन्कार करत ह।”

24तबहिं साऊल समूएल स कहेस, “मई पाप किहेउँ ह। मई यहोवा क हुकुम क नहीं मानेउँ ह अउर मई उ नहीं किहेउँ ह जउन तू करइ बरे कह्या ह। मई मनइयन स डेरत हउँ एँह बरे मई उहइ किहेउ जउन उ सबइ कहेन। 25अब मई पराथना करत हउँ कि मोरे पाप क छिमा करा। मोरे संग लौटि आवा जेहसे मई यहोवा क आराधना कइ सकउँ।”

26मुला समूएल साऊल स कहेस, “मई तोहरे संग न लउटब। तू पचे यहोवा क हुकुम क नहीं मान्या ह अउर अब यहोवा तोहका इस्त्राएल क राजा क रूप में नकारत बाटइ।”

27जब समूएल ओका बिदा करइ बरे मुड़ि गवा, साऊल समूएल क लबादे क धइ लिहेस। लबादा फाटि गवा। 28समूएल साऊल स कहेस, “तू मोरे लबादा का फारि डया ह। इहइ तरह यहोवा आज इस्त्राएल क राज्ज क तोहसे फारि डाएस ह। यहोवा राज्ज क तोहरे मीतन में स एक क दइ दिहेस ह। उ मनई तोहसे नीक बाटइ। 29यहोवा इस्त्राएल क परमेस्सर अहइ। यहोवा हमेसा रहत ह। यहोवा लबार बोलत नहीं अउर न ही आपन इरादा बदल देत ह। यहोवा मनइयन क नाई नहीं जउन आपन पक्का बिचार बगदाइ देत ह।”

30साऊल जवाब दिहेस ह, “ठीक बा, मई पाप किहेउँ ह। मुला कृपा कइके मोरे संग लउटा। इस्त्राएल क मनइयन अउ नेता लोगन क समन्वा कछू मान द्या। मोरे संग लउटि आवा जेहसे मई तोहरे यहोवा परमेस्सर क आराधना कइ सकउँ।” 31समूएल साऊल क संग लउटि गवा अउ साऊल यहोवा क आराधना किहेस।

32समूएल कहेस, “अमालेकियन क राजा अगाग क मोरे लगे लइ आवा।” अगाग समूएल क समन्वा आवा।

अगाग जंजीरे में बाँधा रहा। अगाग सोचेस, “फुरइ इ मोका मारी नहीं।”

33मुला समूएल अगाग स कहेस, “तोहार तरवारि गदेलन क ओनकइ महतारी स छीनि लिहेस। एँह बरे अब तोहरी महतारी क कउनो लरिका न रही।” अउर समूएल गिलगाल में यहोवा क समन्वा अगाग क बोटी बोटी कइ डाएस।

34तब समूएल हुवाँ स चला अउ रामा पहोँचा। अउर साऊल आपन घर गिबिया क गवा। 35ओकरे पाछे समूएल आपन पूरी जिन्नगी साऊल क नहीं लखेस। समूएल साऊल बरे बहोत दुःखी रहा। अउर यहोवा क बहोत दुःख भवा कि उ पचे साऊल क इस्त्राएल क राजा बनएन।

### समूएल क बेतलेहेम जाब

16 यहोवा समूएल स कहेस, “तू कब ताई साऊल बरे दुःखी रहब्या? मई तोहका बताइ दिहेउँ ह कि साऊल इस्त्राएल क राजा न होइ तउ भी तू पछतात बाट्या। आपन सींग में तेल भरा अउ चल पड़ा। मई तोहका यिसै नाउँ क मनई क लगे पठवत हउँ। यिसै बेतलेहेम में रहत ह। मई ओकरे पूतन में स एक क नवा राजा चुनेउँ ह।”

2मुला समूएल कहेस, “जदि मई जाउँ तउ साऊल इ खबर क सुनी। तबहिं उ मोका मारि डवइ क जतन करी।”

यहोवा कहेस, “बेतलेहेम जा। एक बछवा आपन संग लइ जा। इ कहा, ‘मई यहोवा क बलि चढ़ावइ आइ अहउँ।’ 3यिसै क बलि क टेमें बोलोँवा। तब मई तोहका बताउब कि तोहका का करब अहइ। तोहका उ मनई क अभिसेक करइ चाही जेका मई देखोँउब।”

4समूएल उहइ किहेस जउन यहोवा ओका करइ क कहे रहेन। समूएल बेतलेहेम गवा। बेतलेहेम क पुरख डर स काँप गएन। उ पचे समूएल स भेंटेन अउ उ सबइ ओसे पूछेन, “का आप लोग सान्ति स आइ अहेन?”

5समूएल जवाब दिहेस, “हाँ, मई सान्ति स आवा हउँ। मई यहोवा क बलि-भेंट चढ़ावइ आवा हउँ। आपन क तइयार करा अउ मोरे संग बलि भेंट में आवा।” समूएल यिसै अउ ओकरे बेतहनन क तइयार किहेस। तब समूएल ओनका आवइ अउ बलि भेंट में हाथ बटावइ बरे बोलावा दिहेस।

6जब यिसै अउर ओकर पूत आपन, तउ समूएल एलीआब क लखेस। समूएल सोचेस, “सचमुच इहइ उ मनई बा जेका यहोवा चुनेस ह।”

7मुला यहोवा समूएल स कहेस, “एलीआब सुन्नर बा मुला ओकरे बारे में जिन विचारा। एलीआब लम्बा बा मुला ओकरे बारे में जिन सोचा। परमेस्सर ओन चीजन्क नहीं निहारत जेका मामूली मनई लखत हीं। लोग मनई क बाहरी रूप क निहारत हीं, मुला यहोवा मनई क हिरदइ क लखत ह। एलीआब नीक मनई नहीं अहइ।”

8तब यिसै आपन दूसर पूत अबीनादाब क बोलाएस। अबीनादाब समूएल क लगे स गुजरा। मुला समूएल कहेस, “नाहीं, इहइ उ मनई नहीं अहइ कि जेका यहोवा चुने बा।”

9तब यिसै सम्मा क समूएल क लगे स गुजरइ क कहेस। मुला समूएल कहेस, “नाहीं, यहोवा इ मनई क भी नहीं चुने अहइ।”

10यिसै आपन साताहु पूतन क समूएल क देखोँएस। मुला समूएल यिसै स कहेस, “यहोवा इ मनइयन में स कउनो क भी नहीं चुने अहइ।”

11तब समूएल यिसै स पूछेस, “का तोहार सबहिं पूत इ सबइ ही बाटेन?”

यिसै जवाब दिहेस, “नाहीं मोर सबन त छोट एक अउर पूत अहइ, मुला उ भेड़िन क खवारी करत ह।”

समूएल कहेस, “ओका बोलावा। ओका हिओँ लिआवा। हम पचे तब तलक खइया क खाइ बरे नहीं बइठब जब तलक उ आइ नहीं जाता।”

12यिसै कउनो क आपन सब ते छोटका बेटवा क लइ आवइ बरे पठाएस। उ सुन्नर अउ लाल बार वाला नउजवान रहा। इ बहोत सुन्नर रहा।

यहोवा समूएल स कहेस, “उठा, एका तेल स अभिसेक करा। इ उहइ व्यक्ति अहइ।”

13समूएल तेल स लबालब भरा सींग उठाएस अउ उ खास तेल क यिसै क सब ते छोट पूत क मूँडे प ओकरे भाई लोगन क समन्वा उड़ेरेस। उ दिना क पाछे यहोवा क आत्मा दाऊद प उतरा। समूएल आपन घर, रामा क लउटि गवा।

### दुष्ट आतिमा साऊल क परेसान करत ह

14यहोवा क आतिमा साऊल क तजि दिहेस। तब यहोवा साऊल प एक परेत आतिमा पठएस। उ ओका बहोत परेसान किहेस। 15साऊल क नउकरन ओसे कहेन, “परमेस्सर क जरिए पठइ गइ एक परेत आतिमा तोहका परेसान करत बाटइ। 16हम सबन क हुकुम द्या हम पचे कउनो क हेरब जउन वीणा बजाइ। यदि परेत आतिमा यहोवा क हियँ स तोहरे ऊपर आइ अहइ तउ उ मनई वीणा बजाइ। तब उ परेत आतिमा तोहका अकेल्ले मँ तजि देइ अउर तू चंगा अनुभव करब्या।”

17एँह बरे साऊल आपन नउकरन स कहेस, “अइसे मनई क हेरा जउन वीणा ठीक तरह बजावत ह अउर ओका मोरे लगे लइ आवा।”

18नउकरन मँ स एक कहेस, “बेतलहेम मँ रहइवाला एक मनई अहइ। मई यिसै क पूत क लखेउँ ह। उ जानत ह कि वीणा कइसे बजाइ जात ह। उ एक बीर पुरुख भी बा अउ अच्छी तरह लइत ह। उ चउकन्ना बा अउ सुन्नर भी अहइ अउर यहोवा ओकरे संग अहइ।”

19एँह बरे साऊल यिसै क लगे दूत पठएस। उ पचे यिसै स उ कहेस जउन साऊल स कहे रहा। “तोहार पूत दाऊद नाउँ क अहइ। उ तोहार भेड़ी क रखवारी करत ह। ओका मोरे लगे पठवा।”

20फुन यिसै साऊल क भेंट देइ बरे कछू चीज तइयार किहेस। यिसै एक गदहा, कछू रोटी अउ एक गगरी दाखरस अउ एक बोकरी क बच्चा लिहेस। यिसै उ चीजन क दाऊद क दिहेस, अउर उ साऊल क लगे पठइ दिहेस। 21इ तरह दाऊद साऊल क लगे गवा अउ ओकरे समन्वा ठाड़ भवा। साऊल दाऊद स बहोत पिआर किहेस। फुन दाऊद साऊल क हथियार लइ चलइवाला बन गवा। 22साऊल यिसै क लगे एक खबर पठएस, “दाऊद क मोरे लगे रहइ अउ मोर सेवा करइ द्या। मई ओका बहोत पसन्द करत हउँ।”

23जब कबहुँ परमेस्सर क परेत आतिमा साऊल प आवत, तउ दाऊद आपन बाँसुरी उठावत अउ ओका बजावइ लागत। परेत आतिमा साऊल क तजि देत अउ उ चंगा महसूस करइ लागत।

### गोलियत इस्त्राएल क ललकारत ह

17 पलिस्तिन आपन फउज लड़ाई बरे बटोरेन। उ पचे यहूदा मँ बसा सोको मँ जुद्ध बरे एकट्ठा भएन। ओनकइ डेरा। सोको अउ अजेका क बीच एपेसदम्मीन नाउँ क सहर मँ रहा।

2साऊल अउ इस्त्राएली सिपाही भी हुवाँ एक संग जमा भएन। ओनकइ डेरा एला क घाटी मँ रहा। साऊल क फउजी मोर्चा प तैनात पलिस्ती स जुद्ध करइ बरे तैयार रहेन 3पलिस्ती एक पहाड़ी प रहेन अउ इस्त्राएली दूसर पहाड़ी प अउर ओकर क बीच मँ घाटी रही।

4पलिस्तिन मँ एक बरिआर जोध्दा रहा। गोलियत गत से रहा। गोलियत लगभग नौ फीट ऊँचा रहा। गोलियत पलिस्ती डेरा स बाहेर आवा। 5ओकरे मूँडे प काँसा का टोपा

रहा। उ पट्टीधारी कवच क कोट पहिरे रहा। इ कवच काँसे क बना रहा अउर एकर तौल करीब एक सौ पच्चीस पौण्ड रहा। 6गोलियत आपन गोड़े मँ काँसा क रच्छा कवच पहिरे रहा। ओकरे लगे काँसा का भाला रहा जउन ओकरी पीठी प बाँधा रहा। 7गोलियत क भाला क फाल जुलाहे क छड़ क तरह रहा। भाला क फाल क तौल पन्द्रह पौण्ड रही। गोलियत क सहायक गोलियत क ढाल क धरे भए ओकरे आगे आगे चलत रहा।

8गोलियत रोज रोज बाहेर निकरत रहा अउ उ इस्त्राएली फउजियन कइँती गोहराइके कहत रहा, “तोहार सब फउजी लड़ाई बरे मोर्चा काहे लगाए बाटेन? तू पचे साऊल क सेवक अहा। मई एक पलिस्ती हउँ। एँह बरे कउनो एक मनई क चुना अउ ओका मोसे लइइ क पठवा। 9जदि उ मनई मोका मारि डावत ह तउ हम पलिस्ती तोहार गुलाम होइ जाब। मुला जदि मई ओका जीत लिहेउँ अउ तोहरे मनई क मारि डावउँ तउ तू सबइ हमार दास होइ जाया। तब तू पचे हमार सेवा करब्या।”

10पलिस्ती इ भी कहेस, “आजु मई खड़ा हउँ अउ इस्त्राएल क फउज क मसखरी उड़ावत हउँ। मोका आपन मँ स एक क संग लइइ द्या।”

11गोलियत जउन कहे रहा ओका साऊल अउ इस्त्राएली फउजी सुनेन अउर उ पचे बहोत ससाइ गएन।

### दाऊद क लड़ाई क मैदान जाब

12दाऊद यिसै क पूत रहा। यिसै एप्राती परिवार स यहूदा बेतलेहम स रहा। यिसै क आठ पूत रहेन। साऊल क टेम मँ यिसै एक बुढ़वा मनई रहा। 13यिसै क तीन बड़का पूत साऊल क संग जुद्ध मँ गवा रहेन। पहिला पूत एलीआब रहा। दूसर पूत अबिनादाब रहा। अउर तीसर पूत सम्मा रहा। 14दाऊद सबसे छोटा बेटवा रहा। तीनउँ बड़े बेटवन साऊल क फउज मँ रहेन। 15मुला दाऊद कबहुँ कबहुँ बेतलेहम मँ आपन पिता क भेड़ी क रखवारी करइ बरे साऊल क लगे स चला जात रहा।

16पलिस्ती गोलियत हर रोज भिन्सारे-साँझ क बाहेर आवत रहा अउ इस्त्राएल क फउज क समन्वा खड़ा होइ जात रहा। गोलियत चालीस दिन तलक इ तरह इस्त्राएल क मसखरी उड़ावत रहा।

17एक दिन यिसै आपन पूत दाऊद स कहेस, “पका भवा दाना क इ टोपा अउ इ दस रोटी क डेरा मँ आपन भाई लोगन क लगे लइ जा। 18पनीर क इ दस लोंदा क भी एक हजार सिपाहियन वाली आपन भाई क टुकड़ी क नायक अफसर क लगे लइ जा। लखा कि तोहार भाई कइसे अहइँ। कछू अइसा साच्छी लावा जैसे मोका पता लागइ कि तोहार भाई ठीक-ठाक बाटेन। 19तोहार भाई साऊल क संग अहइँ अउ इस्त्राएल क सब फउजी एला घाटी मँ जमा अहइँ। उ पचे पलिस्ती क खिलाफ लइत अहइँ।”

20भोर होत भिन्सारे दाऊद भेड़ी क रखवारी दूसर गइरिया क सौंपेस। दाऊद खइया क खाएस अउ हुवाँ बरे चल पड़ा जहाँ खातिर यिसै कहे रहा। दाऊद आपन गाड़ी क डेरा मँ लइ गवा। उ समइया फउजी आपन लड़ाई मँ मोर्चा थामइ

जात रहेन जब दाऊद हुवाँ पहुँचा। फउजी आपन जुद्ध क बिगुल बजावइ लागेन। 2इस्त्राएल अउ पलिस्ती आपन आपन मनइयन क जुद्ध में एक दूसर स भिड़इ बरे पंक्ती-बध करत रहेन।

22दाऊद भोजन अउ चीजन क उ मनई क लगे तजि दिहेस जउन सामान क बाँटत रहा। दाऊद पराइके उ ठउरे प पहाँचा जहाँ इस्त्राएली फउजी रहेन। दाऊद आपन भाइयन क बारे में पूछेस।

23दाऊद आपन भाइयन क संग बात करब सुरु किहेस। उहइ टैम पलिस्ती सबन त बरिआर जोधा जेकर नाउँ गोलियत रहा अउर जउन गथ क बसइया रहा, पलिस्ती फउज स बाहेर आवा। पहिले क तरह गोलियत इस्त्राएल क खिलाफ उहइ बात नरियाइके कहेस।

24इस्त्राएली फउजी गोलियत क लखेन अउर पराइ गएन काहेकि उ लोगन बहोत डरे भवा रहा। 25इस्त्राएली मनइयन में स एक कहेस, “अरे देसबासियो! तोहमों स कउनो लखेस ह जउन बार-बार इस्त्राएल क हँसी उड़ावत ह। जउन कउनो उ मनई क मार देइ धनी होइ जाइ। राजा साऊल ओका बहोत धन देइ। साऊल आपन बितिया क उ मनई स बीहि देइ जउन गोलियत क मार देइ। अउर साऊल उ व्यक्ति क परिवार क इस्त्राएल में अजाद कइ देइ।”

26दाऊद आपन बगली खड़ा मनई स पूछेस, “उ का कहेस? इ पलिस्ती क मारइ अउ इस्त्राएल क इ बेज्जती क दूर करइ क इनाम का अहइ? आखिर में इ गोलियत बाटइ का? सिरिफ इ एक बिदेसिया बा। गोलियत एक पलिस्ती स जियादा कछू नहीं। उ काहे सोचत ह कि उ सोझइ परमेस्सर क फउज क खिलाफ बोल सकत ह?”

27एँह बरे इस्त्राएलियन गोलियत क मारइ क इनाम क बारे में बताएन। 28दाऊद क बड़ा भाई एलीआब दाऊद क फउजी स बात करत सुनेस। एलीआब दाऊद प कोहाइ गवा। एलीआब दाऊद स पूछेस, “तू हिआँ काहे आया? रेगिस्तान में उ थोड़ी स भेड़ी क केकरे लगे तजिके आया ह? मई जानत हउँ कि तू हिआँ काहे आया ह? तू उ करब नहीं चाहत्या जउन तोहसे करइ क कहा गवा रहा। तू सिरिफ हिआँ जुद्ध लखइ बरे आवइ चाहत बाट्या।”

29दाऊद कहेस, “अइसा मई का किहेउँ ह? मई कउनो गलती नहीं किहेउँ ह। मई सिरिफ बात करत रहेउँ।” 30दाऊद दूसर मनइयन कइँती मुड़ा अउ ओनसे उ सबइ सवाल किहेस। उ पचे दाऊद वइसे ही जवाब दिहेन।

31कछू मनइयन दाऊद स बात करत सुनेन। उ पचे दाऊद क बारे में साऊल स कहेस। साऊल हुकुम दिहेस कि उ पचे दाऊद क ओकरे लगे लइ आवइँ। 32दाऊद साऊल स कहेस, “कउनो मनई क ओकरे कारण हिम्मत हारइ जिन द्या। मई आपक सेवक हउँ। मई इ पलिस्ती स लड़इ जाब।”

33साऊल जवाब दिहेस, “तू फिलिस्तीन क खिलाफ जुद्ध में नहीं जाइ सकत्या। तू अबहुँ छोटा बच्चा बाट्या। गोलियत जब बच्चा रहा, तबहिँ स जुद्ध में लड़त रहा।”

34मुला दाऊद साऊल स कहेस, “मई आपक सेवक अहउँ। अउर मई आपन बाप क भेड़ी क रखवारी भी करत

रहेउँ ह। जदि कउनो सेर या रीछ आवत अउ झुण्ड स कउनो भेड़ी क उठाइ लइ जात। 35तउ मई ओकर पाछा करत रहेउँ। मई आपन भेड़ी क बचावइ बरे उ जंगली जनावर प हमला करत रहेउँ अउ ओका मारत रहेउँ। अउर जदि उ मोर तरफ मुड़तेन अउर मुझ पइ हमला करतेन तउ मई ओकर गरदन क नीचे क बार पकड़तेन अउर मातेन अउर ओका मरि डालतेन। 36मई एक सेर अउ एक ठु रीछ क मारेउँ ह। मई इ विदेसी गोलियत क वइसे मार डाउब। गोलियत मरी, काहेकि उ साच्छात परमेस्सर क फउज क मसखरी किहेस ह। 37यहोवा मोका सेर अउ रीछ स बचाएस ह। यहोवा इ पलिस्ती गोलियत स भी मोर रच्छा करिहीं।”

साऊल दाऊद स कहेस, “जा यहोवा तोहरे संग होईँ।” 38साऊल आपन ओढ़ना दाऊद क पहिराएस। साऊल एक काँसा क टोप दाऊद क सिर प धरेस अउ ओकरे तन प कवच पहिराएस। 39दाऊद तरवार क लिहेस अउ ओका कवच पइ बाँधिस अउर चलइ क कोसिस किहेस, मुला उ उस भारी भरकम कवच क लेकर चल नहीं सकत काहेकि उ ओन भारी चीजन क पहिरइ क आदत नहीं रही।

दाऊद साऊल स कहेस, “मई इ चीजनक संग नहीं लड़ सकत्या। मोर आदत ओनके बरे नहीं बा।” एँह बरे दाऊद ओन सबन क उतार दिहेस। 40दाऊद आपन टहरइ क छड़ी आपन हाथे में लिहेस। नदी क तले स दाऊद पाँच चीकन पाथर चुनेस। उ ओन पाथरन क आपन गड़रियावाला झोरी में राखेस। उ आपन गोफना (गुलेल) आपन हाथे में लिहेस अउर उ पलिस्ती गोलियत स मिलइ चल पड़ा।

### दाऊद गोलियत क मारत डावत ह

41पलिस्ती गोलियत धीमे धीमे दाऊद क नगिचे अउर नगिचे स नगिचे होत गवा। गोलियत क सहायक ओकर ढाल लइके ओकरे आगे चलत रहा। 42गोलियत दाऊद क निहारेस अउ हँसा। गोलियत लखेस कि दाऊद फउजी नहीं बा। उ सिरिफ लाल बारेवाला जवान लरिका अहइ। 43गोलियत दाऊद स कहेस, “इ छड़ी काहे बरे बाटइ? का तू कूकुर क नाई मोर पाछा कइके मोका भगावइ आवा बाट्या।” तब गोलियत आपन देवतन क नाउँ लइके दाऊद क खिलाफ सरापेस। 44गोलियत दाऊद स कहेस, “हिआँ आवा, मई तोहरे तने क पंछी अउ पसू क खियाइ देब।”

45दाऊद पलिस्ती गोलियत स कहेस, “तू मोरे लगे तरवार, बर्छी अउ भाला चलावइ आवा अहा। मुला मई तोहरे लगे इस्त्राएल क फउज क परमेस्सर सर्वसक्तीमान यहोवा क नाउँ प आवा हउँ। तू ओनके खिलाफ बुरी बात कह्या ह। 46आजु यहोवा तोहका मोसे हराइ देइहीं। मई तोहका मारि डइहउँ। आजु मई तोहार मूँड कटिहउँ अउ तोहरे देह क पंछी अउ जंगली जनावर क खियाइ देइहउँ। हम पचे दूसर पलिस्तिन क संग हिआँइ करब। तब्बइ समूचइ संसार जानी कि इस्त्राएल में परमेस्सर बा। 47हिआँ बटुरा सबहिँ मनइयन जनिहई कि मनइयन क रच्छा बरे यहोवा क तरवार अउ भाला क सरोकार नहीं। जुद्ध यहोवा क बा। अउर यहोवा तू सबहिँ पलिस्तिन क हरावइ में हमार मदद करी।”

48पलिस्ती गोलियत दाऊद प हमला करइ ओकरे लगे आवा। दाऊद गोलियत स भिड़इ तेजी स दउड़ा।

49दाऊद एक पाथर आपन झोरी स निकारेस। उ ओका आपन गोफना प चढ़ाएस अउ ओका चलाएस अउ उ गोलियत क कपाल प चोट किहेस। पाथर ओकरे कपाल में गहिर घुसि गवा अउ गोलियत मुँह क बल गिर पड़ा।

50इ तरह दाऊद एक गोफना अउ एक पाथर स पलिस्ती क हराइ दिहस। उ पलिस्ती प चोट किहेस अउ ओका मार डाएस। दाऊद क लगे कउनो तरवार नाहीं रही। 51एँह बरे, दाऊद दउड़ा अउ पलिस्ती क बगल में खड़ा होइ गवा। दाऊद ओका खुद क तरवार ओकरी मियान स निकारेस अउ ओसे गोलियत क मुँह क ओकर सरिर स अलग कइ दिहस। इ तरह उ ओका मारेस।

जब दूसर पलिस्तियन लखेन कि ओनकइ फउज क प्रमुख मारा गवा अहइ तउ उ पचे मुडेन अउ भाग गएन। 52इस्त्राएल अउ यहूदा क फउजी सिपाही चिचियाएन अउ पलिस्तियन क पाछा पलिस्तियन क गत सहर क चउहददी तलक अउ एक्रोन क फटके तलक किहेस। उ पचे ढेर पलिस्तियन क मारेन। ओनकइ लहास सारैम सड़क प गत अउर एक्रान कइँती बिछ गएन। 53पलिस्तियन क पाछा करइ क पाछे इस्त्राएली पलिस्तियन क डेरा में लौटेन। इस्त्राएली उ डेरा स बहोत स चीज ढोइ लइ गएन।

54दाऊद पलिस्ती प्रमुख गोलियत क मुँह यरूसलेम लइ गवा। दाऊद पलिस्तियन क औजार क अपने लगे तम्बू में रखेस।

### साऊल दाऊद स डेराइ लग

55साऊल दाऊद क गोलियत स लइइ बरे जात निहारे रहा। साऊल सेनापति अब्नेर स बात किहेस, “अबनेर, उ नउजवान क “बाप कउन अहइ?”

अबनेर जवाब दिहेस, “महाराज, मइँ किरिया खाइके कहत हउँ-मइँ नाहीं जानत।”

56राजा साऊल स कहेस, “पता लगावा कि उ नउ जवान क पिता कउन अहइ।”

57जब दाऊद गोलियत क मारे क पाछे लउटा तउ अबनेर ओका साऊल क लगे लइ आवा। दाऊद तब भी फिलिस्तीनी क मुँह हाथे में धरे रहा।

58साऊल ओसे पूछेस, “जवान मनई तोहार पिता के अहइ?”

दाऊद जवाब दिहस, “मइँ आप क सेवक बेतलेहेम क यिसै क पूत हउँ।”

### दाऊद अउ योनातान क गहिरी दोस्ती

18 दाऊद जब साऊल स बात पूरी कइ लिहस तब योनातान, दाऊद क बहोत खासमखास मीत बन गवा। योनातान दाऊद स ओतैना ही पिरेम करइ लाग जेतैना आपन स।

2साऊल उ दिन क पाछे दाऊद क आपन लगे रखेस। साऊल दाऊद क ओकरे घर पिता क लगे नाहीं जाइ दिहस।

3योनातान दाऊद स बहोत खासमखास मीत रहा। योनातान दाऊद स एक समझौता किहेस। 4योनातान जउन कोट पहिरे रहा ओका उतारेस अउ दाऊद क दइ दिहस। योनातान आपन सारी वर्दी दाऊद क दइ दिहस। उ आपन धनुस, तरवार अउ कमर बंद भी दाऊद क दइ दिहस।

### साऊल क दाऊद क सफलता प धियान देब

5साऊल दाऊद क अलग अलग जुद्ध में लइइ पठएस। दाऊद बहोत कामयाब रहा। तबहिँ साऊल ओका फउजियन क ऊपर प्रभारी बनाएस। एहसे सब खुस भएन, हिऔँ तलक कि साऊल क सब अफसर भी खुस भएन। 6दाऊद पलिस्तियन क खिलाफ लइइ जात रहा। जुद्ध क पाछे उ घर लउटत रहा। इस्त्राएल क सबहिँ सहरन स मेहररुअन साऊल क समन्वा दाऊद क सुआगत में ओसे भेंटइ आवत रहिन। उ सबइ हँसतिन, नाचतिन अउ ढोलक अउ सितार तीन या जियादा धागा वाला क बजावत रहतिन। उ सबइ दाऊद क समन्वा आपन खुसी जाहिर करत रहिन। 7मेहररुअन गावत रहिन,

“साऊल हजारन क मारेस।

दाऊद दसहु हजारन क मारेस।”

8मेहररुअन क इ गीत साऊल क दुःखी कइ दिहस। उ बहोत कोहाइ गवा। साऊल सोचेस, “मेहररुअन दाऊद क प्रसंसा करत अहइँ कि उ दसहु हजार मारेस ह। अउर उ पचे कहत अहइँ कि मइँ सिरिफ हजार मारेउँ। ओका कब्जा करइ बरे का बचा सिरिफ, बादसाहत हीँ?” 9एँह बरे उ समइ स साऊल दाऊद प निगाह रखइ लाग।

### साऊल दाऊद स ससाइ गवा

10दूसरे दिन परमेस्सर स पठइ गइ एक दुट्ट आतिमा साऊल पर जोर स सवारी भरेस। साऊल आपन घर में बहसी होइ ग।\* दाऊद पहिले क तरह वीणा बजाएस। 11मुला साऊल क हाथे में भाला रहा। साऊल सोचेस, “मइँ दाऊद क देवारे में ठोंक देब।” साऊल दुइ बार भाला स हमला किहेस, मुला दाऊद बचि गवा।

12यहोवा दाऊद क संग रहा। अउर यहोवा साऊल क तजि दिहेस। एँह बरे साऊल दाऊद स डेरान रहा। 13साऊल दाऊद क आपन स दूर पठइ दिहस। साऊल दाऊद क दस हजार क सेनापति बनाएस। दाऊद जुद्ध में फउजियन क अगुअइ किहेस। 14यहोवा दाऊद क संग रहा। एँह बरे दाऊद हर कहुँ सफल रहत रहा। 15साऊल लखेस कि दाऊद क बहोत जिआदा कामयाबी मिलत बाटइ तउ साऊल दाऊद स अउर भी जिआदा ससाइ लाग।

16मुला इस्त्राएल अउ यहूदा क सबहिँ मनई दाऊद स पिरेम करत रहेन। उ पचे ओसे पिरेम एँह बरे करत रहेन

साऊल ... बहसी होइ ग या “भविस्सवाणी” क मुताबिक हिब्रू सब्ब क अरथ अहइ-उ मनई क अधिकार आपन कहा अउ रिप प नाहीं रहा। एकर इ मतलब होत ह कि परमेस्सर दूसर मनइयन क विसेस संदेस देइ उ मनई क बइपरत ह।

काहेकि उ जुद्ध में ओनका रस्ता देखौवत रहा अउ ओनकइ बरे लड़त रहा।

### साऊल क आपन बिटिया स दाऊद क बियाहे क योजना

17साऊल दाऊद क मार डवइ चाहत रहा। साऊल दाऊद क धोख देइ क एक उपाय सोचेस। साऊल दाऊद स कहेस, “इ मोर सबन ते बड़की बिटिया मेरब अहइ। मई तोहका एहसे बियाह करइ देब। तबहिं तू सक्तीसाली जोधा होइ जाब्या। तू हमरे पूत क नाई होब्या। तब तू जाया अउ यहोवा क जुद्ध लड़्या।” इ एक चाल रही। साऊल सचमुच अब इ तखड़ा बखड़ा करत रहा, “इ तरह दाऊद क मोका दाऊद क मारइ क न होइ। मई पलिस्तिथन स ओका आपन खातिर मरवाइ देब।”

18मुला दाऊद कहेस, “मई कउनो खास परिवारे स नाहीं अहउँ। अउर मोर कउन हस्ती कि मई राजा क बिटिया क संग बियाह कइसे कइ सकत हउँ?”

19तउ फुन जब साऊल क बिटिया मेरब क दाऊद क संग बियाह टेमें आवा तब साऊल मेहोलाई क अद्रीएल स ओकर बियाह कइ दिहस।

20साऊल दूसर बिटिया मीकल दाऊद स पियार करत रही। मनइयन साऊल स कहेन कि मीकल दाऊद स पियार करत ह। एहसे साऊल क खुसी भइ। 21साऊल सोचेस, “मई मीकल क साऊल क झाँसा देइ में बइपरब। मई मीकल क दाऊद स बियाह करइ देब। तब पलिस्तिथन दाऊद क खिलाफ होइ जाब अउ उ पचे ओका मरि देब।” एँह बरे साऊल दाऊद स दूसर दाई कहेस, “आजु तू मोरी बिटिया स बियाह कइ सकत ह।”

22साऊल आपन अफसरन क हुकुम दिहस, “दाऊद स छिपके बात करा, उ ओनसे कहा, ‘देखा, राजा तोहका पसन्द करत ह। ओकर अफसर तोहका पसन्द करत हीं। तोहका ओकरी बिटिया स बियाह कइ लेइ चाही।”

23साऊल क अफसरन उ बातन दाऊद स कहेन। मुला दाऊद जवाब दिहस, “का तू पचे समझत ह कि राजा क दमाद बनब सहल बाटइ? मोरे लगे ऐतना धन नाहीं कि राजा क राजकुमारी क दइ सकउँ। मई तउ एक साधरण गरीब मनई हउँ।”

24साऊल क अफसरन साऊल क उ सब बताएन जउन दाऊद कहे रहा। 25साऊल ओनसे कहेस, “दाऊद स इ कहा, ‘दाऊद, राजा इ नाहीं चाहत कि तू ओकरी बिटिया बरे धन द्या। साऊल आपन दुस्मनन स बदला लेइ चाहत ह। एँह बरे बियाह करइ बरे कीमत क रुप में सिरिफ एक सौ पलिस्तिथन क लिंग क खलरी अहइ।” इ साऊल क छिपी चाल रही। साऊल सोचेस कि पलिस्ती इ तरह दाऊद क मारि डइहीं।

26साऊल क अफसरन दाऊद स इ सब बातन कहेन। दाऊद राजा क दमाद बनइ चाहत रहा, एँह बरे उ तुरंतही कछू कइ देखाएस। 27दाऊद अउ ओकर मनई पलिस्तिथन क खिलाफ लड़इ आएन। उ पचे दुइ सौ पलिस्ती मारि डिएन। दाऊद ऐनकइ लिंग क खलरी लिहस अउ साऊल

क दइ दिहस। दाऊद इ एँह बरे किहस काहेकि उ राजा क दमाद बनइ चाहत रहा।

साऊल दाऊद क आपन बिटिया मीकल स बियाह करइ दिहस। 28साऊल निहारेस कि यहोवा दाऊद क संग रहा। मुला साऊल इ भी धियान में राखेस कि ओकर बिटिया मीकल दाऊद स पियार करत रही। 29एँह बरे साऊल दाऊद स अउर भी जिआदा ससाइ गवा। साऊल उ पूरा टेमें दाऊद क खिलाफ रहा।

30इस्त्राएलियन क खिलाफ लड़इ बरे पलिस्ती सेनापति बाहेर निकरत रहेन। मुला हर दाई दाऊद ओनका हराएस। दाऊद साऊल क सबहिं अफसरन में सब स जिआदा सफल रहा तउ दाऊद मसहूर होइ गवा।

### योनातान दाऊद क मदद करत ह

19 साऊल आपन पूत योनातान अउ आपन अफसरन क दाऊद क मार डवइ बरे कहेस। मुला योनातान दाऊद क बहोतइ चाहत रहा। 2-3योनातान दाऊद क चिताउनी दिहस, “होसियार रहा, साऊल तोहका जान स मारि डवइ क मौका तलासत बाटइ। भिन्सारे खेते में जाइके लुकाइ जा। मई आपन बाप क संग खेते में जाब। जहाँ तू लुकान रहब्या हम पचे हुआँ खेते में खड़ा रहब। मई तोहरे बारे में आपन बाप स बतियाब। जउन मोका जानि पड़ी तउन तोहका बताउब।”

4योनातान आपन बाप साऊल स बतियान। योनातान दाऊद क बारे में नीक नीक बात कहेस। योनातान कहेस, “आप राजा अहइँ। दाऊद आपक सेवक बाटइ। दाऊद आप क कउनो नोसकान नाहीं पहुँचाए बाटइ। एँह बरे ओकरे संग कछू बुरा जिन करा। दाऊद हमेसा आप बरे नीक रहा ह। 5दाऊद आपन जिन्नगी प खेला रहा जब उ पलिस्ती गोलियत क मारे रहा। यहोवा समूचइ इस्त्राएल बरे एक बड़की जीत पाए रहेन। आप ओका निहारेन अउ आप ओह प बहोत खुस रहेन। आप दाऊद क नोसकान काहे पहुँचावइ चाहत बाटेन? उ बड़ा मासूम अहइ। ओका मारि डवइ क कउनो कारण नाहीं अहइ।”

6साऊल योनातान क सुनेस। साऊल प्रण किहस। साऊल कहेस, “यहोवा जब ताई जिन्द रहत ह तब ताई दाऊद मारा न जाई।”

7एँह बरे योनातान दाऊद क बोलाएस। उ ओसे उहइ कहेस जउन साऊल योनातान स कहेस। तबहिं योनातान दाऊद क साऊल क लगे लइ आवा। इ तरह दाऊद साऊल क हाजिरी में पहिले क तरह होइ गवा।

### साऊल फुन दाऊद क जान स मारि

#### डवइ क जतन करत ह

8फुन जुद्ध सुरु भवा। अउर दाऊद पलिस्तिथन स जुद्ध करइ गवा। उ पलिस्तिथन क हराएस अउर उ पचे ओकरे समन्वा पराइ गएन। 9मुला यहोवा क जरिए पठइ गइ दुट्ट आतिमा साऊल प सवारी भरेस। साऊल आपन घरे में बइठा रहा। साऊल क हाथे में ओकर भाला रहा। दाऊद वीणा बजावत रहा। 10साऊल दाऊद प हमला किहस अउ आपन भाला स ओका देवारे प ठोक देइ क जतन किहस। दाऊद

फौंदि क निकरि गवा अउ भाला देवारे स टकराइ क रहि गवा। तउ उहइ राति दाऊद हुआँ स पराइ निकरा।

11साऊल मनइयन क दाऊद क घरे पठएस। मनइयन दाऊद क घरे निगरानी करत रहेन। उ पचे राति भइ हुँवई ठहरेन। उ सबइ भिन्सारे दाऊद क मारि डावइ बरे जोहत रहेन। मुला दाऊद क मेहरारु मीकल ओका हुसियार कइ दिहस। उ कहेस, “तोहका आनु क राति पराइ निकरइ चाही। अउ आपन जिन्नगी क रच्छा करइ चाही। जदि तू अइसा न करब्या, तउ भियान मारि दीन्ह जाब्या।” 12फुन मीकल दाऊद क खिड़की स खाले उतारि दिहस अउर उ हुआँ स पराइ निकरा। 13मीकल आपन परिवार क देवता क मूरत लिहस अउ ओका बिछउना प ओलार दिहस। मीकल उ मूरत प ओढ़ना डाइ दिहस। उ ओकरे मूँड़े प बोकरी क बार भी लगाइ दिहस।

14साऊल दाऊद क बंदी बनावइ बरे दूत पठएस। मुला मीकल कहेस, “दाऊद बेमौर बा।”

15तउ पचे हुवाँ स गएन अउर उ सबइ साऊल स जाइके इ बताइ दिहेन, मुला उ पचे दूतन क दाऊद क लखइ बरे वापस पठइ दिहेन। साऊल इ सब मनइयन स कहेस, “दाऊद क मोरे लगे लइ आवा। अगर जरुरत होइ तउ ओका आपन बिछउना प ओलार भवा उठाइ लिआवा। मई ओका मारि डाउबा।”

16तउ दूत फुन दाऊद क घरे गएन। उ पचे दाऊद क धरइ भीतर गएन, मुला हुवाँ उ पचे लखेन कि बिछउना प सिरिफ एक ठु मूरत रही। उ पचे लखेन कि ओकर बार बस बोकरी क बार रहेन।

17साऊल माइकल स कहेस, “तू मोका इ तरह काहे धोखा दिहा? तू मोरे दुस्मन क पराइ जाइ दिहा। दाऊद पराइ गवा अहइ।” माइकल साऊल क जवाब दिहेस, “दाऊद मोसे कहे रहा कि उ मोका मारि डाइ जदि मई पराइ जाइ मैं ओकर मदद न करब।”

### दाऊद क रामा क डेरा में जाब

18दाऊद हिफाजत स बचि के निकरि गवा। दाऊद समूएल क लगे रामा पहोंचा। दाऊद समूएल स उ सब बताएस जउन साऊल ओकरे संग किहे रहा। तब दाऊद अउ समूएल ओन डेरन में गएन जहाँ नबियन रहत रहेन अउ उ हुवई थमा गएन।

19साऊल क पता लाग कि दाऊद रामा क नगिचे डेरा में रहन। 20साऊल दाऊद क बंदी बनावइ बरे मनइयन क पठएस। मुला जब उ पचे डेरन में पहोंचेन तउ उ टेमें नबियन क एक टुकरी भबिस्सबाणी करत रही। समूएल नबियन क अगुअइ करत भवा हुआँ खड़ा रहा। परमेस्सर क आतिमा साऊल क दूतन प ओतरी अउर उ पचे भबिस्सबाणी कइ लागेन।

21साऊल इ बारे में सुनेस, एँह बरे उ हुवाँ दूसर दूत पठएस। मुला उ सबइ भबिस्सबाणी कइ लागेन। एँह बरे साऊल तिसरी दाई दूत पठएस। अउर उ पचे भी भबिस्सबाणी कइ लागेन। 22आखिर में साऊल खुद रामा पहोंचा। साऊल

सेकु में खरिहाने क नगिचे एक ठु बड़का कुआँ क लगे आवा। साऊल पूछेस, “समूएल अउ दाऊद कहाँ बाटेन?”

मनइयन जवाब दिहेन, “रामा क नगिचे डेरा में।”

23तबहिं साऊल रामा क नगिचे डेरा में गवा। परमेस्सर क आतिमा साऊल प उतरी अउर साऊल भबिस्सबाणी करब सुरु किहेस। साऊल रामा क डेरा तलक लगातार भबिस्सबाणी करत गवा। 24तब साऊल आपन ओढ़ना उतारेस। इ तरह साऊल भी समूएल क समन्वा भबिस्सबाणी करत रहा। साऊल हुवाँ सारा दिन अउ सारी रात नंगा होइके ओलार रहा।

इहइ कारण स कहतूत चल गइ कि, “का साऊल नबियन में स कउनो एक बाटइ?”

### दाऊद अइ योनातान एक समझौता करत हीं

20 दाऊद रामा क नगिचे डेरा स पराइ गवा। दाऊद योनातान क लगे पहोंचा अउ ओसे पूछेस, “मई कउन सा गलती किहेउँ ह? मोर अपराध का अहइ? तोहार बाप मोका मारइ क काहे चाल चपेट करत बाटइ?”

2योनातान जवाब दिहेस, “इ फुरे नाहीं बाटइ। मोर बाप तोहका मारइ क जतन नाहीं करत अहइ। मोर बाप मोका पहिले बगैर बताए कछू नाहीं करत। इ खास बात नाहीं कि इ बात खास होइ या तुच्छ, मोर बाप हमेसा मोका बतावत हीं। मोर बाप मोका इ बतावइ स काहे इन्कार करिहीं कि उ पचे तोहका मारि डावइ चाहत हीं? नाहीं, का इ फुर नाहीं बा।”

3मुला दाऊद जवाब दिहेस, “तोहार बाप ठीक तरह जानत बाटेन कि मई तोहार मीत अहउँ। तोहार बाप आपन मने में इ विचारे अहउँ, ‘योनातान, क इ बारे में जानकारी नाहीं होइ चाही। जदि उ जानी तउ दाऊद स कहि देइ।’ मुला जइसे यहोवा क होब फुरे बाटइ अउर तू जिअत बाट्या, उहइ तरह इ भी फुर अहइ कि मई मउत क जिआदा नगिचे अहउँ।” 4योनातान दाऊद स कहेस, “मई उ सब कछू करब जउन तू मोसे करवावइ चाहत बाट्या।”

5तबहिं दाऊद कहेस, “लखा भियान नवा चन्द्रिमा क जलसा अहइ। मोका राजा क संग भोजन कइ क अहइ। मुला मोका तीसरे साँझ ताई खेत में लुकाइ रहइ द्या। 6अगर तोहरे बाप क इ जान ‘पड़इ कि मई टरि गवा हउँ तउ ओनसे कह्या कि दाऊद आपन घरे बेतलेहेम जाइ चाहत रहा। ओकर परिवार इ महीना क बलि खातिर खुद न्यैता देत बाटइ। दाऊद मोसे पूछेस कि मई ओका बेतलेहेम जाइ अउ ओकरे परिवारे स ओका भेंटइ देउँ।’ 7अगर तोहार पिता कहत बाटेन, ‘बहोतइ नीक भवा,’ तउ मई अच्छी तरह बचा हउँ। मुला अगर तोहार बाप कोहाइ जात हीं तउ बूझा कि मोर अनभल कइ चाहत हीं। 8योनातान मोहे प दया करा। मई तोहार चाकर अहउँ। तू यहोवा क समन्वा समझौता किहे अहा। अगर मई अपराधी अहउँ तउ तू खुद मोका मारि सकत ह। मुला मोका आपन बाप क लगे जिन लइ जा।”

9योनाताना जवाब दिहेस, “नाहीं, कबहुँ नाहीं। अगर मई जान जाब कि मोर पिता तोहार अनभल कइ चाहत हीं तउ तोहका होसियार कइ देब।”

10दाऊद कहेस, “अगर तोहार पिता करी होइके जवाब देत हीं तउ ओकरे बारे में मोका कउन बताई?”

11तबहिं योनातान कहेस, “आवा, हम पचे खेते में चली।” तउ योनातान अउ दाऊद एक संग खेते में चला गएन।

12योनातान दाऊद स कहेस, “मई इस्त्राएल क यहोवा परमेस्सर क समन्वा इ प्रण किहेउँ ह। मई प्रण करत हउँ कि मई तखराउब बखराउब कि मोर पिता तोहरे बरे कइसा बिचार धरत हीं। मई पता लगाउब कि उ तोहरे बारे में नीक बिचार रखत हीं कि नाहीं। तउ तीन दिन मँ मई तोहरे खेते में खबर पठउब। 13अगर मोर पिता तोह पड़ वार करइ चाहत हीं, तउ मई तोहका जानकारी देब। मई तोहका हिआँ स सुरच्छित जाइ प्रबंध कइ देब। यहोवा तोहका हिआँ स सुरच्छित होइके जाइ देइहीं। यहोवा मोका सजा देई, जदि मई अइसा न करउँ। यहोवा तोहरे संग रहई, जइसा उ मोरे पिता क संग रहेन ह। 14जब तलक मई जिअत रहउँ मोरे प दया राख्या। अउ जब मई मरि जाउँ तउ 15मोरे परिवारे प दया करब बन्द जिन करया। यहोवा दाऊद क सबहिं दुस्मनन क धरती स नास कइ देइहीं। 16अगर उ समइ योनातान क परिवार दाऊद क परिवारे स अलगाइ दीन्ह जाइ क होइ, तउ ओका होइ जाइ द्या। दाऊद क दुस्मनन क यहोवा सजा देइहीं।”

17तब योनातान दाऊद स कहेस कि उ ओकरे बरे पिरेम क प्रण क दोहराइ देइ। योनातान इ एँह बरे किहेस काहेकि उ दाऊद स ओतना ही पिरेम करत रहा जेतना उ अपने स।

18योनातान दाऊद स कहेस, “भियान नवा चन्द्रिमा क जलसा अहइ। तोहार आसन खाली रही। एँह बरे मोर बाप समुझ जइहीं कि तू चला ग अहा। 19तीसरे दिन उहइ जगह प जा जहाँ तू इ परेसानी सुरु होइ क पहिले लुकान रहया। उ पहाड़ी क बगल में प्रतीच्छा करा। 20अउर मई इस पहाड़ी क बगल स तीन अइसा बाण छोड़ब, जइसे मई कउनो निसान प बाण मारत हउँ। 21तब मई बाण क हेरइ बरे, आपन अउजार क ढोवइया लरिका स जाइ बरे कहब। जदि सब कछू नीक होइ तउ मई लरिका स कहब, ‘तू बहोतउ दूर निकरि गवा अहा बाण तउ मोरे लगे बाटइ। लउटा अउ ओका उठाइ लइ आवा।’ जदि मई अइसा कहेउँ तउ तू लुकाइ क जगह स बाहेर आइ सकत ह। मई बचन देत अही कि तू जइसे यहोवा हमेसा बना रहत ह वइसे तू बचा रहब्या। कउनो भी खतरा नाहीं बा। 22मुला जदि खतरा होइ तउ मई लरिका स कहब। ‘बाण बहोतइ दूर बाटइ, जा अउ ओका लइ आवा।’ अगर मई अइसा कहेउँ तउ तोहका चला जाइ चाही। 23हमरे अउ आपन बीच क समझौता क सुमिरिके राखा। यहोवा हमेसा बरे गवाह बा।”

24तउ दाऊद खेते में लुकाइ गवा।

### जेउनर में साऊल क इराद

नवा चन्द्रिमा क जलसा क टैम आवा अउ राजा खइया बरे बइठा। 25राजा देवार क निचके हुवई बइठा जहाँ अक्सर उ बइठत रहा। योनातान साऊल क दूसरी कइँती बइठा। अब्नेर साउब क पाछे बइठा। मुला दाऊद क जगह खाली रही। 26उ दिन साऊल कछू नाहीं कहेस। उ सोचेस, “होइ

सकत ह दाऊद क कछू भवा होइ अउर उ सुद्ध\* न होइ।”

27भियान भए, महीना क दूसर दिन, दाऊद क जगइ फुन खाली रही। तबहिं साऊल आपन पूत योनातान स पूछेस, “यिसै क पूत नवा चन्द्रिमा क जलसा में काल्ह या आजु काहे नाहीं आवा?”

28योनातान जवाब दिहेस, “दाऊद मोका स बेतलेहेम जाइ बरे अनुमती मांगत रहा। 29उ कहे रहा, ‘मोका जाइ द्या। मोर परिवार बेतलेहेम में एक बलि भेंट करत अहइ। मोर भइया हुवाँ रहइ बरे हुकुम दिहे अहइ। अब मई तोहार मीत अहउँ तउ मोका जाइ द्या अउ भाइयन स मिलइ द्या।’ इहइ कारण अहइ कि दाऊद राजा क मेज प नाहीं आवा अहइ।”

30साऊल योनातान प बहोतइ कोहाइ गवा। उ योनातान स कहेस, “तू एक दास अउरत क पूत अहा! मई जानत हउँ कि तू दाऊद क पच्छ में अहा। तू आपन महतारी अउ आपन बरे लज्जा क कारण अहा। 31जब तलक यिसै क पूत जिअत रही तब तलक तू कबहुँ राजा नाहीं बनब्या अउर न तोहार राज्ज होइ। अब दाऊद क हमरे लगे लइ आवा। उ एक मरा मनई अहइ।”

32योनातान आपन बाप स पूछेस, “दाऊद क काहे मारि डावा जाइ चाही? उ कउन अपराध किहे अहइ?”

33मुला साऊल आपन भाला योनातान प चलाएस अउर ओका मारि डावइ क जतन किहेस। एँह बरे योनातान समुझ गवा कि मोर बाप दाऊद फुरइ मार डावइ चाहत ह। 34योनातान कोहाइ गवा अउ उ मेजिया तजि दिहेस। योनातान एँतना घबराइ गवा अउ आपन बाप प कोहान कि जेउनर क दूसर दिन कछू भी खाइ स मना कइ दिहस। योनातान एँह बरे कोहान काहेकी साऊल ओका बेज्जत किहे रहा अउ साऊल दाऊद क मारि डावइ चाहत रहा।

### दाऊद अउ योनातान क बिद्य होब

35दूसर दिन भिन्सारे योनातान खेते में गवा। उ दाऊद स भेंटइ गवा, जइसा उ पचे राजी भ रहेन। योनातान एक अउजार क ढोवइया लरिका क आपन साथ लइ आवा। 36योनातान लरिका स कहेस, “थावा अउर जउन बाण मई चलावत अहउँ, ओनका लइ आवा।” लरिका धाउब सुरु किहेस अउ योनातान ओकरे मूँडे क ऊपर स बाण चलाएस। 37लरिका उ ठउरे क धावत जहाँ बाण गिरत रहा। मुला योनातान गोहराएस, “बाण तोहसे बहोतइ दूर बाटइ।” 38तब योनातान बोलाइ, “हाली करा। ओनका लइ आवा, हुआँ खड़ा जिन रहा!” लरिका बाणन क उठाएस अउ आपन मालिक क लगे वापस लइ आवा। 39लरिका क कछू पता नाहीं लाग कि का भवा। सिरिफ योनातान अउ दाऊद जान लिहन। 40योनातान आपन धनुस बाण लरिका क दिहस। तबहिं योनातान लरिका स कहेस, “सहर में लउटि आवा।”

41लरिका वपिस चला गवा। दाऊद आपन उ लुकाइ क ठउर स बाहेर आवा जउन पहाड़ी क दूसर कइँती रहा। दाऊद

सुद्ध या “लेइ काबिल” पक्तर या परमेस्सर क पूजा में काम आवइ जोग्ग। लखा लेवी बंस अध्याय 11-15 जेहमें सुद्ध अउ असुद्ध चीजन क बारे में “पुरान नेम” क नेम दीन्ह अहई।

आपन मूँड़ि क भुँइया तलक निहुराई कइ प्रणाम किहस। दाऊद तीन दाई निहुरा। तब दाऊद अउ योनातान एक दूसरे क चूमन। उ दुइनँ एक संग रोएन, मुला दाऊद योनातान स जिआदा रोएस।

42योनातान दाऊद स कहेस, “सान्ति स जा। हम पचे यहोवा क नाउँ लइके मीत होइके प्रण किहे रहे। हम पचे कहे रहे कि यहोवा हम पचन अउ हमरे सन्तानन क बीच हमेसा गवाह रइहीं।”

### दाऊद क याजक अहीमेलक स मिलइ जाब

21 तब दाऊद चला गवा अउ योनातान सहर क लउट गवा। 2दाऊद नौब नाउँ क नगर में याजक अहीमेलक स मिलइ गवा।

अहीमेलक दाऊद स मिलइ स डरत रहेन। अहीमेलक डर स काँपत रहा। अहीमेलक दाऊद स पूछेस: “तू अकेले काहे अहा? तोहरे संग कउनो मनई काहे नहीं अहइ?”

3दाऊद अहीमेलक क जवाब दिहेस, “राजा मोका खास हुकुम दिहे अहइ। उ मोसे कहेस ह कि ‘इ उददेस क कउनो क जानइ न द्या। कउनो भी मनई ओका न जानइ जेका मई तोहका करइ क कहेउँ ह।’ मई आपन मनइयन स कहि दिहेउँ ह कि उ पचे कहाँ भेंटइँ? 4अब इ बतावा कि तोहरे लगे खाइ क बरे का बाटइ? मोका पाँच ठु रोटी या जउन कछू तू पाइ सका द्या।”

5याजक दाऊद स कहेस, “मोरे लगे हिआँ साधारण रोटी नहीं अहइँ। मुला मोरे लगे कछू पवितर रोटी तउ अहइँ। तोहार अफसर ओका खाइ सकत हीं, जदि उ पचे कउनो मेहरारु क संग यौन सम्बंध न किहे होइँ।”

6दाऊद याजक क जवाब दिहेस, “हम पचे इ दिनन में कउनो मेहरारु क संग नहीं रहे। हमार मनई आपन तन क पवितर राखत हीं हिआँ तलक कि साधारण उददेस बरे जाए पर भी।\* अउर आजु बरे तउ इ खास तरह स फुर बाटइ काहेकि हमार कारज बहोत खास बाटइ।”

7हुआँ पवितर रोटी क अलावा कउनो रोटी नहीं रही। एँह बरे याजक दाऊद क हुवँई रोटी दिहस। इ उहइ रोटी रही जेका याजक यहोवा क समन्वा पवितर मेजे प धरत रहेन। उ पचे उ दिन मेज स इ रोटी क हटाइ लेत रहेन अउ ओकरी जगह ताजी रोटी धरत रहेन।

8उ दिन साऊल क अफसरन में स एक ठु हुआँ रहा। उ एदोमी दोएग रहा। दोएग क हुआँ यहोवा क समन्वा रखा गवा रहा।\* दोएग साऊल क गडरियन क नेता रहा।

9दाऊद अहीमेलक स पूछेस, “का तोहरे लगे हिआँ कउनो भाला या तरवार बाटइ? राजा क कारज बहोत जल्दी

**हमार मनई ... पर भी** लखा समूह 2:11-11 अउ व्यव विव 23:9-14 क नेम।

**दोएग ... गवा रहा** एकर अरथ होइ सकत ह कि दोएग परमेस्सर बरे खास प्रतिज्ञा क एक हीसा क रुप में हुआँ आवा रहा। कउनो दूसर धार्मिक कारण स हुआँ रहा। या एकर इ अरथ होइ सकत ह कि उ हुआँ गवा रहा कि उ कउनो किहे रहा जइसे क मारि डउब।

बा। मोका फउरन जाइ क अहइ, अउर मई आपन तरवार या दूसर कउनो अउजार नहीं लाइ।”

10याजक उत्तर दिहस, “एक मात्र तरवार जउन हिआँ अहइ उ पलिस्ती गोलियत क अहइ। इ उहइ तरवार अहइ जेका तू ओका तब लिहे रहा जब तू ओका एला क घाटी में मारे रह्या। उ तरवार एक ओढ़ना में लिपटी भइ एपोद क पाछे धरी अहइ। जदि तू चाहा तउ ओका लइ सकत ह।

दाऊद कहेस, “एका मोका द्या। गोलियत क तरवार क तरह कउनो तरवार नहीं बा।”

### दाऊद क गत क जाब

11उ दिन दाऊद साऊल क हिआँ स पराइ गवा। दाऊद गथ क राजा अकिस क लगे गवा। 12उ पचे कहेन, “का इ इस्राएल क राजा दाऊद नहीं अहइ? इहइ उ मनई अहइ जेकर गवनिया इस्राएलियन गावत हीं। उ पचे गावत हीं अउ ओकरे बरे नाचत हीं। इस्राएलियन इ गीत गावत हीं:

“साऊल हजारन क मारेस।

दाऊद दसहु हजारन क मारेस।”

13दाऊद क इ बात याद रहिन। दाऊद गत क राजा आकीस स बहोत डेरन रहा। 14एँह बरे, दाऊद आकीस अउ ओकरे अफसरन क समन्वा अपने क पागल मनई जइसा बहाना किहस। जब तलक दाऊद ओनके संग रहा उ पागल मनइयन जइसा बहाना किहस। उ दरवाजा क पल्ला प थूक देत रहा। उ आपन थूक क आपन डाढ़ी प गिराइ देत रहा।

15आकीस आपन अफसरन स कहेस, “इ मनई क लखा। इ तउ पागल जइसा अहइ। तू सबइ एँका मोरे लगे काहे लइ आया ह?” 16का मोर लगे मनई क कमी अहइ कि तू इ मनई क मोरे घरे में मोरे पागलपन क खेल करई बरे लइ आवा ह?”

### दाऊद क अलग अलग ठउर प जाब

22 दाऊद गथ क तजि दिहस। दाऊद अदुल्लाम क गुफा में पराइ गवा। दाऊद क भइयन अउ रिस्तेदारन सुनेन कि दाऊद अदुल्लाम में रहा। उ पचे दाऊद क मिलइ हुआँ गएन। 2बहोत स मनई दाऊद क लगे होइ गएन। उ सबइ, जउन कउनो विपत्ति में रहेन या कर्जा में रहेन या संतुदठ नहीं रहेन। दाऊद क संग होइ गएन। दाऊद क लगे चार सौ मनसेधू रहेन।

3दाऊद अदुल्लाम क तजि दिहस अउर उ मोआब में बसा मिस्प्या चला गवा। दाऊद मोआब क राजा स कहेस, “कृपा कइके मोरे महतारी बाप क आवइ द्या अउर आपन लगे तब तलक रहइ द्या जब ताई मई इ न समुझ सकऊँ कि परमेस्सर मोरे संग का करइ जात अहइ।” 4दाऊद आपन महतारी-बाप क मोआब क राजा क लगे तजि दिहस। दाऊद क महतारी बाप मोआब क राजा क लगे तब तलक ठहरेन जब तलक दाऊद किला में रहा।

5मुला नबी गद दाऊद स कहेस, “किला में जिन ठहरा। यहूदा पहुँचा मैं जा।” एँह बरे दाऊद हुआँ स चल पड़ा अउ हरथ क जंगल में गवा।

### साऊल अहीमेलक क परिवार क नसावत

6साऊल जानि लिहिस कि दाऊद अउ ओकरे मनइयन क बारे में पता चल गवा अहइँ। साऊल गीबा में पहाड़ी प एक पेड़ क नीचे बइठा रहा। साऊल क हाथ में ओकर भाला रहा। साऊल क सबहिँ अफसरन ओकरे चारिहुँ कइँती खड़ा रहेन। 7साऊल आपन उ अफसरन स कहेस, जउन ओकरे चारिहुँ कइँती खड़ा रहेन, “बिन्यामीन क मनइयो, सुना। का तू पचे समुझत ह कि यिसै क पूत तोहका खेत अउ अंगूरे क बगिया देइ? का तू पचे समुझत ह कि उ तोहका तरक्की देइ अउर तू पचन्क हजार मनई अउ सौ मनइयन क ऊपर अफसर बनइ। 8तू पचे मोरे खिलाफ जाल रचत बाट्या। तू पचे छिपी भइ चाल चल्या ह। तू पचन में स कउनो भी मोर पूत योनातान क बारे में नाहीं बताएस ह। तोहमाँ स कउनो भी इ नाहीं बताएस ह कि उ यिसै क पूत क संग क समझौता किहेस ह। तोहमाँ स कउनो भी मोर परवाह नाहीं करत। तोहमाँ स कउनो भी इ नाहीं बताएस कि मोर पूत योनातान दाऊद क हुस्काएस ह। योनातान मोर नउकर दाऊद स कहेस कि उ लुकाइ जाइ अउर मोहे प हमला करइ। अउर इ उहइ अहइ कि जउन दाऊद अब करत बाटइ।”

9एदोमीत दोएग साऊल क अफसरन क संग खड़ा रहा। दोएग कहेस, “मईँ यिसै क पूत दाऊद क नोब में लखेउँ ह। दाऊद अहीतूब क पूत अहीमेलक स भेंटइ आवा। 10अहीमेलक यहोवा स दाऊद बरे बिनती किहस। अहीमेलक दाऊद क भोजन भी दिहस। अउर अहीमेलक दाऊद क पलिस्ती गोलियत क तरवार भी दिहस।”

11एँह बरे राजा याजक अहीतूब क पूत अउर ओकर सारा परिवार, याजकन जे नोब में रहत भवा, ओका अपन लगे अवइ बरे संदेस भेजेस, अउर उ पचे सबहिँ राजा लगे आएन।

12साऊल अहीमेलक स कहेस, “अहीतूब क पूत, अब सुनि ल्या।” अहीमेलक जवाब दिहस, “हाँ, महाराज।”

13साऊल अहीमेलक स कहेस, “तू अउर यिसै क पूत दाऊद मोरे खिलाफ छिपी योजना काहे बनाया? तू दाऊद क रोटी अउ तरवार दिहा। तू परमेस्सर स ओकरे बरे बिनती किह्या। अउर अब सोझइ, दाऊद मोह पइ हमला करइ क जोहत अहइ।”

14अहीमेलक जवाब दिहस, “दाऊद आप क बड़का पतियाइ क काबिल अहइ। तोहरे अफसरन में स कउनो ओरतना पतियाइ क काबिल नाहीं जेतना दाऊद बा। दाऊद तोहार आपन जमाई अहइ। अउर दाऊद अंगरच्छक क नायक अहइ। तोहार आपन परिवार दाऊद क सम्मान करत ह। 15उ पहली दाई नाहीं रहा, कि मईँ दाऊद बरे परमेस्सर स बिनती कीन्ह। अइसी बात बिल्कुल नाहीं। मोका या मोरे कउनो नातेदार प दोख जिन लगावा। हम पचे तोहार नउकर अही। मोका कछू भी पता नाहीं कि इ सब का होत बाटइ।”

16मुला राजा कहेस, “अहीमेलक, तू पचन क अउ तोहरे सबहिँ नातेदारन क मरब अहइ।” 17तब राजा आपन बगल में खड़ा भवा रच्छकन स कहेस, “जा अउ यहोवा क याजकन क मारि डावा। एँह बरे इ करा काहेकि उ पचे दाऊद क पच्छ में अहइँ। उ पचे जानत रहेन कि दाऊद परान बाटइ, मुला उ पचे मोका बताएन नाहीं।”

मुला राजा क अफसरन यहोवा क याजकन क मारइ स इन्कार कइ दिहन।

18एँह बरे राजा दोएग क हुकुम दिहस। साऊल कहेस, “दोएग तू जा अउ याजकन क मारि डावा।” एँह बरे एदोमीत दोएग गवा अउ उ याजकन क मारि डाएस। उ दिना दोएग सन क एपोद पहिरइवालन पचासी मनसेधू याजकन क मारि डाएस। 19नोब याजकन क सहर रहा। दोएग सहर क सबहिँ मनइयन क मारि डाएस। दोएग आपन तरवार क भाँजेस उ सबहिँ मनसेधुअन, मेहररुअन, लरिकन अउ गदेलन क जपि दिहस। दोएग ओनकइ गइयन, खच्चरन अउ भेड़ी तलक क जपि दिहस।

20मुला एब्यातार हुआँ स बचि निकरा। एब्यातार अहीमेलक क पूत रहा। अहीमेलक अहीतूब क पूत रहा। एब्यातार बचिके निकरा अउ दाऊद स मिलि गवा। 21एब्यातार दाऊद स कहेस कि साऊल यहोवा क याजकन क मारि डाएस ह। 22तब दाऊद एब्यातार स कहेस, “मईँ एदोमी दोएग क उ दिना नोब में लखेउँ रहे। अउर मईँ जानत हउँ कि उ साऊल स कही। मईँ तोहरे बाप क परिवारे क मउत बरे जिम्मेदार हउँ। 23जउन मनई साऊल तोहका मारइ चाहत ह उ मोका भी मारइ चाहत ह। मोरे संग ठहरा। जिन डेराअ। तू मोरे संग बचा रहब्या।”

### दाऊद कीला में

23 लोगन दाऊद स कहेन, “लखा, पलिस्ती कीला क खिलाफ जुद्ध करत बाटेन। उ पचे खरिहाने स अन्न लूटत अहइ।”

2दाऊद यहोवा स पूछेस, “का मईँ जाउँ अउ इ पलिस्तियन स लड़उँ?”

यहोवा दाऊद क जवाब दिहस, “जा अउ पलिस्तियन प हमला करा। कीला क बचावा।”

3मुला दाऊद क मनइयन ओसे कहेन, “लखा, हम सबइ हिँओँ यहूदा में अही अउर हम डेरान अही। तनिक सोचा कि हम पचे केँतना डेरान होबइ जब कीला जाब जे जगह पूरा पलिस्ती फउज स भरि अहइ।”

4दाऊद फुन यहोवा स पूछेस। यहोवा दाऊद क जवाब दिहस, “कीला क जा। मईँ तोहार मदद पलिस्तियन क हरावइ मैं करब।” 5एँह बरे दाऊद अउ ओकर मनई कीला गएन। दाऊद क मनइयन पलिस्तियन स लड़ेन। दाऊद क मनइयन पलिस्तियन क हराएन अउ ओनकइ गइयन क लइ लिहन। इ तरह दाऊद कीला क मनइयन क बचाएस। 6जब एब्यातार दाऊद क लगे पराइके गवा रहा तबहिँ एब्यातार आपन संग एक ठु एपोद संग लइ गवा रहा।

7लोगन साऊल क सूचना दिहिस कि अब दाऊद कीला में बाटइ। साऊल कहेस, “परमेस्सर दाऊद क पकड़इ बरे

मोका एक अवसर दइ दिहस ह। दाऊद खुद जाल में फँस गवा अहइ। उ अइसे कस्बा में गवा अहइ जेहमाँ फाटक अउ छड़ अहइ।” 8साऊल जुद्ध करइ बरे आपन सारी फउज क एक संग बोलाएस। उ पचे आपन तइयारी कीला जाइ अउ दाऊद अउ ओकरे मनइयन क पकड़ेन बरे किहस।

9दाऊद क पता लाग कि साऊल ओकरे खिलाफ चाल चलत अहइ। दाऊद तब याजक एब्द्यातार स कहेस, “एपोद लइ आवा।”

10दाऊद बिनती किहस, “यहोवा इस्त्राएल क परमेस्सर, मई सुनेउँ ह कि साऊल कीला में जाइ अउ मोरे कारण ऐँका नास करइ क चाल चलत बाटइ। 11का साऊल कीला में आइ? का कीला क मनई मोका साऊल क दइ देइहीं? यहोवा इस्त्राएल क परमेस्सर, मई आपक नउकर हउँ। कृपा कइके मोका बतावई।”

यहोवा जवाब दिहस, “साऊल आइ।”

12दाऊद फुन पूछेस, “का कीला क मनई मोका अउ मोरे मनइयन क साऊल क दइ देइहीं।”

यहोवा जवाब दिहस, “उ पचे अइसा करहीं।”

13ऐँह बरे दाऊद अउ ओकर मनई कीला क तजि दिहस। हुआँ लगभग छः सौ मनई रहेन जउन दाऊद क संग गएन। दाऊद अउ ओकर मनई एक ठउर स दूसर ठउर टहरत रहेन। साऊल क पता लग गवा कि दाऊद कीला स बचि निकरा। ऐँह बरे साऊल उ नगर क नहीं गवा।

### साऊल दाऊद क पाछ करत ह

14दाऊद मरुभूमि क चला गवा अउर हुआँ किला में ठहर गवा। दाऊद जिफ क रेगिस्तान क पहाड़ी देस में भी गवा। साऊल रोज दाऊद क हेरत रहा, मुला यहोवा साऊल क धरइ नहीं देत रहा।

15दाऊद जीप क रेगिस्तान होरेस में भी ठहरा रहा। उ ससान रहा काहेकि साऊल ओका मारइ आवत रहा। 16मुला साऊल क पूत योनातान होरेस में दाऊद स भेंटइ गवा। योनातान परमेस्सर प पक्का बिस्सास धरइ बरे दाऊद क मदद किहस। 17योनातान दाऊद स कहेस, “डेराअ जिन। मोर बाप साऊल तोहका नहीं पाउब। तू इस्त्राएल क राजा बनब्या। मई तोहरे बाद दूसर दर्जा प रहब। मोर बाप इ भी जानत हीं।”

18योनातान अउ दाऊद दुइनउँ यहोवा क समन्वा समझौता किहन। तब योनातान घर चला गवा। अउर दाऊद होरेस में टिका रहा।”

### जिप क मनई दाऊद क बारे में साऊल क बतावत हीं

19जिफ क मनई गीबा में साऊल क लगे आएन। उ पचे साऊल स कहेन, “दाऊद हम पचन क पहुँटा में लुकान अहइ। उ होरेस क कीला में बाटइ। उ हकीला पहाड़ी प यसीमोन क दक्खिन में अहइ। 20महराज आप जब चाहई आवई। इ हम सबन क कर्तब अहइ कि हम पचे आपक दाऊद क दइ देइ।”

21साऊल जवाब दिहस, “यहोवा आप लोगन क मोर मदद बरे असीसई। 22जा अउ ओकरे बारे में अउर जिआद

पता लगावा। पता लगावा कि दाऊद कहाँ रहत ह। अउर इ तोहा कि दाऊद क हुवाँ कउन लखेस ह। साऊल सोचेस, ‘दाऊद चतुर बाटइ। उ मोका भरमावइ क कोसिस करत बाटइ।’ 23लुकाइ क जउन ठउरन क प्रयोग दाऊद करत बाटइ, ओन सबहिँ ठउरन क पता लगावा। अउर मोरे लगे वापिस लउटि आवा अउ मोका सब कछू बतावा। तबहिँ मई तोहरे संग चलब। जदि दाऊद उ पहुँटा में होइ तउ मई ओकर पता लगाउब। मई ओकर पता तब भी लगाइ लेब जदि मोका यहूदा क सबहिँ परिवारन क तलासी लेइ क होइ।”

24तब जीपी निवासी साऊल क अगवा अगवा जीपी क लौटि आएन।

दाऊद अउर ओकर मनई मओन क रेगिस्तान में रहेन। उ पचे यसीमोन क दक्खिन में रेगिस्तानी पहुँटा में रहेन। 25साऊल अउ ओकर मनई दाऊद क खोजइ गएन। मुला मनइयन दाऊद क होसियार किहेन। उ पचे बताएन कि साऊल ओनका हेरत अहइ। दाऊद तब माओन क रेगिस्तान में ढलान कईती “चट्टान” प गवा। साऊल सुनेस कि दाऊद माओन क रेगिस्तान में गवा अहइ। ऐँह बरे साऊल उ ठउर प दाऊद क धरइ गवा।

26साऊल पहाड़े क एक कईती रहा। दाऊद अउ ओकर मनई उहइ पहाड़े क दूसर कईती रहेन। दाऊद साऊल स दूर निकरइ बरे हाली करत रहा। साऊल अउ ओकर सिपाही पहाड़े क चारिहुँ कईती अउ ओकरे मनइयन क धरइ जात रहेन।

27मुला साऊल क लगे एक दूत आवा। दूत कहेस, “हाली हाली करा। पलिस्ती हम पचन प हमला करत बाटेन।”

28ऐँह बरे साऊल दाऊद क पाछ करब तजि दिहस अउ पलिस्तिन स लड़इ निकरि गवा। इहइ कारण बाटइ कि मनइयन उ ठउर क “फिसलनी क चट्टान” कहत हीं। 29दाऊद माओन क रेगिस्तान क तजि दिहस अउ एनगोदी क लगे किला में गवा।

### दाऊद साऊल क झेंपावत ह

24 जब साऊल पलिस्तिन क पाछा कइके भगाइ दिहस, तब मनइयन साऊल स कहेन, “दाऊद एनगोदी क लगे रेगिस्तानी इलाका में बा।”

25ऐँह बरे साऊल पूरा इस्त्राएल क तीन हजार मनइयन क चुनेस। साऊल इ मनइयन क संग लिहस अउ दाऊद अउर ओकर मनइयन खोज करब सुरु किहेन। उ पचे जंगली बोकरियन क चट्टान क नचिके हेरेन। 3साऊल सड़क क किनारे भेड़ी क बारा क लगे आवा। हुवाँ निअरे एक ठु गुफा रही। साऊल खुद गुफा में आराम करइ बरे गवा। दाऊद अउ ओकर मनई बहोत पाछे उ गुफा में लुकान रहेन। 4मनइयन दाऊद स कहेन, “आजु उ दिन अहइ जेकरे बारे में यहोवा बात किहेन ह। यहोवा तोहसे कहे रहेन, ‘मई तोहार दुस्मनन क तोहका देब, तब तू जउन चाहा आपन दुस्मनन क संग कइ सकब्या।’”

तब दाऊद साऊल क लगे चुपचाप आवा। दाऊद साऊल क लबादे क एक कोना काट लिहस। साऊल दाऊद क नहीं लखेस। 5 पाछे साऊल क लबादे क एक कोना काट लिहे क दाऊद क पछतावा भवा। 6 दाऊद आपन मनइयन स कहेस, “यहोवा मोका आपन सुआमी क संग कछु भी अइसा करइ स रोका। साऊल यहोवा क चुना भवा राजा अहइ। मोका साऊल क खिलाफ कछू भी नहीं करइ चाही। उ यहोवा क चुन लीन्ह गवा राजा बाटइ।” 7 दाऊद इ बात आपन मनइयन क रोकइ बरे कहेस। दाऊद आपन मनइयन क साऊल प हमला करइ नहीं दिहस।

साऊल गुफा तजि दिहस अउ आपन राहे प चला। 8 दाऊद गुफा स निकरा। दाऊद साऊल क जोर स पुकारेस, “मोर पभूँ महाराज।”

साऊल पाछे घूमिके लखेस। दाऊद आपन माथा भुइँया प धइके पैलगी किहस। 9 दाऊद साऊल स कहेस, “आप काहे सुनत ही। जब मनई इ कहत ही कि ‘दाऊद आप प वार करइ क कुचाल गूँथत मथत बाटइ?’ 10 मई आप क चोट पहुँचावइ नहीं चाहत हई। आप एँका आपन आँखिन स लखत ही। यहोवा आजु एँका आप क गुफा में मोरे हाथे में दइ दिहे अहई। मुला मई आपक मारि डवइ स इन्कार किहेउँ ह। मई आप प दया किहेउँ ह। मई कहेउँ, ‘मई आपन सुआमी क चोट नहीं पहुँचावइ। साऊल यहोवा क चुना भवा राजा अहइ।’ 11 मोरे हाथे में इ ओढ़ना क टूका क लखा। मई आप क लबादे क एक टूका काटि लिहेउँ ह। मई आप क मारि सकत हई, मुला मई इ नहीं किहेउँ ह। अब मई चाहत हई कि आप एँका समुझई। मई चाहत हई कि आप क खिलाफ कउनो कुचाल नहीं बनावत हई। मई आपक कउनो बुराई नहीं किहेउँ ह। मुला आप मोर पाछा करत ही अउर मोका मारि डवइ चाहत ही। 12 यहोवा क निआव करइ द्या। यहोवा आप क उ अनिआव क सजा देइहीं जउन आप मोरे संग किहेन ह। मुला मई आपन आप आप स न जूझब। 13 पुरान कहावत अहइ:

‘बुरी चीज बुरी मनई स आवत ही।’

मई कछू भी बुरा नहीं किहेउँ ह। मई बुरा मनई नहीं हई। एँह बरे मई आप प चोट नहीं करब। 14 आप केकर पाछा करत बाटेन। इस्त्राएल क राजा केकरे खिलाफ लइइ आवत अहई? आप अइसे कउनो क पाछा नहीं करत बाटेन जउन आपक चोट पहुँचाइ। इ अइसा ही बाटइ जइसेन आप एक ठु मरा कूकुर या मच्छर क पाछा करत ही। 15 यहोवा क निआव करइ द्या। ओनका आपन अउ मोरे बीच निर्णय करइ द्या। उ हालत क वास्तविकता क देखब अउर मोर मामला क वकालत करब। परमेस्सर मोका तोहार रच्छा करब।”

16 दाऊद आपन इ कहब खतम किहेस, साऊल पूछेस, “मोर पूत दाऊद, का उ तोहार आवाज अहइ?” तब साऊल रोवइ लाग। साऊल बहोत रोएस। 17 साऊल कहेस, “तू सही अहा अउर मई गल्ली पइ अहई। तू हमरे बरे नीक रहया। मुला मई तोहरे बरे बुरा रहेउँ। 18 तू उ बतियन क बताया जेनका तू मोरे बरे किहा। यहोवा मोका तोहरे हवाला किहेस, मुला तू मोका नहीं मारि डया। 19 एहसे पता चलत ह कि

मई तोहार दुस्मन नहीं अहई। यदि कउनो आपन दुस्मन क धरत ह तउ उ ओका बच निकरइ नहीं देत। उ आपन दुस्मन बरे नीक काम नहीं करत। यहोवा तोहका एँकर ईनाम देई काहेकि तू आजु मोरे बरे नीक रहया। 20 मई जानत हई कि तू नवा राजा बनब्या। तू इस्त्राएल क राज्ज क ऊपर करब्या। 21 अब मोसे एक प्रतिज्ञा करा। यहोवा क नाउँ लइके इ प्रतिग्या करा कि तू मोरे सन्तानन क न मरब्या। प्रतिग्या करा कि तू मोरे बाप क परिवार स मोर नाउँ मिटउब्या नहीं।”

22 एँह बरे दाऊद साऊल स प्रतिग्या किहस। दाऊद प्रतिग्या किहेस कि उ साऊल क परिवार क न मारी। तब साऊल लउटि गवा। दाऊद अउ ओकर मनई किला में चला गएन।

### दाऊद अउ नाबाल

**25** समूएल मरि गवा। इस्त्राएल क सबहिँ मनइयन बटुर गएन अउर उ पचे समूएल क मउत प अफसोस परगट किहेन। उ पचे समूएल क ओकरे घर रामा में दफनाइ दिहेन। तबइ दाऊद परन क रेगिस्तान में चला गवा।

2 हवाँ एक ठु मनई रहा जउन माओन में रहत रहा। उ बहोत धनी मनई रहा। ओकरे लगे तीन हजार भेड़ी अउर एक हजार बोकरी रहिन। उ कर्मेल में आपन भेड़ी क ऊन काटत रहा। 3 उ मनई क नाउँ नाबाल रहा। उ कालेब क परिवार क रहा। ओकरी मेहरारु क नाउँ अबीगैल रहा। उ बुद्धिमती अउ बहोतइ सुन्नर मेहरारु रही। मुला नाबाल क्रूर नीच रहा।

4 दाऊद रेगिस्ताने में रहा, अउर उ सुनेस कि नाबाल आपन भेड़ी क ऊन काटत बाटइ। 5 एँह बरे दाऊद दस जवानन क नाबाल स बात करइ पठएस। दाऊद कहेस, “कर्मेल जा। जबल स भेंटा अउर ओका मोरी कइँती स ‘पैलगी’ कहा।” 6 दाऊद नाबाल बरे इ सदेसा पठएस, “मोका आसा अहइ कि तू अउ तोहार परिवार सुखी अहइ। मई आसा करत हई कि जउन कछू तोहार अहइ, ठीक ठाक बाटइ। 7 मई सुनेउँ ह कि तू आपन भेड़ी स ऊन काटत बाट्या। तोहार गइरियन कछू समइ तलक हम पचन क संग रहत रहेन। अउर हम पचे ओनका कउनो कस्ट नहीं दीन्ह। जब तलक तोहार गइरिया कर्मेल में रहेन, हम ओनसे कछू नहीं लीन्ह। 8 आपन सेवकन स पूछा अउर उ पचे बताइ देइहीं कि इ सब कछू फुरे अहइ। कृपा कइके हमरे जवानन प दया करा। इ खुसी क मौका प हम पचे आपक लगे पहुँचत अही। कृपा कइके आप जउन कछू चाहई, दइ देई। कृपा कइके इ मोरे बरे, आपन मीत दाऊद बरे करई।”

9 दाऊद क मनई नाबाल क लगे गएन। उ पचे दाऊद क सँदेसा नाबाल क दिहन। 10 मुला नाबाल ओनकइ बरे छोटपन स बेउहार किहस। नबत कहस, “दाऊद अहइ कउन? इ जेसे क पूत कउन होत ह? इ दिनन ढेरिके दास बाटेन जउन आपन सुआमी लोगन क हिँओँ स पराइ ग अहई। 11 मोरे लगे रोटी अउ पानी अहइ। अउर मोरे लगे उ माँस भी अहइ जेका मई भेड़ी स ऊन कतरइ वालन नउकरन बरे

मारिके लिहेउँ ह। मुला मई ओका उ मनइयन क नाहीं दइ सकत हउँ जेनका मई जानत भी नाहीं हउँ।”

12दाऊद क मनइयन लउटि गएन अउर नाबाल जउन कछू कहे रहा दाऊद क बताइ दिहस। 13तब दाऊद आपन मनइयन स कहेस, “आपन तरवार उठावा।” एँह बरे दाऊद अउ ओकर मनइयन तरवार उठाइ लिहन। लगभग चार सौ मनई दाऊद क संग गएन। अउर दुइ सौ मनई सामान क संग रुका रहेन।

### अबीगैल मसीबत क रोकत ह

14नाबाल क नउकरन मँ स एक तु नाबाल क मेहरारु अबीगैल स बतियान। नउकर कहेस, “दाऊद रेगिस्तान स आपन दूतन क हमरे सुआमी (नाबाल) क लगे पठएस। मुला नाबाल दाऊद क दूतन क संग आपन निचकई क बेउहार किहस। 15इ पचे हम पचन बरे बहोत भला रहेन। हम पचे भेड़ी लइके खेतन मँ जात रहेन। दाऊद क मनइयन हमरे संग बराबर रहेन। अउर उ पचे हमरे संग कउनो बुरा नाहीं किहेन। उ पचे पूरे समइ मँ हमार कछू भी नाहीं चोराएन। 16दाऊद क मनइयन दिन रात हमार रच्छा किहेन। उ पचे हम लोग बरे चहरदेवार क नाई रच्छक रहेन। उ पचे हमार रच्छा तबहिं किहेन जब हम पचे भेड़ी क रखवारी करत भए ओनकइ संग रहेन। 17अब इ बारे मँ सोचा अउर तय करा कि तू का कइ सकत ह। नाबाल कछू कहेस उ मूरखपन स भरा अहइ। हमार सुआमी अउर ओकरे समूचइ परिवार बरे अला बला आवति अहइ।”

18अबीगैल हाली किहस। उ दुइ सौ पाव रोटी, दुइ दाखरस स भरा मसक, पाँच तु भुना भइ भेड़ी, लगभग एक बुसल भुना भवा अनाज, दुइ क्वार्टि मुनक्का अउर दुइ सौ झूरान अंजीर क टिकिया लिहेस अउ एँका गदहन प लादि दिहस। 19तब अबीगैल आपन नउकरन स कहेस, “आगे चलत रहा। मई तोहरे पाछे आवति अहउँ।” मुला उ आपन भतार स कछू नाहीं कहेस।

20अबीगैल आपन गदहा प बइठी अउर पहाड़े क दूसर कइँती पहुँची। उ दूसर कइँती स आवत भइ दाऊद अउ ओकरे मनइयन स भेटेस।

21अबीगैल स मिलइ क पहिले दाऊद कहत रहा, “मई नाबाल क धन दौलत क रच्छा रेगिस्तान मँ कीन्ह। मई चिन्तित रहा कि ओकर कउनो भेड़ी खोवइ नाहीं। मई इ सब कछू बिना लिहे किहेउँ। मई ओकरे बरे नीक किहेउँ। मुला उ मोरे बरे कछू नीक नाहीं किहे रहा। 22परमेस्सर मोका सजा देइ यदि मई नाबाल क परिवारे क कउनो एक मनई क जिअत रहइ देउँ।”

23ठीक उहइ टेमें प अबीगैल आइ। मुला जब अबीगैल दाऊद क लखेस। उ हाली हाली आपन गदहा स उतरि पड़ी। उ दाऊद क समन्वा प्रणाम करइ निहुरी। उ आपन माथा भुइँया प टेकेस। 24अबीगैल दाऊद क गोड़े प गिर पड़ी। उ कहेस, “मान्, कृपा कइके मोका कछू कहइ देई। जउन मई कहउँ ओका सुना। जउन कछू भवा ओकरे बरे मोका दोख द्या। 25मई उ मनइयन क नाहीं लखेउँ जेनका आप पठएन ह। साहब! उ बेकार मनई (नाबाल) प धियान जिन द्या। उ

ठीक उहइ अहइ जइसे ओकर नाउँ अहइ। अउर उ फुरे ‘मूरख’ अहइ। 26यहोवा आप क बेकसूर मनइयन क मारइ स रोकेस ह। फुरइ जइसे यहोवा हमेसा रहत ह वइसे आप जिअत अहई। मई आसा करत हउँ कि आपक दुस्मन लोग अउर जउन आप क नोस्कान पहुँचावइ चाहत हीं, उ सबइ नाबाल क राज्ज मँ होइहीं। 27अब मई आप बरे इ भेंट लइ आइ अहउँ। कृपा कइके इ चीजन क आप उ मनइयन क दइ देई जउन आप क पाछे चलत हीं। 28जुर्म करइ बरे मोका छिमा करई। मई जानत हउँ कि यहोवा आप क परिवार क मजबूत करिहीं अउ तोहरे परिवारे स ढेर क राजा अइहीं। यहोवा इ करिहीं काहेकि आप सब ओनके बरे जुद्ध करत हीं। मनइयन तब तलक आप मँ बुराई न पइहीं जब तलक आप जिअत रइहीं। 29जदि कउनो मनई आप क मारि डवइ क पाछा करत ह, तउ यहोवा आपक परमेस्सर आपक जिन्नगी क रच्छा करिहीं। मुला यहोवा ओकर जिन्नगी क अइसे दूरि लोकइहीं जइसे गुलेल स पाथर लोकाइ दीन्ह जात ह। 30यहोवा आप बरे बहोत स नीक चीजन क करइ क प्रण किहेस ह। अउर यहोवा आपन सबहिं वचन क पूरा करिहीं। परमेस्सर आप क इस्त्राएल क राजा बनइहीं। 31अउर आप बेकसूर मनई क मारि डवइ क अपराधी न होइहीं। अउ आप इ जाल मँ न फँसिहीं। मेहराबानी कइके मोका उ टेमें मँ याद राखा जब यहोवा आप क सफलता देइ।”

32दाऊद अबीगैल क उत्तर दिहेस, “इस्त्राएल क परमेस्सर, यहोवा क गुण गावा। परमेस्सर तोहका मोसे भेंटइ पठए अहइ। 33परमेस्सर तोहार नीक निर्णय बरे तोहका आसीबादि देई। तू आज मोका बेकसूर मनइयन क मारइ स बचावा। 34सचमुच जइसे इस्त्राएल क परमेस्सर, यहोवा हमेसा रहत ह, जदि तू जल्दी स मोसे भेंटइ न आइ होती तउ भियान भिन्सारे तलक नाबाल क परिवार क कउनो भी मनई जिअत नाहीं बच पावत।”

35तउ दाऊद अबीगैल क भेंट क अंगीकार किहस। दाऊद ओसे कहेस, “सान्ति स घर जा। मई तोहार बातन क सुनेउँ ह अउर मई उहइ करब जउन तू करइ क कह्या ह।”

### नाबाल क मउत

36अबीगैल नाबाल क लगे लउटी। नाबाल घरे मँ मौजूद रहा। नाबाल एक तु राजा क तरह भोज खात रहा। नाबाल जी भरिके दाखरस पिए रहा। उ बहोत जियादा पिए रहा। एँह बरे अबीगैल नाबाल क दूसर भिन्सारे तलक कछू भी नाहीं बताएस। 37दूसर दिन भिन्सारे ओकर नसा उतरा। एँह बरे ओकर मेहरारु हर बात बताइ दिहस। फिन नाबाल क दिल क दउरा पड़ि गवा। उ चट्टान क नाई कठोर होइ गवा। 38दस दिनाँ क पाछे यहोवा नाबाल क मरि जाइ दिहस।

39दाऊद सुनेस कि नाबाल मरि गवा अहइ। दाऊद कहेस, “यहोवा क गुन गावा। नाबाल मोरे खिलाफ खराब बात किहेस ह, मुला यहोवा मोर समर्थन किहस। यहोवा मोका पाप करइ स बचाएस। अउर यहोवा नाबाल क मरि जाइ दिहस काहेकी उ अपराध किहे रहा।” तब दाऊद अबीगैल क सँदेसा पठएस। दाऊद ओका आपन मेहरारू होइ क कहेस। 40दाऊद क नउकर कार्मल गएन अउ अबीगैल स

कहेस, “दाऊद हम पचन क तोहका लइ आवइ क पठएस ह। दाऊद चाहत ह कि तू ओकर मेहरारु बना।”

41अबीगैल भुइँया तलक आपन माथा निहुराएस। उ कहेस, “मई आपक दासी अहउँ। मई सुआमी क सेवकन क गोड़ धोवइ बरे तइयार अहउँ।”

42अबीगैल फउरन गदूहा प बइठी अउ दाऊद क दूतन क संग चल दिहस। अबीगैल आपन संग पाँच ठु नउकरानी लइ आइ। उ दाऊद क मेहरारु बनी।

43दाऊद यिज्रेल क अहिनोअम स बियाह किहेस। अहिनोअम अउ अबीगैल दुइनउँ दाऊद क मेहरारु रहिन। 44दाऊद साऊल क बिटिया मीकल स भी बियाह किहे रहेस। मुला साऊल ओका लइ लिहस अउर ओका एक मनई जेकर नाउँ पलती रहा, जउन लैस क पूत अउर गल्लीम क निवासी रहा ओकर क संग बियाही दिहस।

### दाऊद अउ अबीसै साऊल क डेरा में घुसत हीं

26 जीप क मनई साऊल स भेंटइ गिबिया गएन। उ पचे साऊल स कहेन, “दाऊद हकिला क पहाड़ी में लुकान बा। इ पहाड़ी यसीमोन क ओह पार बा।” 2साऊल जीप क रेगिस्तान में गवा। साऊल तीन हजार सिपाहियन क खुद समूचइ इस्त्राएल स छोटिके साथ लिहस। साऊल अउ इ मनई जीप क रेगिस्ताने में दाऊद क हेरत रहेन। 3साऊल आपन डेरा हकीला क पहाड़ी प डाएस। डेरा सड़क क किनारे यसीमोन क पार रहा।

दाऊद रेगिस्तान में रहत रहा। दाऊद क पता लाग कि साऊल ओकर हुवाँ पाछा किहेस ह। 4तब दाऊद आपन जासूसन क पठएस अउ दाऊद क पता लाग कि साऊल हकीला क पहाड़ी प आइ गवा अहइ। 5तब दाऊद उ ठउरे प गवा जहाँ साऊल आपन डेरा डाए रहा। दाऊद लखेस कि साऊल अउ अब्नेर कहाँ सोवत अहइँ। नेर क पूत अब्नेर साऊल क फउज क सेनापति रहा। साऊल डेरा क बीच सोवत रहा। सारी फउज साऊल क चारिहुँ कइँती रही।

6दाऊद हिल्ती अहीमेलेक अउ यरूयाह क पूत अबीसै स बात किहस। अबीसै योआब क भाई रहा। उ ओसे कहेस, “मोरे संग साऊल क नगिचे ओकरे डेरा में कउन चली?”

अबीसै उत्तर दिहस, “मई तोहरे संग चलबा।”

7तब भइ। दाऊद अउ अबीसै साऊल क डेरा में गएन। साऊल डेरा क बीच सोवा रहा। ओकर भाला भुइँया में ओकरे मूँडे क लगे धँसा रहा। अब्नेर अउ फउज साऊल क चारिहुँ कइँती सोइ रही। 8अबीसै दाऊद स कहेस, “आजु, परमेस्सर तोहरे दुस्मनन क हरवइ दिहेन ह। मोका साऊल क ओकरे भाला स ही जमीन में भोक देइ द्या। मई ओका एक ही वार में मार देबा।”

9मुला दाऊद अबीसै स कहेस, “साऊल क जिन मारा। जउन कउनो चुना भवा राजा क मारत ह उ जरुर सजा पावत ह। 10इ सच अहइ यहोवा जब तलक रही उ साऊल क खुद ही सजा देइ। होइ सकत ह साऊल आपन मउत पाइ या इ होइ सकत ह कि साऊल जुद्ध में मारा जाइ। 11मुला मई पराथना करत हउँ कि यहोवा आपन चुना भवा राजा क मोसे

चोट न करवावइ। अब पानी क गगरी अउर भाला उठावा जउन साऊल क मूँडे क लगे बा। तब हम पचे चली।”

12एँह बरे दाऊद भाला अउ पानी क गगरी लिहस जउन साऊल क मूँडे क लगे रहेन। तब दाऊद अउ अबीसै साऊल क डेरा क तजि दिहस। कउनो मनई एकरे बारे में न जान सका। कउनो भी मनई जागा नहीं। साऊल अउ ओकर सिपाही सोवत रहेन काहे यहोवा ओनका गहिर नींद में डइ दिहे रहा।

### दाऊद साऊल क फुन लजावत ह

13दाऊद घाटी क दूसर कइँती निकरि गवा। साऊल क डेरा स घाटी क पार पहाड़े क चोटी प खड़ा रहा। दाऊद अउ साऊल क डेरा बहोत दूरी प रहेन। 14दाऊद सेना अउ नेर क पूत अब्नेर क नरियाइके गोहराएस, “अब्नेर, मोका जवाब द्या।”

अब्नेर पूछेस, “तू कउन अहा? तू राजा क काहे बोलावत अहा?”

15दाऊद जवाब दिहस, “तू एक मनई अहा। मोसे कहा, का तू नहीं अहा? अउर तू इस्त्राएल में कउनो भी दूसर मनई स नीक अहा। तब तू आपन सुआमी, राजा क रच्छा काहे नहीं किहा? एक मामूली मनई तोहरे डेरा में तोहार सुआमी, राजा क मारइ आवा। 16तू बहोतइ बड़ी गलती किहा। यहोवा क जिन्नगी क किरिया तोहका अउर तोहरे सिपाहियन क मरि जाइ चाही। काहेकि तू आपन सुआमी अउर यहोवा क चुना भवा राजा क रच्छा नहीं किहा। साऊल क मूँडे क लगे भाला अउ पानी क गगरी क खोज करा। उ सबइ कहीं बाटेन?”

17साऊल दाऊद क अवाज पहिचानत रहा। साऊल कहेस, “मोर पूत दाऊद, का इ तोहार अवाज बाटइ?”

दाऊद जवाब दिहस, “मोर सुआमी अउ राजा, हँ! इ मोर अवाज अहइ।” 18दाऊद इ भी पूछेस, “महाराज, आप मोर पाछा काहे करत अहइँ? मई कउन सी गलती किहेउँ ह? मई का करइ क अपराधी अहउँ? 19मोर सुआमी अउ राजा, हमरउँ सुना। जदि यहोवा मोरे खिलाफ कोहाइ बरे किहेन ह तउ ओनका एक ठु भेंट अंगीकार करइ द्या। जदि मनई मोरे खिलाफ आपक कोहाएन ह तउ यहोवा क जरिए ओनकइ बरे कछू मुसीबत आवइ द्या। मनइयन मोका इ देस तजइ बरे मजबूर किहन ह, जेका यहोवा मोका दिहन ह। लोग मोसे कहेन, ‘जा। बिदेसी मनइयन क संग रहा। जा दूसर देवतन क पूजा करा।’ 20मोका यहोवा क हाजिरी स दूर जिन मरइ द्या। इस्त्राएल क राजा एक मच्छर क हेरइ निकरा बा। आप उ मनई क तरह अहइँ जउन पहाड़े में तीतर क सिकार करइ निकरा होइँ।”

21तबहिं साऊल कहेस, “मई पाप किहेउँ ह। मोर पूत दाऊद लउटि आवा। आज तू देखेइ दिहा कि मोर जिन्नगी तोहरे बरे अनमोल बाटइ। यह बर मई तोहका चोट पहुँचावइ क कोसिस न करब। मई मूरखपन क काम किहेउँ ह। मई एक ठु बहोत बड़ी गलती किहेउँ ह।”

22दाऊद जवाब दिहस, “राजा क भाला इ बाटइ। आपन कउनो नउ जवान क हिऔ आवइ द्या अउर उ लइ जाइ।

23यहोवा मनइयन क करमे क फल देत हीं। जदि उ नीक करत ह तउ ओका ईनाम देत हीं अउर ओका सजा देत हीं जउन बुरा करत ह। यहोवा आज आप क मोका हरावइ दिहन, मुला मई यहोवा क चुना भवा राजा प चोट नाहीं करब। 24आजु मई आपक देखेइ दिहेउँ ह कि आपक जिन्नगी मोरे बरे अनमोल अहइ। इ तरह यहोवा देखेइहीं कि मोर जिन्नगी ओनकइ बरे महत्व क बाटइ। यहोवा मोर रच्छा हर मुसीबते स करिहीं।”

25तब साऊल दाऊद स कहेस, “मोर पूत दाऊद, परमेस्सर तोहका आसीबादि देई। तू बड़का कारज करब्या अउ सुफल होब्या।”

दाऊद आपन राहे प गवा, अउर साऊल घर लउटी आवा।

### दाऊद पलिस्तियन क संग रहत ह

27 दाऊद सोचेस, “होइ सकत ह साऊल मोका कउनो दिन धइ लेइ। सबन ते बढिया इहइ अहइ मई कि पलिस्तियन क देस स बचि निकरँ। तब साऊल इस्राएल मँ मोर खोज मँ थक जाब इ तरह मई साऊल स बचि निकरब।”

28एह बरे दाऊद अउ ओकर छः सौ मनइयन इस्राएल तजि दिहन। उ सबइ माओक क पूत आकीस क लगे गएन। आकीस गत क राजा रहा। 29दाऊद, ओकर मनइयन आपन पूरा परिवार क साथ आकीस क संग गत मँ रहइ लागेन। दाऊद क संग ओकर दुइ पत्नी रहिन। उ पचे यिज्जेली क अहीनोअम अउ कार्मेल क अबीगैल रहिन। अबीगैल नाबाल क रँइ रही। 30मनइयन साऊल स कहेन कि दाऊद गत क पराइ ग अहइ। अउर साऊल ओकर खोज बन्द कइ दिहस।

31दाऊद आकीस स कहेस, “जदि आप मोसे खुस अहई तउ मोका आपन देस क नगरन मँ स एक मँ एक ठउर दइ देई। मई आप क सिरिफ एक सेवक अहउँ। मोका हुवाँ रहइ चाही, आप क संग हुवाँ रजधानी-सहर मँ नाहीं।”

32उ दिना आकीस दाऊद क सिकलगा नगर दिहस। अउर तब स सिकलगा अब तलक यहूदा क राजा लोगन क बना अहइ। 33दाऊद पलिस्तियन क संग एक बरिस अउ चार महीना रहा।

### दाऊद आकीस राजा क मूरख बनावत ह

34दाऊद अउ ओकर मनई अमालेकी अउ गसूर मँ रहइवालन मनइयन क संग जुद्ध करइ गएन। दाऊद क मनइयन ओका हराएन अउ ओनकइ धन दौलत लइ लिहन। लोग उ पहँटा मँ सुर क नगिचे तेलम स लइके लगातार मिस्र तलक रहत रहेन। 35दाऊद उ पहँटा मँ मनइयन क हराएस। दाऊद ओनकइ सब भेड़िन, पसु, गदहा, ऊँट अउ ओढ़ना लिहस। तब उ इ सबन क आकीस लइ आवा।

36दाऊद इ कई दाईं किहेस। हर दाईं आकीस पूछत कि उ कहाँ लइ अउ ओन चीजन क कहाँ स लइ आवा। दाऊद कहत रहा, “मई यहूदा क दक्खिन कईती लइ।” इ “सब मई यरहमेलियन क दक्खिनी भाग मँ लइ” या “मई

केनियन क दक्खिनी भाग मँ लइ।” 37दाऊद गत क कबहुँ जिअत मेहरारु या मनसेधू नाहीं लइ आवा। दाऊद सोचेस, “जदि हम कउनो मनई क जिअत रहइ देइत ह तउ उ आकीस स कहि सकत ह कि सचमुच मई का किहेउँ ह।”

दाऊद पूरे टेमें, जब तलक पलिस्तियन क देस मँ रहा, इहइ किहस। 38आकीस दाऊद प पतियाब सुरु किहस। आकीस अपने आप सोचेस, “अब दाऊद क आपन लोग ही ओसे घिन करत हीं। इस्राएलियन दाऊद स बहोत जिआदा घिन करत हीं। अब दाऊद मोर सेवा करत रही।”

### पलिस्ती जुद्ध क तइयारी करत हीं

28 पाछे पलिस्तियन आपन फउज क इस्राएल क खिलाफ लइइ बरे बटोरेन। आकीस दाऊद स कहेस, “का तू समुझत ह कि तोहका अउ तोहरे मनइयन क इस्राएलियन क खिलाफ मोरे संग लइइ जाइ चाही?”

29दाऊद जवाब दिहस, “सचमुच ही, तब आप खुद ही लखई कि मई का करि सकत हउँ।”

आकीस कहेस, “बहोत अच्छा, मई तोहका आपन अंग रच्छक बनउब। तू हर समइ मोर रच्छा करब्या।”

### साऊल अउ एन्दोर क मेहररुअन

30समूह मर गवा। सबहिँ इस्राएलियन समूह क मउत प सोक मनाएन। उ पचे समूह क निवास सहर, रामा मँ ओका दफनाए रहेन।

एँकरे पहिले साऊल ओझा अउ भविस्स बतावइवालन क इस्राएल तजइ क मजबूर किहे रहा।

31पलिस्तियन जुद्ध क तइयारी किहन। उ पचे सूनेम आएन अउ उ ठउरे प डेरा ड्राएन। साऊल सबहिँ इस्राएलियन क बटोरेस अउ आपन डेरा गिलबो मँ ड्राएस। 32साऊल पलिस्ती सेना क लखेस, अउर उ डेराइ गवा। ओकर हिरदय डर स धइकइ लाग। 33साऊल यहोवा स बिनती किहेस, मुला यहोवा ओका जवाब नाहीं दिहस। परमेस्सर साऊल स सपन मँ बात नाहीं किहस। परमेस्सर ओका जवाब देइ बरे ऊरीम क नाहीं बइपरेस। परमेस्सर साऊल स बात करइ बरे नबियन क नाहीं बइपरेस। 34आखिर मँ साऊल आपन अफसरन स कहेस, “मोरे बरे कउनो अइसी मेहरारु क पता लगावा जउन ओझा होइ। तब मई ओसे पूछइ जाइ सकत हउँ कि जुद्ध मँ का होइ।” ओकर अफसरन जवाब दिहन, “एन्दोर मँ एक ठु ओझा अहइ।”

35साऊल कइउ तरह क ओढ़वा पहिरेस। साऊल इ एँह बरे किहस कि कउनो मनई इ न जान सकइ कि उ कउन अहइ। रात क उ आपन दुइ मनई क संग उ मेहरारु स भेंटइ गवा। साऊल उ मेहरारु स कहेस, “परेत स मोका मोर भविस्स बतवावा। उ मनई क बोलावा जेकर नाउँ मई लेउँ।”

36मुला उ मेहरारु साऊल स कहेस, “तू सचमुच ही जानत ह कि साऊल का किहेस ह। उ सोखा अउ भविस्स बतावइ वालन क इस्राएल देस तजि देइ क मजबूर किहस ह। तू मोका जाल मँ फौंसइ अउ मजबूर अउ मारि डवइ चाहत ह।”

10साऊल यहोवा क नाउँ लिहस अउ उ मेहरारु स प्रतिग्या किहस, “सचमुच ही यहोवा सास्वत अहइ। एँह बरे तोहका इ करइ क सजा न मिली।”

11मेहरारु पूछेस, “तू केका चाहत बाट्या कि मई ओका हिआँ बोलावउँ?”

साऊल जवाब दिहस, “समूहल क बोलावा।”

12अउर इ भवा। मेहरारु समूहल क लखेस अउ जोर स चिचियान। उ साऊल स कहेस, “तू मोका धोखा दिहा। तू साऊल अहा।”

13राजा मेहरारु स कहेस, “तू जिन डेराअ। तू का लखति अहा?”

उ मेहरारु कहेस, “मई एक तु परेत आतिमा क धरती स निकरिके आवति लखत हउँ।”

14साऊल पूछेस, “उ कइसा देखेइ पड़त ह?”

मेहरारु जवाब दिहस, “उ लबादा पहिरे एक बुढ़वा क तरह देखेइ पड़त ह।”

साऊल समुझ गवा कि उ समूहल रहा। साऊल धरती पर अपना माथा टेका। 15समूहल साऊल स कहेस, “तू मोका काहे परेसान किहा?” तू मोका ऊपर काहे बोलाया? साऊल जवाब दिहस, “मई मुसीबत में अहउँ। पलिस्ती मोरे खिलाफ लड़इ आवा अहई, अउर परमेस्सर मोका तजि दिहे अहइ। परमेस्सर अब मोका जवाब न देही। उ मोका जवाब देइ बरे नबियन या सपन क प्रयोग न करिहीं। इहइ कारण अहइ कि मई तोहका बोलाएँ। मई चाहत अहउँ कि तू बतावा कि मई का करउँ।”

16समूहल कहेस, “यहोवा तोहका तजि दिहे अहइ। अब उ तोहरे पड़ोसी क संग अहइ। एँह बरे तू मोका काहे बोलाया? 17यहोवा उहइ किहस जउन उ करइ क कहे रहा। यहोवा मोर प्रयोग तोहका बतावइ बरे कि उ का करी, किहेस ह। यहोवा तोहरे हाथे स राज्ज झपट लिहस ह। यहोवा तोहरे हाथ स राज्ज तोहरे पड़ोसियन में स एक क दइ दिहस। उ पड़ोसी दाऊद अहइ। 18तू यहोवा क आग्या क पालन नाहीं किहा। तू अमालेकियन क नास नाहीं किहा अउ ओनका नाहीं देखाया कि यहोवा ओन पइ केतँना कोहान बाटइ। उहइ कारण अहइ कि यहोवा तोहरे संग आजु इ किहस ह। 19फुन यहोवा तोहरे संग इस्राएलियन क पलिस्ती स हरवइहीं। अउर भियान तू अउ तोहार पूत हिआँ मोर संग होइहीं।”

20साऊल भुइयँ प भहराइ पड़ा। साऊल, समूहल स कही गइ बातन स डेरान रहा। साऊल बहोत दुर्बल होइ गवा काहेकि उ पूरा दिन अउ रात कउनो खइया नाहीं खाए रहा।

21मेहरारु साऊल क लगे आइ। उ लखेस कि साऊल फुरइ ससान रहा। उ कहेस, “लखा, मई आपक सेविका अहउँ। मई आपक आग्या क मानेउँ ह। मइ आपन जिन्नगी क खतरा में नाएँ ह अउर आप जउन कहेन ह, उहइ किहेउँ। 22अब कृपा कइके मोरउ सुना। मोका तोहरे बरे कछू खइया क देइ द्या। तब आप में ऐतनी सक्ती आइ कि आप अपने राहे प जाइ सकई।”

23मुला साऊल इनकार किहस। उ कहेस, “मई न खाब।” साऊल क अफसर लोग उ मेहरारु क साथ दिहन अउ

ओसे भोजन बरे बिनती किहन। साऊल ओनकइ बात सुनेस। उ भुइयँ स उठा अउ बिछउना प बइठा। 24उ मेहरारु क घरे में एक तु मोट बछवा रहा। उ हाली स बछवा क मारेस। उ कछू आटा लिहस अउ ओका हाथे स सानेस। तब उ बे खमीरे क रोटी बनाएस। 25मेहरारु भोजन साऊल अउ ओकरे अफसरन क अगवा धरेस। साऊल अउ ओकर अफसरन ओका खाएन। तउ उ लोग उठेन अउर उहइ रात क चली गएन।

### “दाऊद मोरे संग नाहीं आइ सकत”

29 पलिस्तियन आपन सब सिपाहियन क आपुस में बटोरेन। इस्राएलियन सोता क पास यिज्रेल में डेरा डाएन। 2पलिस्ती अफसर लोगन आपन एक सौ अउर एक हजार फउज क टुकड़ी क संग आगे बढ़त रहेन। दाऊद अउ ओकर मनई आकीस क संग फउज क पाछे पाछे कदम बढ़ावत चलत रहेन।

3पलिस्ती अफसरन पूछेस, “इ सबइ हिब्रू हिआँ का करत अहई।”

आकीस पलिस्ती अफसरन स कहेस, “इ दाऊद अहइ। दाऊद साऊल क अफसरन में स एक रहा। दाऊद मोरे लगे बहोत टेमें स बाटइ। मई दाऊद में कउनो दोख तब स नाहीं लखेउँ जब ते इ साऊल क तजेस अउ मोरे लगे आवा।”

4मुला पलिस्ती अफसर लोग आकीस पइ कोहाइ गएन। उ पचे कहेन, “दाऊद क वापस पठवा। दाऊद क उ सहर में वापस जाइ चाही जेका तू ओका दिहा ह। उ हम पचन क संग जुद्ध में नाहीं जाइ सकत्या। जदि उ हिआँ बाटइ तउ हम पचे आपन डेरा में एक दुस्मन क धरे अही। उ हमार आपन मनइयन क मारिके आपन राजा साऊल क खुस करी। 5दाऊद उहइ मनई अहइ जेकरे बरे इ गाना में इस्राएली मनई गावत अउ नाचत हीं:

‘साऊल हजारन क मारेस।

मुला दाऊद दसहु हजारन क मारेस।’

6एँह बरे, आकीस दाऊद क बोलाएस। उ कहेस, “यहोवा सास्वत अहइ, तू हमार भगत अहा। मई खुस होत जदि तू हमरी फउज में सेवा करत्या। जउने दिना स तू मोरे लगे आया ह, मई तोहमाँ कउनो दोख नाहीं पाएँ ह। मुला पलिस्ती अफसर लोगन तोहार बरे नीक नाहीं सोचत। 7अब तू सान्तिपूर्वक जा। पलिस्ती अफसर लोगन क खिलाफ कछू न करा।”

8दाऊद कहेस, “मई का गलती किहेउँ ह? जब ते मई तोहरे लगे आवा हउँ तू मोरे भीतर कउन तब स आजु तलक कउन बुराई लख्या ह। मोरे पभूँ राजा क दुस्मनन क खिलाफ तू मोका काहे नाहीं लड़इ देत्या?”

9आकीस उत्तर दिहस, “मई जानत हँउ कि मई तोहका पसन्द करत हँउ। तू परमेस्सर क हिआँ सरगदूत क समान अहा। मुला पलिस्ती अफसर अबहुँ कहत हीं, ‘दाऊद हम पचन क संग जुद्ध में नाहीं जाइ सकत।’ 10तइके भिन्सारे तू अउर तोहार लोग वापिस जइहीं। उ सहर क लउटि जा

जेका मँइ तोहका दिहेउँ ह। ओन अफसर लोग पइ धियान जिन दया जउन तोहरे बरे बुरी बात कहत हीं। ऐह बरे जइसे ही सूरज निकरइ चल दया।”

11ऐह बरे दाऊद अउ ओकर लोग तइके भिन्सार होत उठेन। उ पचे पलिस्तिन क देस में लौटि गएन। अउ पलिस्ती यिज्जेल क गएन।

### अमालेकी सिकलग पइ हमला करत हीं

**30** तिसरे दिना दाऊद अउ ओकर मनई सिकलग पहुँचि आएन। उ पचे लखेन कि अमालेकी सिकलग प हमला करत बाटइ। अमालेकी नेगव पहुँटा प हमला किहे रहेन। उ पचे सिकलग प हमला किहन अउ सहर क बारि दिहन। 2उ पचे सिकलग क मेहररुअन क बन्दी बनाइके लइ गएन। उ सबइ जवान अउ बूढन सबहिं क लइ गएन। उ पचे कउनो मनइयन क मारेन नाहीं। उ पचे सिरिफ ओनकइ लइके चलि दिहन।

3दाऊद अउ ओकर मनई सिकलग आएन। अउर उ पचे नगर क बरत पाएन। ओनकई मेहरारुअन, पूतन अउ बिटियन क बन्दी बना लेइ गवा रहा अमालेकी लोग ओनका लइ गएन। 4दाऊद अउ ओकरी फउज क दूसर लोग तब तलक रोवत रहेन जब तलक उ सबइ थक जाइके कारण रोवइ क लायक नाहीं रहि पाएन। 5अमालेकी दाऊद क दुइ मेहरारू यिज्जेल क अहीनोअम अउ कर्मेल क नाबाल क रँड अबीगैल क लइ गएन।

6फउज क सब लोग दुःखी अउ गुस्सान रहेन काहेकि ओनकइ बेटवा-बिटिया कइदी बनइ लीन्ह ग रहिन। उ पचे दाऊद क पाथर स मारि डावइ क सलाह करत रहेन। ऐहसे दाऊद बहोतइ घबराइ गवा। मुला दाऊद आपन यहोवा परमेस्सर में सक्ती पाएस। 7दाऊद याजक एब्यातार स कहेस, “एपोद लइ आवा।” ऐह बरे एब्यातार दाऊद बरे एपोद लइ आएस। 8तब दाऊद यहोवा स पराथना किहस, “का मोका उ मनइयन क पाछा करइ चाही जउन हमरे परिवारे क उठाइ लइ ग बाटेन? का मँइ धइ लेइ?” यहोवा जवाब दिहस, “ओनकइ पाछा करा। तू ओनका धइ लेब्या। तू आपन परिवार क बचाइ लेब्या।”

### दाऊद अउ ओकर मनई मिस्त्री दस क धरत हीं

9-10दाऊद आपन छः सौ मनइयन क संग लिहस अउ उ बसोर क घाटी में गवा। ओहमों स कछू लोग उहइ ठउर प ठहर गएन। लगभग दुई सौ मनई ठहर गएन काहेकी उ पचे बहोत जिआदा थक ग रहेन अउ दुर्बल होइ जाइ स नाहीं चल सकत रहेन। ऐह बरे दाऊद अउ चार सौ मनइयन अमालेकियन क पाछा किहन।

11दाऊद क मनइयन एक तु मिस्त्री क खेत में लखेन। उ पचे मिस्त्री क दाऊद क लगे लइ गएन। उ पचे पिअइ क तनिक पानी अउ खाइ बरे भोजन दिहन। 12उ पचे मिस्त्री क अंजीर क टिकिया अउ झुरान अंगूरे क दुइ गुच्छन दिहन। खइया क खाए क पाछे उ चंगा भवा। उ तीन दिन अउ तीन राति स न कछू खाए रहा अउ न ही पानी पिए रहा।

13दाऊद मिस्त्री स पूछेस, “तोहार सुआमी कउन अहइ? तू कहीं आवा ह?”

मिस्त्री जवाब दिहस, “मँइ मिस्त्री अहउँ। मँइ एक तु अमालेकी क दास अहउँ। तीन दिना पहिले मँइ बेराम पड़ि गवा रहेउँ अउ मोर सुआमी मोका तजि दिहस। 14हम पचे नेगव प धावा बोलि दीन्ह जहाँ करथीत रहत हीं। हम पचे यहूदा पहुँटा प धावा बोलेन अउ नेगव पहुँटा प जहाँ कालेब लोग रहत हीं। हम पचे सिकलग क भी बार दीन्ह।”

15दाऊद मिस्त्री स पूछेस, “का तू उ मनइयन क लगे मोका पहुँचउब्या जउन हमरे परिवारे क लइ गवा अहइ?”

मिस्त्री जवाब दिहस, “तू परमेस्सर क समन्वा प्रण करा कि तू मोका न मरब्या न ही मोका मोर सुआमी क हाथ में देब्या! जदि तू अइसा करब्या तउ मँइ ओका धरवावइ में तोहार मदद करब।”

### दाऊद अमालेकी क हरावत ह

16मिस्त्री अमालेकियन क दाऊद क हिआँ पहुँचाएस। उ पचे चारिहुँ कइँती जमीन प मधु पीतेन अउ खइया क खात ओलरा रहतेन। उ पचे पलिस्ती अउ यहूदा क पहुँटा स बहोत सी चीज जउन लइ आए रहेन, उहइ स जलसा मनावत रहेन। 17दाऊद ओनका हराएस अउ ओनका मारि डाएस। उ पचे सूरज निकरइ स अगवा दिन तक जुझेन। अमालेकियन में स चार सौ जवानन क अलावा जउन ऊँट प चढ़िके परानेन कउनो नाहीं बच पावा।

18दाऊद क आपन दुइनउँ मेहरारू फुन मिल गइन। दाऊद उ सबहिं चीजन क पाएस जेनका अमालेकी लइ ग रहेन। 19कउनो चीज खोइ नाहीं। उ पचे सब गदेलन अउ बुढवन क पाइ लिहन। उ पचे आपन सब पूत अउ बिटियन क पाएन। ओनका आपन कीमती चीज मिल गइ। उ पचे आपन हर एक चीज वापस पाएन जउन अमालेकी लइ ग रहेन। दाऊद हर चीज क फुन लौटाइ लिआइ। 20दाऊद हर भेड़ी अउ गोरु क लइ लिहस। दाऊद क मनइयन इ पसून क अगवा चलाएन। दाऊद क मनइयन कहेन, “इ सब दाऊद क ईनाम अहइ।”

### सब मनइयन क हींसा बराबर होइ

21दाऊद हुवाँ आवा जहाँ दुई सौ मनई बेसोर क घाटी में ठहरा रहेन। उ उहइ मनई रहेन जउन बहोतइ थका अउ कमजोर रहेन। ऐह बरे दाऊद क संग नाहीं जाइ सकत रहेन। उ मनइयन दाऊद अउ उ सिपाहियन क सुआगत करइ बाहरे आएन जउन ओकरे संग गवा रहेन। बेसोर क घाटी में ठहरे भए मनइयन दाऊद अउ ओकरी फउज क बधाई दिहन जइसे ही उ निअरे आएन। 22मुला जउन टुकड़ी दाऊद क संग गइ ओहमों कछू बुरा अउ परेसानी पइदा करइवाला मनई रहेन। उ परेसानी पइदा करइवालन कहेन, “इ दुई सौ मनई हम पचन क संग नाहीं गएन। ऐह बरे जउन चीज हम लइ आए अही ओहमों स कछू हम ऐनका न देब। इ मनइयन सिरिफ आपन मेहरारू अउ बचवन क लइ सकत हीं।”

23दाऊद जवाब दिहस, “नाहीं मोर भइया लोगो, अइसा जिन करा। इ बिषय में सोचा कि यहोवा हमका का दिहे अहइ। यहोवा हम पचन क उ दुस्मन क हरावइ दिहेस ह जउन हम पचन प हमला किहस ह। 24जउन तू कहत अहा ओका कउनो न मानी। उ मनइयन क हींसा भी, जउन बाँटइ वाली चीजन क संग ठहरा रहेन, ओतनई होइ जेतैना ओनका जउन जुद्ध में गवा रहेन। सब क हींसा बराबर होइ।” 25दाऊद ओका इस्त्राएल बरे हुकुम अउ नेम बनाइ दिहस। इ नेमें अब तलक लागू होइके चला आवा बाटइ।

26दाऊद सिकलगा में आवा। तब उ उ चीजन में स, जउन अमालेकियन स लइ लीन्ह ग रहिन, कछू चीजन क आपन मीत लोगन यहूदा क नेता लोगन क पठएस। दाऊद कहेस, “इ सब भेंट आप लोगन क उ चीजन में स अहइ जेनका हम पचे यहोवा क दुस्मनन स पावा ह।”

27दाऊद उ चीजन में स जउन अमालेकियन स मिली रहिन, कछू जउन बेतेल क प्रमुख लोग, नेगव क रमीथ, यतीर, 28अरोएर, सिपमोत, एस्तमो, 29रकल, यरहमेलियन अउ केनि क सहरन, 30होर्मा, बोरासान अउ अताक में, 31अउ हेब्रान क पठएस। दाऊद उ चीजन में स कछू क ओन सबहिं ठउरन क प्रमुख लोगन क पठएस जहाँ दाऊद अउ ओकर लोग रहत रहेन।

### साऊल क मउत

**31** पलिस्ती इस्त्राएल क खिलाफ लड़ेन, अउ इस्त्राएली पलिस्तियन क समन्वा स पराइ गएन। बहोत स इस्त्राएली गिलबो पहाड़े प मारा गएन। 2पलिस्ती साऊल अउ ओकरे पूतन क पकड़ेन। पलिस्ती साऊल क पूत योनातान, अबीनादाब अउ मल्लिकसु क मारि जाएन।

3जुद्ध साऊल क खिलाफ बहोतइ बुरा रहा। धनुर्धारी लोग साऊल प बाण बरसाइ दिहन अउ साऊल बुरी तरह घायल होइ गवा। 4साऊल आपन उ नउकर स जउन कवच लइके चलत रहा कहेस, “आपन तरवार निकारा अउ मोका मारि डावा। तउ उ सबइ बिदेसी मोका चोट पहुँचावइ अउ मोर मसखरी करइ न अइहीं।” मुला साऊल क कवच

ढोवइया अइसा करइ स इनकार किहस। साऊल क सहायक बहोत डरा भवा रहा।

एँह बरे साऊल आपन तरवार लिहेस अउ आपन क मारि डाएस। 5कवच क ढोवइया लखेस कि साऊल मरि गवा। एँह पइ उ भी आपन तरवारि स आपन क मारि डाएस। उ हुवँइ साऊल क संग मरि गवा। 6इ तरह साऊल, ओकर तीन पूत अउ ओकर कवच ढोवइया सबहिं एक संग उहइ दिन मर गएन।

### पलिस्ती साऊल क मउत प खुस होत हीं

7इस्त्राएलियन जउन घाटी क दूसर कईंती अउर यरदन नदी क दूसर कईंती रहत रहेन, लखेन कि इस्त्राएली फउज परात बाटइ। उ पचे लखेन कि साऊल अउ ओकर पूत मर गएन। एँह बरे उ इस्त्राएलियन आपन सहर तजि दिहन अउ भाग पराइ गएन। तब पलिस्ती आएन। उ पचे उ सहरन में रहइ लागेन।

8दूसरे दिन, पलिस्तियन लहासे स चीजन क लेइ आएन। उ पचे साऊल अउ ओकर तीनहुँ पूतन क गिलबो पहाड़े प मरा पाएन। 9पलिस्तियन साऊल क मूँड़ काटि लिहन अउ ओकर कवच लइ लिहन। उ पचे इ खबर क पलिस्ती मनइयन अउ आपन देवमूर्तिथन क मन्दिर तलक लइ गएन। 10उ पचे साऊल क कवच क आस्तोरेत क मन्दिर में धरेन। पलिस्तियन साऊल क लहास बेतसान क देवारे प टँगेन भी।

11याबेस गिलाद क मनइयन ओनें सबहिं कारनामन क सुनेन जउन पलिस्तियन साऊल क संग किहस। 12एँह बरे याबेस क सबहिं फउजी बेतसान पहुँचेन। उ पचे सारी रात चलत रहेन। अउर उ पचे साऊल क लहासे क बेतसान क देवारे स उतारेन। उ पचे साऊल क पूतन क लहासन क भी उतारेन। तब उ पचे इ लहासन क याबेस लइ गएन अउर हुवँ साऊल अउ ओकरे तीनहुँ पूतन क लहासे क फूँकि दिहन। 13तब उ लोगन साऊल अउ ओकरे तीनहुँ पूतन क अस्थियन क बटोर लिहन। अउर ओनका याबेस में पेड़ क तरे दफनाइ दिहन। तब याबेस क लोग सोक मनाएन। याबेस क मनइयन सात दिना तलक उपवास राखेन।”